


मो०
१३५

जस्थानी गंगा



स्व. श्री पुरुषोत्तमदास स्वामी स्मृति-विशेषांक

With best compliments from :



Gram : KALINDI

Phone : 24-3520
24-7231
(2-lines)

**East End Trading &
Engineering Company Pvt. Ltd.**
(Civil Engineers and General Order Suppliers)

Regd. Office :
12/1B, Lindsay Street
Calcutta-700 087

सालाना मोल 45 रु.


राजस्थानी मंगा

इण अंक रो मोल 25 रु.

राजस्थानी गंगा

(स्व. श्री पुरुषोत्तमदास स्वामी स्मृति-विशेषांक)

परम पूज्य गुरुदेव पं० नंदकुमारजी अवस्थी,
महोदय को सादर — पद्मश्री



वर्ष 4, अंक 1-2

(जनवरी-जून, 1988)

विजया दशमी, 2085 वि०

संपादक

डा० मनोहर शर्मा



डा० दिवाकर शर्मा

राजस्थानी ज्ञानपीठ संस्थान

वीकानेर (राजस्थान)

राजरथानी ज्ञानपीठ संस्थान वीकानेर

पदाधिकारी

पीठाधिपति	—	डा. एस. ओन. स्वामी
पीठाध्यक्ष	—	डा. गिरिजाशंकर शर्मा
पीठ-स्थविर	—	डा. मनोहर शर्मा
पीठ-मंत्री	—	डा. पुरुषोत्तम आसोपा

संयोजक

साहित्य एवं इतिहास विभाग	—	डा. माधोदास व्यास
लोकसाहित्य विभाग	—	डा. स्वर्णलता अग्रवाल
विज्ञान विभाग	—	प्रा. पंकज गोस्वामी
प्रकाशन विभाग	—	श्री सनत्कुमार स्वामी
प्रचार विभाग	—	डा. दिवाकर शर्मा

संपादक-मंडळ

1. डा. नरेंद्र भानावत
2. डा. गिरिजाशंकर शर्मा
3. श्री दीनदयाल ओझा

परामर्श - मंडळ

1. डा. रघुवीरसिंह, सीतामऊ
2. श्री कन्हैयालाल सेठिया, कलकत्ता
3. डा. नेमनारायण जोशी, उदयपुर
4. डा. नृसिंह राजपुरोहित, जोधपुर
5. श्री रावत सारस्वत, जयपुर
6. श्री चंद्रदान चारण, वीकानेर
7. श्री अक्षयचंद्र शर्मा, कलकत्ता
8. श्री हजारीमल बांठिया, कानपुर
9. श्री श्रीलाल नथमल जोशी, वीकानेर

❀ समर्पण ❀

राजस्थानी भाषा-साहित्य का अनन्य उपासक
राजस्थानी ज्ञानपीठ संस्थान का पीठाधिपति
स्वर्गीय श्री पुरुषोत्तमदास स्वामी की
पावन स्मृति में घनै मान
समर्पित

पुरुषोत्तम स्वामी सुधी, गुणी ज्ञान-गंभीर ।
गंगा राजस्थान में, लायो तपसी वीर ॥

अनुक्रमणिका

1. गंगा रो दीपक (कविता)	डा. मनोहर शर्मा	1
2. गुलाब रो फूल (कविता)	श्री मोहन आलोक	2
3. 'राजस्थानी गंगा' धारै तप रो पुन-परताप (कविता)	श्री किशोर कल्पनाकांत	3
4. गीत पुरुषोत्तमदासजी स्वामी रो	श्री रावत सारस्वत	4
5. श्री पुरुषोत्तमदास स्वामी : व्यक्तित्व अवं कृतित्व	श्री सनत्कुमार स्वामी	5
6. मेरे पूज्य गुरुजी	श्री हजारीमल बांठिया	16
7. श्री पुरुषोत्तम स्वामी— अेक विलक्षण व्यक्तित्व	श्री कृष्णवीर सिंह	17
8. अग्रज रा भोळा, अनुज भांग्या	श्री श्रीलाल नथमल जोशी	19
9. दो रुवाइयां	श्री जीवणराम सिंगतिया	22
10. श्री पुरुषोत्तमदासजी स्वामी : म्हारी दीठ में	श्री दीनदयाल ओझा	23
11. श्री पुरुषोत्तमदास जी स्वामी— अेक अनुकरणीय जीवन-दर्शन	श्री नानूराम संस्कर्ता	26
12. स्व. पुरुषोत्तमदास स्वामी	श्री रामनिवास शर्मा	30
13. म्हारो अमरीका-प्रवास	श्री पुरुषोत्तमदास स्वामी	32
14. संत-सुभाव	डा. उदयवीर शर्मा	38
15. दूहा-इक्कीसी	डा. नागरमल सहल	39
16. पदमै चारण री बात : अेक विवेचन	डा. मनोहर शर्मा	42
17. फूफी रासो (काव्य)	श्री बद्रीदान गाडण	46
18. विघन-संतोषी (कहाणी)	डा. नृसिंह राजपुरोहित	53
19. 'खम्मा' शब्द री व्युत्पत्ति और अर्थ	श्री नरोत्तमदास स्वामी	58
20. जुगां सूं जूझता लोक-शब्द	श्री रावत सारस्वत	59
21. राजस्थान-इतिहास रो महत्त्वपूर्ण स्रोत : राजस्थानी साहित्य	डा. गिरिजाशंकर शर्मा	62
22. वीकै वीज थरप्पियो	डा. परमेश्वर सोलंकी	70
23. पवणउत (पवन-पुत्र)	(संकलित)	72
24. वीकानेर रै राजावा रो शेखावतां सूं संबंध (मुंहता वखतावरसिंह री ख्यात रा उद्धरण)	श्री सुरजनसिंह शेखावत	73
25. संपादकीय		79

गंगा रो दीपक

सनोहर शर्मा

गंगा री धारा में रमतो
सत-मत रो दीवो चालै
चौफेरी रस-किरणां छाये,
काळस रो हिरदो हालै
घोर घुमंती आंधी आयी,
पाणी री दुनिया डोली
पण सत रै दीवै री किरणां
इमरत री वाणी बोली
“प्रेम-पंथ नै मेट न पावै
संसारी पाणी अर पूक पूज
सोरभ सूं हिरदो सरसावै,
फूलां री नित मनस्या सून”
अब दीवो उद्दीपण लाग्यो,
अग-जग मांय उजास भरचो
देस और परदेस उजाळ्या,
ज्यूं सत रो सूरज उतरचो
नमस्कार सत रै सूरज नै
जिण री किरणां प्रेम-मयी
हिरदै नै हिरदै सूं बांधै
सदा सुरंगी नित नयी

□

—19, कैलास निकुंज, रानी बाजार
वीकानेर-334 001

गुलाब रो फूल

मोहन आलोक

केई दिनां सूं आज खिल्यो, आंगण गुलाब रो फूल
केई दिनां सूं कविता फूटी, वण गुलाब रो फूल

मन रै ऊणै-खूणै उपजी
उलज-पुलज री वास
छंटी आज, अर अेकर आयो
कीं सोरो-सो सांस

केई दिनां सूं वैंयी पावन पवन, गुलाब रो फूल
केई दिनां सूं आज हुयो ज्यूं मन, गुलाब रो फूल

मंडी हियै रै उजळै कागद
अपणापै री दीठ
जलम्यां सूं देखी ज्यूं निठ-सी
अळगापै री पीठ

केई दिनां सूं आयो साजन, ज्यूं गुलाब रो फूल
केई दिनां सूं लाग्यो जीवण, ज्यूं गुलाब रो फूल

निज रंगां सूं रंगतो हंस-र
घर-भर रा विदरंग
सोरभ-मोह बांधतो आयो
मन रा त्रिपत कुरंग

छिटकातो ज्यूं किस्तूरी रा कण, गुलाब रो फूल
आंगण उतरघो वण सुवास रो घण, गुलाब रो फूल

मन अंधारे घर में खींची
ज्यूं हळकी-सी बीज
अचाचूक ज्यूं तीजणियां रै
हुई सुरंगी तीज

केई दिनां सूं वरस्यो सावण, वण गुलाब रो फूल
विरहण घण नै पिव रा दरसन, ज्यूं गुलाब रो फूल

□

‘राजस्थानी गंगा’ थारै तप रो पुन-परताप !

किशोर कल्पनाकांत

उजळायत रँ अँताणै है मोटी ज्ञान-विणाप
‘राजस्थानी गंगा’ थारै तप रो पुन-परताप !
ओ मरुथळ शिवरूप, जटावां घोरां रो विस्तार
आदूज्ञान-चनरमा ओपै मस्तक पर उँकार
मायड़भासा राजस्थानी, गंगा रँ उणिधार
जटाजूट में दग-दग वैवै, सकळ दूधिया-धार
वा भाषा, जिग-जाग थारलो वणगी है जप-जाप
‘राजस्थानी गंगा’ थारै तप रो पुन-परताप !

जिको सिळावै हियो मात रो उण री पूरै आस
वो ई ज्ञान-तणै दिवलै रो वांटे सरव उजास
मैं जाणूं हूं, थां पर मां रो पूत-तणो विसवास
थे पुरुषोत्तम हो, का सागी पुरुषोत्तम रा दास
मायड़ रा साचा सपूत हो, खरा मिनख हो आप
‘राजस्थानी गंगा’ थारै तप रो पुन-परताप !

थे रतनां रा परम पारखी, रतन अमोलक ज्ञान
ज्ञान-रतन-धन नै पावण रो, थे जाण्यो विज्ञान
थारो दीठ मांय दीखै है लगन, धरम रँ ध्यान
करम धरम सूं प्राणवान है, थे पूरा पुनवान
पुन री महिमा सरजीवण है जग में आपूँआप
‘राजस्थानी गंगा’ थारै तप रो पुन-परताप !

निवण-निवण है आप धणी नै, लुळ-लुळ करूं प्रणाम
मायड़भासा रा लूँठोड़ा आप धणी हो थाम
जुग-जुग जागै चास्यो दिवलो, उजळै आठूँ-जाम
‘स्वामी’-कुळ रो जुग में ऊँचो, थारै सूं ई नाम
सवदां रँ परवाणै, मन री सरधा रँ नीं धाप
‘राजस्थानी गंगा’ थारै तप रो पुन-परताप !

□

—कल्पना लोक, रतनगढ़-331 022

गीत पुरुषोत्तमदासजी स्वामी रो

रावत सारसुत कहै

स्वामी रीत जिकी संभाळी,
प्रीत तिकी जतनां तैं पाळी
वातां जिकी वडां री वरती,
सुणी सबै ज्यूं री त्यूं सरती
'नर-उत्तम' सुरसुती निवाजी,
रीभ हुयी 'पुरुषोत्तम' राजी
साहित सेत वडेरां साजी,
वाजी बा पण थांसूं वाजी
रीत निभावण थां घर रीतां,
प्रण पाळ्या थां प्रीत प्रतीतां
'नर' 'पुरुखां' री उत्तम नीतां
जस गीतां गव्सी जग जीतां

□

—डी 282, मीरां मार्ग


बनी पार्क, जयपुर-302 006

श्री पुरुषोत्तमदास स्वामी : व्यक्तित्व एवं कृतित्व

सनत्कुमार स्वामी


—कई शताब्दी पूर्व— महाराष्ट्र के पंढरपुर नगर सून उठनै केई परिवार राजस्थान में आयनै बीकानेर-जोधपुर क्षेत्र में बसगया । अ परिवार पंढरपुर रै प्रसिद्ध संत-पुरुष रंकण रै शिष्य-समुदाय मांय सून हा । बै रांकावत वाजता । कैयो जावै है कै मुनि रंकण अग्नि रा अवतार हा । संत हुवता थकां बै निहंग महंत कोनी हां । उणां री धर्मपत्नी रो नांव बंकणा हो । बै रांका-वांका वाजता । बंकणा धर्म रा सिद्धांत पालणे में आपरै पति रंकण मुनि सून भी बढ-चढर ही । अक प्रवाद प्रचलित है कै अकर अ दंपति किणी जागां सून आपरै घरै जा रैया हा । रंकणमुनि आगै चालै हा अर बंकणाजी उणां सून की लारै आ रैया हा । मुनि नै मारग में सोनो पड़्यो दीख्यो । आ विचारनै कै इण माथै बंकणाजी रो स्त्री-मुलभ लालच नीं आ जावै, उणां सोनै माथै रेत नाख दी अर आगै वधग्या । बंकणाजी उणांनै इण भांत करता देखनै कैयो—‘प्राणनाथ ! आप कांई कर रैया हो ? माटी माथै माटी क्यूं नाखो हो ?’ आ सुणनै रंकणजी चकित हुयग्या । उणां कैयो—‘देवी ! तूं धन्य है । तूं तो म्हारै सून ई वत्ती निकली । मै तो इणनै सोनो समझ्यो हो पण थारै आगै तो ओ सोनो सोनो नीं हुयर साव माटी ही है । थारी होड भला कुण कर सकै ?’

इणी रंकण-बंकणा रा अनुयायी बै परिवार हा जिकां रो उल्लेख ऊपर करचो है । इणां मांय सून ही अक परिवार वो हो जिकै में आपां रै चरित-नायक रो जनम हुयो हो । आज इण परिवार री आठ पीढ़ियां हुय चुकी है, जिकी इण भांत है—



इण परिवार री चौथी पीढी रा मुखिया श्री अणंदराम वीकानेर रै दुल्लासर गांव रा वासिदा हा । ओ गांव सूडसर रेल-स्टेशन सूं उतरादे पासै थोडो कड़खै पड़ै है । अणंदरामजी वाद में दुल्लासर सूं चालर वीकानेर में आयर बसग्या । उणां रा मोभी बेटा श्री जयश्रीराम स्वामी हा जिकां रो व्यांव वाधणू री मीरादेवी सूं हुयो हो । इण परिवार में संवत् 1969 री माघ वदी दशमी नै रात रा दसेक वजी आपां रै चरितनायक रो जनम हुयो । ईस्वी सन् 1913 री उण दिन 31 जनवरी ही अर वार हो शुक्रवार । अठै उणां री जन्म-कुंडली दी जा रैयी है—

इष्ट—३७।५ अनुराधा नक्षत्र, चतुर्थ चरण, वृश्चिक राशि, गोत्र—मृकंडु, नख—सूवटा और आस्पद—मिश्र ।



आपां रा चरितनायक श्री पुरुषोत्तमदास स्वामी आपरै माता-पिता री जीवित संतानां में सगळां सूं छोटा हा । उणां सूं छोटा अेक और पुत्र जयश्रीरामजी रै हुयो पण वो तीन बरसां री अल्पायु में ई काळ-कवलित हुयग्यो । श्री स्वामी रो नांव पुरुषोत्तमदास राख्यो गयो जिको उणां रै अग्रज श्री नरोत्तमदास रै अनुकरण पर राख्यो मालम पड़ै ।

श्री पुरुषोत्तमदास स्वामी रा तीनूं अग्रज ख्यातिप्राप्त धुरंधर विद्वान हा । सगळां सूं बडा अग्रजद्वय स्वामी लक्ष्मण शास्त्री अर श्री माधवदास स्वामी निहंग महंत हा । वै जद छोटी आयु रा ही हा उणां रा दादागुरु अर श्री जयश्रीरामजी रा मामा श्री चेतनदासजी महाराज उणां नै नागौर-स्थित आप री बगेची में आपरा शिष्य मोतीरामजी अपरनाम मधुसूदनदासजी रा शिष्य वणावण वासतै लेयग्या । स्वामी लक्ष्मणदासजी संस्कृत भाषा रा प्रकांड पंडित अर व्याकरण, साहित्य, धर्मशास्त्र अर ज्योतिष रा धुरंधर विद्वान हा । उणां नागौर में अेक संस्कृत पाठशाला चला राखी ही जठै आसपास रै योग्य बालकां नै पारंपरिक प्रणाली सूं शिक्षा दिरीजती ही । छात्रां रै मुफ्त आवास अर भोजन री चोखी व्यवस्था ही । उण रो खरचो राजस्थान रा अेक सिकंदराबाद-स्थित आप्रवासी सेठ बहन करता हा । उणां साहित्य-सेवा भी खूब आछी करी । चित्रकाव्य-रचना में तो वै अत्यंत पटु हा । उणां री रचनावां में लघुस्तवराज, विष्णुचरितामृतम्, विष्णुचतुर्विंशत्यवतार-स्तोत्रम् उल्लेखनीय है । इण रै अलावा उणां संस्कृत में अनेक लेख ई लिख्या जिका संस्कृत-पत्रिकावां में छप्या हा । अठै वानगी सारू उणां रो अेक श्लोक दियो जावै है—

यं केशवेऽकृत रतिं किल शैशवेऽपि,

दृष्ट्वा स्वदुःखहरणं शरणं तमेव ।

तस्मै सुनीति तनयाय नयान्विताय,

नित्यं ध्रुवाय वरदं वरयेऽश्वसंख्यम् ॥

स्वामी लक्ष्मण शास्त्री 84 वर्ष की आयु में वीकानेर में सन् 1971 ई. में दिवंगत हुआ। उणां सूं छोटा श्री माधवदास स्वामी बड़ा लोकप्रिय नामी कथावाचक हुआ। वै अेक तरै रा आशुकवि हा। उणां राजस्थानी में 'रामकीर्तिसागर' नांवूं अेक विशाल ग्रंथ वणायो। उणां रो देहावसान 77 वरसां री ऊमर में हुयो।

राजस्थानी, हिंदी अर संस्कृत रा प्रकांड पंडित श्री नरोत्तमदास स्वामी आवां रै चरितनायक रा तीसरा अग्रज हा। उणां री साहित्य-सेवा अनुपम है। उण रो पूरो वर्णन करण वासतै अेक स्वतंत्र लेख री जरूरत है। वै राजस्थानी री प्रसिद्ध त्रिमूर्ति रा सदस्य हा। राजस्थानी रै समुद्धार री दिशा में उणां रो काम स्वर्णाक्षरां में लिखणै जोग है। उणां रो निधन 13 अगस्त 1981 ई. नै वीकानेर में हुयो।

श्री पुरुषोत्तमदास स्वामी री शिक्षा वीकानेर, वाराणसी अर अमेरिका में ओहायो राज्य रै कोलंबस नगर में हुयी। वीकानेर में प्रारम्भिक शिक्षा उणां बी. के. विद्यालय, जिकै नै डागा स्कूल भी कैवता हा, प्राप्त करी। उणां रै अध्यापकां में श्री छगनलाल चूरा, पं. भागीरथ गोस्वामी जिंसा ख्यातनामा शिक्षक हा। वै भागीरथ गोस्वामी रा अत्यंत प्रिय शिष्य हा। बठै सूं सातवीं कक्षा ससंमान उत्तीर्ण करनै वै आठवीं में स्थानीय डूंगर कालेज में प्रविष्ट हुया।

वै बठै रा उपाचार्य तारकनाथ मुकर्जी अर प्राध्यापक पं. दशरथ शर्मा रा प्रिय शिष्यां मांय सूं अेक हा। श्री स्वामी सन् 1931 में बठै सूं राजपूताना, मध्यभारत अर ग्वालियर बोर्ड री हाईस्कूल परीक्षा संमानपूर्वक उत्तीर्ण करी। छात्रावस्था में ही श्री स्वामी साहित्यप्रेमी हा। उणां वचन में केई पदां री रचना करी। डूंगर कालेज रै उण वगत रै हस्तलिखित मुखपत्र 'आलोक' रो उणां संपादन ई करघो। बाद में अेक दूसरै हस्तलिखित पत्र 'धारा' रै संपादन करण रो श्रेय भी उणां नै ई मिल्यो। अै दोनूं पत्रिकावां स्थानीय लोगां सूं घणी ई सरायीजी।

उणीज दिनां श्री स्वामी हिंदी साहित्य संमेलन सूं प्रथमा अर मध्यमा परीक्षा ई उत्तीर्ण करी।

हाईस्कूल परीक्षा उत्तीर्ण करचां पछै श्री स्वामी वीकानेर राज्य द्वारा प्रदत्त छात्र-वृत्ति प्राप्त कर उच्च शिक्षा सारू बनारस गया जठै वै छव-सात वरस रैया। काशी हिंदू विश्वविद्यालय सूं इंटर, बी. ऐस-सी. अर ऐम. ऐस-सी. परीक्षावां ससंमान उत्तीर्ण करी। ऐम. ऐस-सी. में उणां रो विषय केमिस्ट्री (रसायन विज्ञान) हो। उणां ऐम. ऐस-सी. परीक्षा वासतै अकार्बनिक रसायन में शोधप्रबंध भी लिख्यो हो। उणां रा निर्देशक केमिस्ट्री रा प्रख्यात प्राध्यापक श्री माधव बालाजी राणे हा। बनारस में रैवता थका वै राजपूताना

छात्रसंघ रा उत्साही अर कार्यशील सदस्य ई हा । उणां बठै कैमिकल सोसाइटी री स्थापना ई करी अर जद ताई बठै रैया उण रै सचिव पद नै । उणां ई सुशोभित करचो । उण वगत वीकानेर रा साहित्यप्रेमी अर राजस्थानी-ब्रयी रा वरिष्ठ सदस्य ठाकुर रामसिंह अंग्रेजी भाषा अर साहित्य रा प्राध्यापक हा । वाद में वै वीकानेर में शिक्षाविभाग रा निदेशक वणनै बठै सू चल्या गया । बनारस में आपरै प्रवास-काल में श्री स्वामी हिंदी साहित्य रा अनेक विख्यात विद्वानां रै संपर्क में आया । उणां में डा. श्यामसुन्दरदास, आचार्य रामचंद्र शुक्ल, पं. केशवप्रसाद मिश्र, श्री अयोध्यासिंह उपाध्याय, डा. पीतांबरदत्त बड़श्वाल, मैथिलीशरण गुप्त, प्रवासीलाल वर्मा, मालवीय सत्यजीवन वर्मा, श्रीमती ज्योतिर्मयी ठाकुर, रामकृष्णदास अर विनोदशंकर व्यास रा नांव उल्लेखनीय है ।

आदरणीय महामना मदनमोहन मालवीय अर उणां रै परिवार रै सदस्यां यथा गोविंद मालवीय अर श्रीधर मालवीय अर दूजा नेता ज्यं जमनालालजी बंजाज रै संपर्क में आवण रो अवसर श्री स्वामी नै प्राप्त हुयो । उणां उणी दिनो महात्मा गांधी, सरदार वल्लभभाई पटेल वगैरै राष्ट्रीय नेतावां रा दरसण ई करचा ।

‘मधुशाला’ रा ख्यातनामा कवि श्री हरिवंशराय वच्चन सू श्री स्वामी ‘मधुशाला’ रो पाठ भी बनारस हिंदू विश्वविद्यालय रै शिवाजी हाल में सुण्यो । शायद वच्चनजी पैलड़ी वार ई उण रो बठै पाठ करचो हो । थोड़ी ताळ पछे उणी तरज में बठै रा अंग्रेजी-प्राध्यापक अर हिंदी रा प्रसिद्ध अनुकरण-काव्यप्रणेता श्री मनोरंजनप्रसादसिंह ‘मधुशाला’ री पैरोडी (अर्थात् अनुकरणकाव्य) तयार करने सुणायो अर खूब बाह-बाही प्राप्त करी ।

हिंदू विश्वविद्यालय में श्री स्वामी रा दूजा ख्यातनाम प्राध्यापक हा—डा. अवबविहारी मिश्र जिका वाद में विश्वविद्यालय रा कुलसचिव भी वण्यो हा, प्रा. चंद्रवल, श्री यू. के. असरानी, श्री कृष्णकुमार माथुर, श्री पी. दत्त, ख्यातनाम विज्ञान लेखक श्री फूलदेवसहाय वर्मा, डा. राजनाथ, डा. के.पी. रोडे, वीरेन्द्रकिशोर चक्रवर्ती, याज्ञवल्क्य भारद्वाज अर डा. एस. एस. जोशी । इणां मांय सू भूविज्ञान रा प्राध्यापक अर तत्कालीन प्राचार्य, विज्ञान महाविद्यालय रा श्री कृष्णकुमार माथुर री अध्यापनकुशलता सू श्री स्वामी खूब प्रभावित हुया । श्री माथुर, यद्यपि, एक ई दिन बी. एस. सी. (प्रथम वर्ष) री कक्षा नै पढायो, पण उण एक ई दिन में उणां इसो आछी तरै पढायो कै श्री स्वामी ऊमर भर उणां रै लेक्चर नै याद राख्यो । उणां री दृष्टि में इसो आछो पढावणआळो प्रोफेसर और कोई नीं हो ।

उण वखत हिंदू विश्वविद्यालय में दूजा ख्यातनामा प्राध्यापक अन्य विभागों में जिका हा उणां रो अठै उल्लेख करणो समीचीन रैसी ।

1. प्रा. अनंत सदाशिव आलटेकर — प्राचीन भारतीय इतिहास एवं संस्कृति ।
2. बाबा श्यामाचरण दे — गणित, अ. कुलसचिव तथा प्रोवाइस चैंसलर भी रैया ।
3. प्राचार्य अनंदशंकर बापुभाई धुव — प्राचार्य सेंट्रल हिंदू कालेज अंधाक्ष संस्कृत विभाग अर प्रोवाइस चैंसलर ।

- | | |
|-------------------------------|--|
| 4. डा. नरेंद्र नृसिंह गोडबोले | — औद्योगिक रसायन विभाग रा अध्यक्ष । |
| 5. प्रा. निहालसिंह | — अध्यक्ष राजनीतिविज्ञान, अँ वाद में राजस्थान रा राज्यपाल भी वण्या । |
| 6. डा. भीखनलाल आत्रेय | — दर्शन विभाग । |
| 7. डा. बी. बी. नारलीकर | — गणित । |
| 8. डा. अ० पी. गांधी | — खनन अँ धातुकर्म । |
| 9. प्रा. महादेवलाल सराफ | — औषध रसायन। अँ वाद में पिलाणी में विड़ला कालेज रा प्राचार्य वण्या । |
| 10. कविराज प्रतापसिंह | — आयुर्वेद विभाग । |
| 11. प्रा. शिवसुब्रह्मण्यम् | — विधि । |
| 12. प्राचार्य लज्जाशंकर भा | — सेंट्रल हिंदू स्कूल रा प्रिंसिपल अर प्राचार्य, शिक्षकप्रशिक्षण महाविद्यालय । |
| 13. प्राचार्य किंग | — अभियांत्रिकी महाविद्यालय रा प्रिंसिपल । |
| 14. प्रा. जीवनशंकर याज्ञिक | — अंग्रेजी विभाग । अँ हिंदी रा प्रख्यात लेखक तथा याज्ञिक बंधुत्रय में सूँ अँक हा । |
| 15. प्रा. पी. बी. अधिकारी | — दर्शन विभाग । |
| 16. प्रा. बलदेव उपाध्याय | — संस्कृत विभाग । |
| 17. डा. खुशीराम मेहता | — वनस्पति विज्ञान । |

ऊपर वताया प्राध्यापकों में डा. अधिकारी दर्शन विभाग रा अध्यक्ष हा । उणां री दो पुत्रियां ही— श्रद्धा अँ भक्ति । उणां रँ वारँ में अँक रोचक प्रसंग आवँ है जिको श्री स्वामी घणी वार सुणाया करता । वँ दोनूँ हिंदी री अ०. अ०. कक्षावां में पढ़ती ही । अँक दिन आचार्य रामचन्द्र शुक्ल अ०. अ०. (हिंदी) री कक्षा में पढावता हा । अँक छात्र उणां नै पूछ्यो— सर, श्रद्धा अर भक्ति में कुण वडी है ? आचार्य शुक्ल सुण'र थोड़ी ताळ मौन रँया फेर जवाव दियो— किणी अधिकारी सूँ पूछो । कितो सटीक उत्तर हो !

स्वामीजी 1936 में बी. अ०.सी. कक्षा उत्तीर्ण करी । उणरँ पछै वँ रसायन-विज्ञान में अ०. अ०.सी. में प्रवेश लेवणो चावता हा । उण वखत विज्ञान महाविद्यालय रा प्राचार्य अर रसायन विभाग रा अध्यक्ष डा. अ०. अ०. जोशी हा । वँ न जाणै किण कारण सूँ दक्षिण भारतीय विद्यार्थियां सूँ घणा प्रभावित हा । उणां अ०. अ०.सी. प्रथम वर्ष में जित्तीई रिक्तियां ही उणां नै भरता थकां उण विद्यार्थियां नै प्रवेश दे दियो जिका हिंदू विश्वविद्यालय सूँ बी. अ०.सी. को करी ही नी । इण कारण श्री स्वामी नै प्रवेश नो मिल्यो । वठै सूँ हताश हुयनै श्री स्वामी अ०. अ०. हिंदी तथा अ०. अ०. बी. करणै रो निश्चय कर्यो । हिंदी अ०. अ०. में प्रवेश लेवण सूँ उण विभाग रा अध्यक्ष डा. श्यामसुंदरदास खूब राजी हुया ।

इण वीच अम. असे-सी. (रसायन) में प्रवेश पावण में असफल अक दूजो विद्यार्थी विश्वविद्यालय रा तत्कालीन कुलपति पं. मदनमोहन मालवीय कने जा पूग्यो अर उणां रै आगे अरज करी के अगर हिंदू विश्वविद्यालय में ही अठे सूं उत्तीर्ण छात्रां नै प्रवेश नीं मिलसी तो बै कठे जासी। मालवीयजी नै आ वात जचगी। उणां डा. जोशी नै बुलायो अर उण विद्यार्थी नै अम.असे-सी. में भर्ती करणै री हिदायत करी। उणनै प्रवेश मिल्यो। अबै श्री स्वामी भी आपरै अक अन्य सहपाठी जे. डी. कोचर नै साथ लेयनै डा. जोशी कने जा पूग्या अर प्रवेश री मांग करी। डा.जोशी स्वामीजी नै पूछ्यो—काई थारै हिंदू में रसायन पढण री प्रबल लालसा है? हां में उत्तर दियां उणां दोनां नै अम-असे. सी. (रसायन) प्रथम वर्ष में प्रवेश मिलग्यो। अबै उणां अम. अ. हिंदी अर अेल-अेल. बी. नै अळगी करी अर इण पासी पाछा विज्ञान कालेज में आयग्या। इण सूं डा. श्यामसुंदरदास तो की खिन्न भी हुया। श्री स्वामी अर श्री कोचर रो नांव अेल-अेल. बी. कक्षावां में केई दिनां ताई हाजरी रजिस्टर सूं पुकारीजतो रैयो।

स्वामीजी हिंदू विश्वविद्यालय सूं रसायन विज्ञान में ससंमान अम. असे-सी. सन् 1938 में उत्तीर्ण करचां पछै वीकानेर आयग्या। बै तो अध्यापन कार्य करणो चावता पण उण वखत स्थानीय डूंगर कालेज में तो विज्ञान रा विषय पढावण रो कीं इंतजाम कोनी हो। इंटर में विज्ञान विभाग सुरू हुवण में ओजू दो साल री देरी ही। उण वखत वीकानेर में स्थानीय लोगां में श्री स्वामी ही अकमात्र अम. असे-सी. उत्तीर्ण व्यक्ति हा, इण कारण विज्ञान सूं संबंधित किणी राजकीय विभाग में जगह मिलणी दोरी कोनी ही। उण वखत जगात अर आवकारी विभाग में इंस्पेक्टर री अक जागा खाली ही। श्री स्वामी इण विभाग में काम तो कोनी करणो चावता हा पण 'बैठे सूं बेगार भली' वाली उक्ति रै अनुसार कीं-न-कीं करणो आछो, आ समझ नै उणां अक अरजी उण विभाग में पेश कर दी। स्वामीजी री इण पद पर नियुक्ति हुयगी। उणां इण पद रो काम संभालण रो पत्र भी विभाग में जायनै दे दियो पण उण पछै बै उण जागां काम करणनै गया ई नीं। थोड़ा दिनां पछै उणां इण पद सूं आपरो त्यागपत्र भी भेज दियो अर वात आयी-गयी हुयगी।

जनवरी 1939 में श्री स्वामी री नियुक्ति तत्कालीन वीकानेर राज्य रै सचिवालय, जिको उण वखत महकमा खास वाजतो हो, वैदेशिक अर राजनीतिक विभाग में 75 रु. प्रति माह वेतन माथै हुयगी। उण वखत 75 रु. बहोत आछो वेतन समझ्यो जावतो हो। चपरासियां नै उण दिनां 10 रु. प्रतिमास अर महकमा खास रै चपरास्यां नै 11 रु. महीनै री पगार मिलती ही। चीजां उण दिनां काफी सस्ती ही। गेहूं उण दिनां 13 सेर अक रुपियै रा मिलता हा। श्री स्वामी महकमा खास में 1939 सूं 1942 ताई रैया। डूंगर कालेज में 1940 में इंटरमीडियेट कक्षावां में साइंस विषय री कक्षावां खुलगी ही पण प्रयत्न करता थकां अर सब तरफ सूं चाहीजतां थकां भी श्री स्वामी री उण वखत अध्यापनक्षेत्र में प्रवेश री इच्छा पूरी नीं हुय सकी। महकमा खास में उण वखत वैदेशिक विभाग रा प्रभारी मिनिस्टर कवल माधव पणिकर हा। बै स्वामीजी रै कार्य अर व्यवहार सूं खूब प्रसन्न हा।

सन् 1942 में श्री स्वामी डूंगर कालेज में रसायन विभाग का सहायक प्राध्यापक बनकर स्थानांतरित हुआ। वै इण पद पर श्री पणिकर की इच्छा है विपरीत आया। पणिकर चावता हा के श्री स्वामी महकमा खास में ही काम करता रैवै।

इण अरसै में सन् 1940 में श्री स्वामी नै तत्कालीन महाराजा गंगासिंह आपरै पोतां भंवर करणीसिंह अर भंवर अमरसिंह रै विज्ञान-अध्यापक पद माथै नियुक्त करणै खातर साक्षात्कार वास्तै बुलाया। साक्षात्कार में महाराजा साहब रै अंग्रेजी में प्रश्न पूछणै पर श्री स्वामी राजस्थानी में उत्तर दियो। इण सूं महाराजा गंगासिंहजी खूब राजी हुया। इण पछै सगळै प्रश्नां अर उत्तरां में राजस्थानी रो ही प्रयोग हुयो। श्री के. अम. पणिकर साक्षात्कार रै बखत उपस्थित हा पण उणां रै पैलड़ै प्रश्न रै अलावा कीं पल्लै नीं पड़्यो। वै हक्का-बक्का हुयनै देखता रैया।

श्री स्वामी नै विज्ञान-शिक्षक रै काम नै आपरै वर्तमान काम रै साथै अंजाम देवणो हो। इण वास्तै उणां नै 50 रु. प्रतिमास रो भत्तो सन् 1945 ताई मिलतो रैयो जद वै आगै अध्ययन सारू राज्य रो तरफ सूं अमेरिका गया। श्री स्वामीजी नै इण शिक्षण कार्य वास्तै ग्रीष्मकाळ अवकाश रै दौरान राजस्थान रै प्रसिद्ध अवं अकमात्र पर्वतीय स्थळ आवू पर्वत में निवास रो अवसर भी मिल्यो। इण पर्वतीय प्रवास में श्री स्वामीजी राजस्थानी-त्रयी रा प्रमुख सदस्य ठा. रामसिंह तथा इतिहासविद डा. दशरथ शर्मा रै निकट संपर्क में आया। डा. रामसिंह उण बखत अलवर रै महागजकुमार रै शिक्षक रै रूप में माउंट आवू में अलवर हाउस में रैवता हा। अलवर हाउस विजयविलास अर बीकानेर हाउस सूं घणी दूर कोनी हो जठै श्री स्वामी रैया करता हा। सायंकालीन भ्रमण रै समय उणां में परस्पर साहित्य-चर्चा हुया करती ही। डा. दशरथ शर्मा रै साथै सिद्ध्या रा घूमती बखत दशरथजी रो घणी बार कैथोड़ी अक हिंदी कविता रो पंक्तियां श्री स्वामी घणी बार सुणाया करता—जंगल में हम रहते हैं, दिल बस्ती से घबराता है, मानुस गंध न भाती है, मृगमर्कट संग सुहाता है। इणी आवू-प्रवास रै काळ में जद श्री स्वामी विजयविलास में रैवता हा आपरै अवकाश काळ में अंग्रेजी रो अक पोथी रो हिंदी अनुवाद करयो जिको 1945 में 'शरीर अवं स्वास्थ्य विज्ञान' रै शीर्षक सूं स्टूडेंट्स बुक कंपनी, जोधपुर द्वारा प्रकाशित हुयो। इणरा च्यार संस्करण 1950 ताई छप चुक्या हा।

श्रीस्वामी डूंगर कालेज बीकानेर में रसायन विभाग में सह-प्राध्यापक रै तौर पर सन् 1942 सूं 1945 ताई रैया। वै विद्यार्थियां नै अकार्वनिक रसायन पढाया करता हा। अक बार जद वै विद्यार्थियां नै पढा रैया हा बीकानेर राज्य रा तत्कालीन शिक्षामंत्री श्री पणिकर जिका वैदेशिक व राजनीतिक मंत्री भी हा, डूंगर कालेज आया अर श्री स्वामी नै पढावता देखनै घणा राजी हुया। आ बात स्वाभाविक ही, क्यूंके श्री पणिकर स्वयं अक बखत अलीगढ विश्वविद्यालय में इतिहास रा प्राध्यापक रै चुका हा।

डूंगर कालेज में आपरै अध्यापन-काळ रै समय श्री स्वामी स्थानीय गुण प्रकाशक सज्जनलय रा पुस्तकालय अवं वाचनालय प्रभारी हा। उणां रै इण पद पर प्रदर्शित कार्य-

कुशलता सूनू इण संस्था री प्रबंध समिति रा अध्यक्ष ठा. रामसिंह अर समिति रा अेक अन्य सदस्य डूंगर कालेज में इतिहास विभाग रा तत्कालीन अध्यक्ष डा. आशीर्वादीलाल श्रीवास्तव घणा प्रभावित हा अर उणां श्री स्वामी री इण खातर अनेक वार खुब प्रशंसा करी ।

श्री स्वामी रो विदेश में आगे शिक्षा प्राप्त करणै वास्तै वीकानेर सरकार द्वारा चयन सन् 1945 में करचो गयो । चयनसमिति में महाराज नारायणसिंह जिका उण वखत वीकानेर राज्य रा प्रधानमन्त्री हा, सरदार के. एम. पणिक्कर अर ऊन विकास निदेशालय रा अध्यक्ष हा । इण समिति द्वारा पांच आवेदक चयनित हुया जिकां रा नांव इण भांत है:-

श्री पुरुषोत्तमदास स्वामी — औद्योगिक रसायन व सिरेमिक्स
 श्री कुंजीलाल गहलोत — फोटोग्राफी
 श्री प्रभुदयाल माथुर — पशुपालन विज्ञान (Animal husbandry)
 श्री रणवीरसिंह तलवार — कृषिविज्ञान
 श्री पृथ्वीसिंह — वैद्युत अेवं यांत्रिक अभियांत्रिकी

इण सगळां रो प्रशिक्षण-स्थळ अमेरिका तय हुयो । आवेदकां में चिकित्सा विज्ञान में प्रशिक्षण वास्तै डा. शूरवीरसिंह भी हा पण चूकि स्थान खाली पांच ही हा, उणां रो चयन कोनी हुय सकयो । इणां में वाद में श्री पृथ्वीसिंह राजस्थान विद्युत बोर्ड रा अध्यक्ष नै प्रमुख सलाहकार भी रैया अर श्री (पछै डा.) रणवीरसिंह तलवार उदयपुर विश्व-विद्यालय रा कुलपति भी वणया ।

श्री स्वामी संयुक्त राज्य अमेरिका में 1948 रं जुलाई मास ताई रैया । इण अवधि रो विवरण अगर सुधी पाठक जाणणो चावै तो इण ग्रंथ में अन्यत्र प्रकाशित 'म्हारो अमेरिका प्रवास' शीर्षक श्री स्वामी रै लेख में देख सकै है ।

श्री स्वामी आपरै अमेरिका-प्रवास सूनू वठै रै ओहायो स्टेट युनिवर्सिटी सूनू एम. एस. उपाधि प्राप्त कर अर वठै रै औद्योगिक प्रतिष्ठान लास एंजेलस (कैलिफोर्निया स्थित) सर्वश्री ग्लैडिंग मैक्वीन अेंड कं. रै स्थानीय संयंत्र में प्रशिक्षण लेय नै अगस्त 1948 में वापस भारत आया । श्री स्वामी एम. एस. उपाधि वास्तै तामचीनी रै क्षेत्र में अेक शोध-प्रबंध भी प्रस्तुत करचो हो ।

अठै उण वखत भारत ब्रिटिश राज्य-दासता सूनू मुक्त हुयनै स्वतंत्र वणग्यो हो । वीकानेर भी आपरो भाग्य भारत रै भाग्य साथै जोड़ण रो निश्चय कर लियो हो अर विलय री प्रक्रिया में हो । इण युगांतरण काळ में राजस्थान सरकार श्री स्वामी नै कोई समुचित पद उणांरी योग्यता रै अनुरूप नीं दे सकी अर ओ आदेश करचो कै जठै ताई ओ संभव नीं हुवै श्री स्वामी किणी निजी औद्योगिक प्रतिष्ठान में काम कर सकै है । श्री स्वामी सहारन-पुर री तेज मेटल अेंड इनेमल वर्क्स में इनेमल अेक्सपर्ट रै पद पर तथा जबलपुर रै औद्योगिक प्रतिष्ठान में क्ले-प्राविधिज्ञ पद पर कीं असें ताई काम करचो । श्री स्वामी रो इण

प्रतिष्ठानों में करचोड़ो काम काफी सरायो गयो। अंततः श्री स्वामी राजस्थान सरकार रै खान तथा भूविज्ञान विभाग में काम करण वास्तै बुला लिया गया। उणां री नियुक्ति रसायनवेत्ता तथा सिरेमिक प्राविधिज्ञ रै पद पर हुयी। वाद में वै इणी विभाग में पदोन्नत हुयनै रासायनिक तथा सिरेमिक अभियंता वण्य। इण पद माथै काम करता थकां उणां घणी वार विभाग रै संयुक्त निदेशक व निदेशक रो काम करचो। उणां रै प्रभार में काफी समय ताई विभाग रो क्रय उपविभाग भी रैयो। वां इण विभाग में रैवता थकां जयपुर, जोधपुर अर उदयपुर में काम करचो। उदयपुर में श्री स्वामी उगणीस वरसां ताई मुख्यालय—निदेशालय में रैया। उणां नै स्थानांतरण रो कष्ट को भेलणो पड़्यो नीं जिकी सरकारी अधिकारियां री नियति हुया करै है। श्री स्वामी घणी वार कैया करता कै इत्तै लंबै अरसै ताई राज्य-सेवा में रैवतां थकां भी मनै स्थानांतरण में हुवणवाळै सुख या दुःख रो, जो भी कैवो, अनुभव को हुयोनी। तवादलो किण नै कैवै इण वारै में वै नितान्त कोरा ही हा। सुख तो इण कारण कै राज्यसेवा री लांबी अवधि में अनेकू जाग्यां रैवण नै मिल जावै। नूई जाग्यां रा दर्शनीय स्थल देखण नै मिलै जिकै वास्तै आपरी जेव सू कीं खर्च कोनी करणो पड़ै। नूवां-नूवां लोगां सूं परिचय हुवै, नूवां मित्र भी वणै अर दुःख इण खातर कै हरदम विस्तर गोळ राखणा पड़ै क्यूँकै तवादलै रै खांडै रो धार सिर माथै हमेशा लटकती रैवै। श्री स्वामी रै कामकाज अर व्यवहार सूं उण विभाग रा निदेशक, अन्य अधिकारी नै दूजा लोग सदा संतुष्ट अर उणां रा प्रशंसक रैया।

आपरै सेवाकाल में यद्यपि श्री स्वामी नै राज्य में दौरा करणै री जरूरत नगण्य-सी ही पण विभाग रा प्रमुख तकनीकी अर अनुभवी अधिकारी हुवण वास्तै उणां नै राज्य सूं वारै भारत रै प्रमुख प्रदेशां व नगरां में सरकारी काम अंजाम देवणनै विभिन्न तकनीकी संस्थावां अर समितियां रै अधिवेशनां में राज्य सरकार अर विभाग रै प्रतिनिधि रै रूप में घणी वार जावणो पड़तो हो।

श्री स्वामी सन् 1970 रै मई महीनै रै अंत में राज्य-सेवा सूं निवृत्त हुया। निवृत्त हुयां पछै 1972 ताई उणां नै आपरै निजी काम सूं उदयपुर रैवणो पड़्यो। वै जून 1972 रै अंत में बीकानेर पाछा आयग्या। अठै उण समय सूं बीच में सन् 1974-75 में एक वरस नै छोड़ नै, जद वै आपरै मोभी बेटै डा. प्रभातकुमार स्वामी रै सागै रुड़की विश्वविद्यालय परिसर में रैया, बीकानेर ही उणारो निवासस्थल रैयो।

सरकारी सेवा सूं रिटायर हुयां पछै श्री स्वामी आपरै अग्रज स्वर्गीय श्री नरोत्तमदास जी स्वामी रै राजस्थानी-सेवा रै काम में पूरी लगन सूं जुड़ग्या। राजस्थानी ज्ञानपीठ संस्थान रै गठन में वै संस्थापक सदस्य तो रैया ई, संस्थान रै महत्वपूर्ण पीठाध्यक्ष पद नै भी उणां ई पैली वार सहर्ष स्वीकारनै वखुबी निभायो। श्री नरोत्तमदासजी रै सरगवास पछै उणां संस्थान रै गरिमापूर्ण 'पीठाधिपति' पद नै संभाल्यो नै राजस्थानी-जगत नै आश्चर्यचकित करतां थकां संस्थान सूं राजस्थानी भाषा री सिरमौड़ त्रैमासिक पत्रिका 'राजस्थानी गंगा' रो शुभारंभ करचो। उणांरै अनूठै संपादन में पत्रिका नै आछी साख मिली

है। अबार ताई उणां श्री नरोत्तमदासजी रो संपादित करचोड़ो घणकरोक लोकसाहित्य रो संग्रह 'राजस्थानी गंगा' रै अंकां में प्रकाशित करचो। राजस्थानी री इण सेवा नै उजागर करण सारू राजस्थानी मासिकी 'माणक' आपरै मई 1987 रै अंक में श्री स्वामी रो अेक लांबो-चौड़ो इंटरव्यू छाप्यो।

श्री स्वामी री राजस्थानी सेवा और उणां रै शानदार मार्गदर्शन सारू कृतज्ञता-ज्ञापन रूप में संस्थान उणां री पिचंतरवीं वर्षगांठ रै उपलक्ष्य में उणां नै अेक अभिनंदन-ग्रंथ भेंट करण री योजना वणायी। उण सारू अेक कमेटी ई वणी पण दुर्भाग्य सू आ योजना अधूरी ई रैयी अर दिनांक 9 जून 1988 ई. नै स्वामीजी इहलीला संवरण कर लीनी।

श्री पुरुषोत्तमदास स्वामी विरचित साहित्य

ग्रंथ सूची

1. पदावली (अप्रकाशित और अप्राप्य)
2. स्वास्थ्यरक्षा, दूसरा भाग, नवयुग ग्रंथ कुटीर, बीकानेर
3. विज्ञान के पथ पर, नवयुग ग्रंथ कुटीर, बीकानेर
4. नूतन रसायन विज्ञान, भाग 1 व 2, लक्ष्मीनारायण अग्रवाल, आगरा
5. दैनिक जीवन में विज्ञान (अप्रकाशित, गिरधारी लाल टांटिया पुरस्कार-प्राप्त)
6. Clays of Rajasthan, Directorate of Mines & Geology, Rajasthan, Udaipur.
7. Ceramic Industry in Rajasthan, Directorate of Mines & Geology Rajasthan, Udaipur.
8. रत्न विज्ञान, किताब महल, इलाहाबाद
9. औद्योगिक अेवं आभियांत्रिक उपयोग के पदार्थ (अप्रकाशित)
10. सुंदर कांड, स्व. श्री नरोत्तमदास स्वामी के सहयोग में संपादन, इंडियन प्रेस, प्रयाग
11. शरीर अेवं स्वास्थ्य विज्ञान (अंग्रेजी सू अनुवाद)—दी स्टुडेंट्स बुक कंपनी, जोधपुर
12. सरल सामान्य विज्ञान (अप्रकाशित)
13. मकान वणावण रा पदार्थ (अप्रकाशित)
14. स्वास्थ्य चंद्रिका (अप्रकाशित)
15. स्वास्थ्य सुधा (अप्रकाशित)
16. स्वास्थ्य कीमुदी (अप्रकाशित)
17. नूतन सामान्य विज्ञान (अप्रकाशित)

लेख सूची

1. प्रेम की पराकाष्ठा : खांडल विप्र हितैषी, मारवाड़ मूंडवा
2. राजस्थानी साहित्य और उसकी प्रगति : नागरी-प्रचारिणी पत्रिका, काशी
3. अैल्युमीनियम, उसका महत्त्व और उपयोगिता : हंस, काशी
4. दादुर देव का दैन्य प्रदर्शन : हंस, काशी

5. विश्व का निर्माण : माधुरी, लखनऊ
6. राजस्थानी भाषा : बीणा, इंदौर
7. राजस्थानी का अलग अस्तित्व : राजस्थान साहित्य, उदयपुर
8. मिट्टी : प्राची, कलकत्ता
9. महिला, समाज का गौरवमय अंग : चांद, इलाहाबाद
10. सूर्य : हंस, काशी
11. चन्द्रमा : हंस, काशी
12. मंगल : हंस, काशी
13. वृहस्पति : हंस, काशी
14. शुक्र : हंस, काशी
15. बुध : हंस, काशी
16. पृथ्वी : हंस, काशी
17. फास्फेट उर्वरक : सरस्वती, इलाहाबाद
18. कुल नाम : सरस्वती, इलाहाबाद
19. राजस्थान की खनिज संपत्ति : राजस्थान भारती, बीकानेर
20. Transposition of Insoluble phosphates by sodium peroxide and sodium carbonate : Proceedings of Indian science Congress 1942 Baroda session
21. Transposition of Insoluble oxalates by sodium peroxide and sodium carbonate : Dungar College Magazine, Bikaner
22. Ceramic Raw materials of Rajasthan : C.G.C.R.I, Bulletin, Calcutta
23. धरती माता : जागती जोत, बीकानेर
24. तत्वां री कथा : जागती जोत, बीकानेर
25. राजस्थानी रा अप्रतिम सपूत म्हारा अग्रज : जागती जोत, बीकानेर
26. अेक अनूठा व्यक्तित्व (श्री भागीरथमल स्वामी) : भागीरथमल स्वामी, जीवन दर्शन
27. पदार्थ अर वस्तु : माणक, जोधपुर
28. हवा अर उणरी उपयोगिता : राजस्थानी गंगा, बीकानेर
29. पाणी अर उणरो महत्व : राजस्थानी गंगा, बीकानेर
30. तिथियां री घट-वढ क्यूं ? : राजस्थानी गंगा, बीकानेर
31. धरती अर काळगणना : वंदना (स्मारिका), बीकानेर
32. माटी : राजस्थानी गंगा, बीकानेर
33. रबड़ : विज्ञान, इलाहाबाद
34. श्री भंवरलाल नाहटा : श्री भंवरलाल नाहटा अभिनंदन ग्रंथ, कलकत्ता
35. मां आवै, दही-वाटियो लावै, लोककथा प्रस्तुति : राजस्थानी गंगा, बीकानेर
36. वा हलदी-फळदी, हूं सूठ कड़ाकड़ कैरो कचरो वाखूनी : राजस्थानी गंगा, बीकानेर

37. चिड़ी नै लाधी लाल, कागलै नै लाध्यो मोती : राजस्थानी गंगा, बीकानेर
38. काष्ठ अर्थात् लकड़ी : राजस्थानी गंगा, बीकानेर
39. भवन निर्माणोपयोगी पत्थर : जागती जोत, बीकानेर
40. पेंट, वार्निश तथा रंग : सरस्वती, इलाहाबाद
41. स्नेहक पदार्थ : सरस्वती, इलाहाबाद
42. सरेस तथा अन्य चिपकाने वाले पदार्थ : सरस्वती, इलाहाबाद
43. चमड़ी तथा जिलेटीन : सरस्वती, इलाहाबाद
44. प्राणिज तथा वानस्पतिक तैल : सरस्वती, इलाहाबाद
45. अपघर्षक पदार्थ : सरस्वती, इलाहाबाद
46. सीमेंट तथा कांक्रीट : सरस्वती, इलाहाबाद
47. चूना तथा जिप्सम : सरस्वती, इलाहाबाद
48. कांच एवं तामचीनी के पदार्थ : सरस्वती, इलाहाबाद
49. ताप तथा विद्युत् विसंवाहक पदार्थ : सरस्वती, इलाहाबाद

शान्ति आश्रम, पुराने विजली घर के पास
बीकानेर

□

मेरे पूज्य गुरुजी

हजारीमल बांठिया

स्वामीजी ! हां, प्रा. पुरुषोत्तमदासजी स्वामी मेरे गुरुजी रहे थे। मैं सन् 1942-44 में डूंगर कालेज, बीकानेर में विज्ञान का छात्र था, तब उनसे शिक्षण ग्रहण किया था। पूज्य नरोत्तमदासजी स्वामी से, जो स्वामीजी के अग्रज थे, तो वचन से संपर्क रहा था। वे आदरणीय मामाजी (स्व. अगरचन्दजी नाहटा) के अभय जैन ग्रंथालय में प्रायः हर इतवार को बराबर आते थे। दोनों बंधुओं में विशेष गुण यह रहा कि बोलना कम और काम अधिक करना।

सन् 1945 में कालेज छोड़ कर उत्तरप्रदेश में व्यापार-निमित्त आकर बस गया तो संपर्क प्रायः टूट-सा गया था, किन्तु अग्रज स्वामीजी से तो थोड़ा-बहुत रहा। पिछले पांच वर्षों से 'राजस्थानी गंगा' का जब से प्रवाह चलने लगा तो गुरुजी का प्रथम पत्र मिला कि कि तुम मेरे शिष्य हो, गुरु के नाते तुम्हें आदेश है कि राजस्थानी ज्ञानपीठ को सहयोग दो। तब से राजस्थानी गंगा में मैं भी गोते लगाने लगा।

अग्रज श्री स्वामीजी राजस्थानी भाषा के स्तंभ थे। उनके अधूरे कार्य को पूरा करने के लिये गुरुजी वृद्धावस्था में भी जी-जान से जुट गये थे। 'राजस्थानी गंगा' के साथ उनकी अक्षय कीर्ति सदैव जुड़ी रहेगी।

—52/16 शक्करपट्टी,
कानपुर-208001

श्री पुरुषोत्तमदास स्वामी — अेक विलक्षण व्यक्तित्व

कृष्णवीर सिंह

जीवन में हम कई लोगों के संपर्क में आते हैं, जो अपने सान्निध्य का हम पर अलग-अलग प्रभाव छोड़ते हैं। कुछ व्यक्ति ऐसे होते हैं, जो अपने स्वभाव, व्यवहार एवं विद्वत्ता का अविस्मरणीय प्रभाव छोड़ देते हैं। ऐसे व्यक्तियों का सान्निध्य हमारे मस्तिष्क में एक प्रकाशपुंज की तरह छा जाता है। श्री पुरुषोत्तमदास स्वामी से मेरा सान्निध्य कुछ इसी प्रकार का रहा।

श्री पुरुषोत्तमदास स्वामी ने राजस्थान के खान अेवं भूविज्ञान विभाग में केमिस्ट-कम-सिरेमिक टेक्नोलोजिस्ट के पद का कार्यभार 29 अगस्त, 1953 को संभाला। उस समय विभाग में कुछ ही गिने चुने अधिकारी थे और विभाग भी अपेक्षाकृत बहुत ही छोटा था। श्री मुंशीलाल सेठी उस समय इस विभाग के निदेशक थे। श्री सेठी अेक दबंग प्रशासक थे, जिससे उनके आधीन कार्यरत अन्य अधिकारियों में अेक विशेष प्रकार के भाईचारे अेवं संबंध का स्थापित होना स्वाभाविक था। श्री स्वामी की विभाग की रासायनिक प्रयोगशाला की स्थापना में अेक महत्त्वपूर्ण भूमिका रही है। इस नई सज्जित प्रयोगशाला ने सन् 1954 में विश्लेषण का कार्य प्रारंभ किया। यह श्री स्वामी की सूझबूझ अेवं कर्तव्यनिष्ठा का ही परिणाम था कि आधारभूत सुविधाओं के न होते हुअे भी इस प्रयोगशाला ने विश्लेषण-कार्य प्रारंभ कर दिया। धीरे-धीरे श्री स्वामी ने इस विभाग की प्रयोगशाला को विभाग की आकांक्षाओं के अनुरूप विकसित किया, जिसके फल-स्वरूप सिरेमिक उद्योग में प्रयुक्त होने वाले खनिजों की जांच आदि का काम भी इस प्रयोगशाला में किया जाने लगा। यह श्री स्वामी द्वारा प्रयोगशाला के लिये बनाये गये ठोस आधार का ही परिणाम है कि आज यह प्रयोगशाला इस विभाग की पूर्णतः विकसित अेवं महत्त्वपूर्ण इकाई बन गई है अेवं यहां किये गये कार्य की तुलना राष्ट्रीय प्रयोगशालाओं द्वारा किये गये कार्य से की जा सकती है।

श्री स्वामी ने इंडियन स्टैण्डर्ड्स इंस्टिट्यूट (I.S.I.) की विभिन्न तकनीकी समितियों में इस विभाग का प्रतिनिधित्व किया। इन समितियों में उनका योगदान उल्लेखनीय रहा। खनिजों से संबंधित तकनीकी समस्याओं के लिये निदेशक अेवं विभाग के अन्य अधिकारी श्री स्वामी के ज्ञान का लाभ प्राप्त करते रहते थे। मुझे याद नहीं पड़ता कि कभी किसी मामले में श्री स्वामी ने अपनी असमर्थता जताई हो। समस्या चाहे अधात्विक खनिजों से संबंधित हो या धात्विक खनिजों से, श्री स्वामी के पास सभी समस्याओं का समुचित समाधान उपलब्ध होता था। अपने विषय पर इस अधिकार अेवं सौम्य व्यक्तित्व के कारण उनको सभी अधिकारियों से सम्मान मिलता था।

अपने विषय में अधिकार तो कई लोगों को हो सकता है, पर अंक तकनीकी अधिकारी का हिंदी एवं अंग्रेजी दोनों ही भाषाओं पर समान अधिकार बिरले लोगों का ही होता है। श्री स्वामी दोनों ही भाषाओं में लेखन की क्षमता रखते थे, जिसके फलस्वरूप विभाग के कई महत्वपूर्ण पत्रों, लेखों एवं प्रतिवेदनों में श्री स्वामी की इस प्रतिभा की स्पष्ट झलक देखने को मिलती है। श्री स्वामी अंक कुशल प्रशासक भी थे एवं उन्होंने कई बार संयुक्त निदेशक (प्रशासन) का कार्य भी कुशलतापूर्वक किया था।

श्री स्वामी सन् 1970 में रासायनिक एवं सिरेमिक अभियंता के पद से सेवा-निवृत्त हुए पर आज भी श्री स्वामी की स्मृति उन अधिकारियों एवं व्यक्तियों के लिये प्रेरणा की स्रोत है जिनको श्री स्वामी के साथ कार्य करने का अवसर मिला। जो पद्धति श्री स्वामी ने प्रयोगशाला के लिये आज से 34 वर्ष पूर्व निर्धारित की थी, वही पद्धति आज भी उसी रूप में प्रयोगशाला में अपनाई जा रही है।

श्री स्वामी अंक सौम्य, मृदुभाषी एवं सहृदय अधिकारी थे, जिनका ध्येय सदा 'सादा जीवन, उच्च विचार' रहा। मुझे अच्छी तरह याद है कि जब भी तत्कालीन निदेशक महोदय नाराज होकर विभिन्न अधिकारियों को कुछ कह देते थे तो अन्य अधिकारी अपनी नाराजगी अपने अधीनस्थ अधिकारियों/कर्मचारियों पर उतार देते थे जबकि श्री स्वामी उसको अपने तक ही सीमित रखते थे।

श्री स्वामी ने सन् 1960 में 'सिरेमिक इंडस्ट्री इन राजस्थान' पर जो पुस्तक लिखी थी, उसमें दिये गये तथ्य, आंकड़े, विश्लेषण इत्यादि आज 27 साल बाद भी संदर्भ के रूप में विभाग द्वारा प्रयुक्त किये जाते हैं। इसी प्रकार श्री स्वामी द्वारा लिखी पुस्तक 'रत्नविज्ञान' आज भी संदर्भ-ग्रंथ के रूप में प्रयुक्त की जाती है। श्री स्वामी का भामरकोटड़ा की फास्फेट परियोजना के विकास में भी उल्लेखनीय योगदान रहा, जिसके फलस्वरूप विभागीय प्रयोगशाला के चार व्यक्तियों को राज्य सरकार द्वारा पुरस्कृत किया गया।

श्री स्वामी ने विभाग के कार्यों को अपना स्वयं का कार्य मानते हुये ही संपादित किया जिसमें उनकी कर्तव्यनिष्ठा एवं ईमानदारी स्पष्ट झलकती है। इस विभाग के प्रति श्री स्वामी का लगाव उनके द्वारा उनकी विदाई समारोह के समय उद्धृत निम्न पंक्तियों से स्पष्ट हो जाता है—

‘मेरो मन अनत कहां सुख पावें ?

जैसे उड़ि जहाज को पंछी पुनि जहाज पै आवें।’

यद्यपि श्री स्वामी अनंत की दिशा में प्रयाण कर चुके हैं, पर आज भी उनका स्मरण विभाग में उनके संपर्क में आये हुये सभी अधिकारियों/कर्मचारियों द्वारा हमेशा किया जाता है।

□

—निदेशक, खान एवं भूविज्ञान विभाग,
राजस्थान, उदयपुर-313 001

अग्रज रा भोला, अनुज भांग्या

श्रीलाल नथमल जोशी

कोई भी बड़ो काम हुवँ तो उण नै सुरू करणिया इक्का-दुक्का लोग ई हुवँ । वै लोग जे रह संकल्प रा धणी है तो काम पुखता रूप धारण करै, आपरी जड़ जमावँ अर दूजां रो सहयोग भी उण नै मिलै । राजस्थानी भाषा रै आंदोलन बाबत ई आ ई बात लागू हुवँ । जदपी ठाकुर, पारीक अर स्वामी रै मन में आंदोलन जिसी कोई धारणा नई ही, फेर भी बां जिकी लगन सूं राजस्थानी भाषा अर साहित्य रै उद्धार रो काम छेड़चो, वो इत्ती प्रवळ गति सूं छेड़चो कै वो आंदोलन हुवँ ज्यूं दीसण लागग्यो ।

ठाकुर रामसिंह कनै सर्जनधर्मी दिमाग हो अर वै सगळी भांत आप रै दोनू वेल्यां माथै यथासंभव छत्तरछैयां करता । अठिनै सूर्यकरण पारीक पिलाणी गया परा इण कारण ठाकुर अर स्वामी सूं अलग-थलग पड़ग्या । आंदोलन सारू अकजुटता जरूरी है । जे अं तीनूं बराबर भेळा वण्था रैवता, तो राजस्थानी भाषा री स्थिति जिकी आज है, उण सूं साव न्यारी-निरवाळी हुवती । पण भाषा रै भागां तो रोभा लिख्योड़ा हा । तीनां मांय सूं कायम ई दो रैया, कारण पारीकजी असमै सरग सिधारग्या ।

पारीकजी रै सरग सिधारण सूं राजस्थानी आंदोलन री कमर टूटगी । 'मरुवाणी' रै अक लेख में ठीक लिख्यो कै पारीकजी राजस्थानी-रथ री धुरी हा । धुरी टूटतां ई दोनू पड़्या न्यारा-न्यारा गुड़ पड़्या अर रथ रो अस्तित्व खतरें में पड़ग्यो । रथ नै पाछो ऊभावण में, चौखळै खड़ो करण में खेबा घणा खावणा पड़्या है । जिको रथ पैली सहज रूप सूं आपरी चाल पकड़्यां चालै हो, रुकावट पछै पैलीआळी सागी चाल पकड़ण रै प्रयास में बरसां रा बरस बदीत हुयग्या । फेर भी आ कैय सकां कोनी कै रथ सागी रफतार माथै है, जदपी आज सालूं-साल मोकळी पोथ्यां छपर बजार में आवँ पण अं पोथ्यां पारीकजी रै वैदुष्य रो स्पर्श कर सकै ?

जठै ताई राजस्थानी-संगठण रो सवाल है, इण काम नै स्व. नरोत्तमदास स्वामी ही आपरै हाथां में राख्यो अर ठेट ताई संभाळ्यो । जवान औस्था में वै साप्ताहिक गोष्ठ्यां सारू आपरै हाथां सूं मांड-मांडर सूचना री चिट्ठां भेज्या करता । बठै रचनावां वांचीजती, बांरी समीक्षा हुवती अर बांनै छपावण रो इंतजाम करीजतो ।

राजस्थानी रै संगठण सारू स्वामी नरोत्तमदासजी वि. सं. 1978 में वीकानेर में राजस्थानी साहित्य सभा री स्थापना करी अर वि. सं. 1980 में ई इण संस्था रो नांव पळटर राजस्थानी साहित्यपीठ कर दियो । आपरै जीवन में स्वामीजी भाषा, साहित्य अर

व्याकरण रै आछै-आछै ग्रंथां रो संपादन कर्यो अर इण कारण प्रकाशक भी वानै आछा-आछा मिल जावता। इत्तो हुवण रै बावजूद वारी दिली इच्छा रैयी कै वै इण संस्था सूं राजस्थानी री कोई चोखी-सीक पत्रिका काढै। स्वामीजी संपादक तो ऊंचै दरजै रा हा, पण प्रकाशन री व्यवस्था रा झमेला वारै तावै आवण आछा नई हा। इण कारण, चावता थकां भी वै पत्रिका छापण री हीमत जुटा पाया कोनी।

13 अगस्त, सन् 1981 नै नरोत्तमदासजी स्वामी रो सरगवास हुयग्यो। स्वर्गीय स्वामीजी री अपूरण अभिलाषा सूं उणां रा छोटा भाई श्री पुरुषोत्तमदास स्वामी पूरा वाकव हा। अग्रज अर अनुज री जीवन धारावां जावक न्यारी-न्यारी रैयोड़ी ही। अग्रज लगभग ताजिदगी अध्यापन-संपादन करचो, तो अनुज थोड़ै समै सारू डूंगर महाविद्यालय में सहायक प्राध्यापक रै पद माथै रैया, वाकी सगळी जिदगी प्रशासनिक सेवा में लगायी। जदपी पुरुषोत्तमदास स्वामी राजस्थानी रै आंदोलन सूं विशेष जुड़चोड़ा नई हा, पण वगत रै तगादें नै बां आछी तरै ओलख्यो अर सावळ सोच-विचार नै निर्णय लियो कै राजस्थानी साहित्य-समाज नै अग्रज रो अभाव खटकणो नई चाहीजै। संभवतः अग्रज री पूर्ति सारू ई पुरुषोत्तमदास स्वामी राजस्थानी रै क्षेत्र में कूदचा अर उण वगत इयां लाग्यो कै राजस्थानी रै क्षेत्र में विशेष उपलब्धि उणां रै बूतै सूं वारै री चीज है; पण घणै इचरज री वात कै पैसठ सीयाळा पार कर्योड़ा पुरुषोत्तमदास इण क्षेत्र में इत्तै उछाह अर उमंग सूं वड़चा कै बां भला-भलां नै लारै छोड दिया। 31 जनवरी उणां री वरसगांठ रो दिन हुवै। वरसगांठ रो दिन प्रायः लोग प्रेरणा रो दिन मानै। स्वामीजी खातर तो वरसगांठ जाणै प्रेरणा रो अजस्र स्रोत ही। 31 दिसम्बर 1983 नै वरसगांठ सूं ठीक अेक माह पैली राजस्थानी भाषा रै इतिहास में एक इतिहासी घटना घटी—त्रैमासिक पत्रिका 'राजस्थानी गंगा' री प्रस्तावना-रूप में 'वन्दना' रो प्रकाशन। जदपी 'वन्दना' रो प्रकाशन सगळी भांत सरावण-जोग ही, फेर भी संकाळुवां रा मन 'राजस्थानी गंगा' रै प्रकाशन, अर फेर नियमित प्रकाशन सारू आश्वस्त नई हा। जे स्वामीजी री आगली खिमता कायम रैयी हुवती तो कठणार्ई री कोई बात नई ही, पण संभवतः, वन्दना रै विमोचन आळै दिन ई पुरुषोत्तमदासजी जद सड़क पार करता हा, एक साइकल-सवार वारै हलकी-सीक टक्कर लगायर आगै वधग्यो। पण आ हलकी टक्कर महंगी घणी पड़ी। उणां री साथळ री हड्डी रो फ्रैक्चर हुयग्यो अर स्वामीजी नै केई मइनां तांई पलंग-सेवन करणो पड़चो। 'राजस्थानी गंगा' रो प्रकाशन अवै कळपना सूं वारै री चीज ही। पण राजस्थानी रा भाग आछा। स्वामीजी में जिजीविषा भरपूर! बां सावधानी सूं इलाज करायो अर पाछा खड़ा हुयग्या। इण अेक्सीडेंट मूं वारी चाल-ढाल में, काम री गती में रुकावट तो मोकळी आई पण अेक्सीडेंट उणां नै आपरै उद्देश्य सूं पाछा मोड़ सकयो कोनी।

राजस्थानी भाषा अर साहित्य री जिकी भी पत्रिकावां आज छपै है बां में 'राजस्थानी गंगा' आपरो सर्वथा न्यारो-निरवाळो स्थान वणा राख्यो है, जदपी आपां जाणां कै सरकारी खरचै सूं छपण आळी, लिखारां नै मैततानो देवण आळी पत्रिकावां भी अनेक संकटां सूं

घिरीजण कारण निरवाध रूप सून चाल सकै कोनी । 'राजस्थानी गंगा' छपाई, सफाई, भाषा री अकरूपता अर समै री पावंदी वगैरै सगळी दीठ सून आपरो स्थान सरावणजोग ई नई, ईसकै-जोग वणाय लियो । इयां तो राजस्थानी ज्ञानपीठ संस्थान री तरफ सून आपत्रिका छपै जिण री कार्यकारिणी रो वाकायदा गठन हुयोड़ो है, पण फेर भी जठै ताई पत्रिका रै काम रो सवाल है, वो लगभग सगळो स्वामीजी ई आप री छेड़ली घड़ी ताई करचो ।

पत्रिका में रचनावां मंगावण सारू खतोकितावत तो खुद करता ई हा, पण सगळां सून खेचळभर्यो काम हुवै — संशोधन । वो काम भी स्वामीजी खुद करता । अक काम इसो है जिणमें खेचळ री इतिथी हुय जावै — सगळी रचनावां री प्रेसकापी खातर पांडुलिपि तयार करणी, अर आ पांडुलिपि भी स्वामीजी खुद, आपरै हाथां सून, घणै सोवणै आखरां में करता । इण सून प्रेस रै काम नै घणी मदद मिलती अर छपाई री खोट्यां कम रैवती ।

आ तो हुई पत्रिका रै संपादन री वात । लारै रैयी उण रै वितरण री व्यवस्था । सगळा ग्राहकां सारू लिफाफां माथै ठिकाणा करणा, पत्रिका नै पैक करणी अर फेर वानै डाक में गेरणी, ओ सगळो काम भी स्वामीजी नै निजोनिज सलटावणो पड़तो । विचार आवै कै अक आदमी जिको हमेसा अफसराना तरीकै सून रैयो, वो 'पीर-ववर्ची-भिस्ती-खर' रै रूप में कियां चीतारीज सकै ? पण मायड़ रो हेलो, मातृभाषा रो तगादो आयां पछै मायड़ रा साचा सपूत सुख री नीदां कियां पौढ सकै ?

राजस्थानी भाषा री समृद्धि जग-जाणी है । दूजी भाषावां नै मानता है अर आ सिमरथवान हुवतां थकां जे आपरै 'सपूतां' सामी टुकर-टुकर जोवती रैवै तो उण सून दुख-दायक वात और काई हुसी ? संभवतः मायड़ री इण विषम वेदना रै कारण ई स्वामीजी नै उण ढळती अवस्था में भी कोछा टांगर कमर कसणी पड़ी । वा अवस्था रस्तो बतावण री ही, सुझाव देवण री ही, पण मैदान में उतरण री कोनी ।

स्वामीजी री अप्रतिम खिमता देखर मै अकर कैयो कै राजस्थानी भाषा में थांरी अनन्य सरधा-भगती देखतां थे स्व. नरोत्तमदासजी री वगत में इण संस्थान अर पत्रिका रो काम सांभ लेवता तो अवार ताई मोकळी प्रगति हुय जावती । स्वामीजी थोड़ी ताळ तो चुप रैया, फेर धीरै-धीरै बोल्या कै भाईसाव अर म्हारै विचाळै इत्ती लौड़-वडाई ही कै वारै अगाड़ी मूंडो खोलण री म्हारै में कदेई हीमत हुई कोनी । म्हारी तरफ सून प्रस्ताव रो मतळव हुवतो कै बांसू ओ काम पार पड़ै कोनी । म्हारै सामनै तो वै आदर्श हा, वारै बतायोड़ै गेलै चालणो ई म्हारो फरज हो । जद वै गया परा, तो वडेरचारो म्हारै कनै आयग्यो अर मनै इण काम नै अविलंब सांभणो पड़चो ।

अवस्था री निमळाई अर काम री गरुआई रै कारण स्वामीजी नै इण काम में रात-दिन जूझणो पड़चो । पण फेर भी उद्देश्य री पवित्रता नै ध्यान में राखतां वारो मन सदाई अकथ उछाह सून लबालब रैवतो अर वै इण काम में थाकेलो अनुभव नई करता, फेर भी इण में दो

राय कोनी कै लारलै दिनां बांरी आंखयां बराबर इसै मिनख री खोज में ही जिको इण काम नै बांरी मौजूदगी में सावल सांभनै बांरो भार हल्लको कर सकतो ।

किणी भाषा रो रतबो वधावण में व्यक्ति ही प्रधान हुवै, भीड़ नई । इजरायली भाषा आज बेन यहूदा रै कारण आदरीज्योड़ी है । भरोसो है— राजस्थानी रो मान वधावण आळां में स्वामीजी रो नांव ई कोड सू लिरीजसी ।

□

सोनगिरी चौक, बीकानेर

दो रुबाइयां

(अंग्रेजी सू अनुदित)

जीवणराम सगतिया

वात मान वूढै खयाम री,
जानी नै तूं वकवा दे
अेक वात री गांठ बांध लै,
आ जिदगाणी जासी ही
और वारतां सारी कूड़ी,
साची है वस अेकज वात
फूल चुक्यो जो फूल अंत में,
बो निश्चय मुरभासी ही ।

आ गुलाब रो फूल डाळ पर,
मुळक-मुळक कर बोल रैयो
इण जगती रै बागां मांहीं
ओ कितणो हूं लहर रैयो
पण, लै ! मेरै बटवै री,
आ रेशम डोरी टूट गयी
नगदावण जो भरी पड़ी ही,
इणी बाग में बिखर गयी 2

□

— 8, इंडियन मिरर स्ट्रीट
कलकत्ता-700013

श्री पुरुषोत्तमदासजी स्वामी, म्हारी दीठ में

दीनदयाल ओझा

गहरी मुलाकात रै अभाव में माणस माणस रै साचै मोल री कूंत नीं कर सकै । माणस री विद्वत्ता, उणरी सूझ-बूझ, आचार-विचार रो पतो उणी वेळा लाग सकै, जद कै वो उण माणस विशेष रै घणो नैड़ो आवै अथवा उण रै ज्ञान नै निरखै, परखै ।

डिगल-साहित्य री व्याख्या अर डिगल शब्द री उत्पत्ति रै बाबत श्री पुरुषोत्तमदास स्वामी रो नांव घणकरी बार पढचो, मोकै-मोकै उणां रै नांवरो लेखां में उपयोग भी करचो, पण श्री पुरुषोत्तमदासजी सू मन-मेळू मुलाकात स्व. श्री नरोत्तमदासजी स्वामी रै मार्फत हुयी । स्वामीजी राजस्थानी ज्ञानपीठ संस्थान, बीकानेर रै अेक अधिवेशन में श्री पुरुषोत्तमदासजी सू मुलाकात करवायी । इण मुलाकात रै बाद श्री नरोत्तमदासजी स्वामी, ज्ञानपीठ री दूजी मीटिंगां में श्री पुरुषोत्तमदासजी नै बुलावता अर वै बीकानेर में जद भी रैवता, जरूर पधारता ।

श्री पुरुषोत्तमदासजी स्वामी स्वर्गीय श्री नरोत्तमदासजी स्वामी रा छोटा भाई हा । दोनूं भाइयां में जठै घणो सनेव हो, बठै आदरभाव भी सरावणजोग । दोनूं भाइयां रै कदकाठी में जठै समानता बठै हस्त-लेख (आखरां) में असाधारण समता देखण में मिलै । अेक विज्ञान रो गुणी विद्वान तो दूजो राजस्थानी अर हिंदी-साहित्य रो प्रकांड पंडित; अंदरूणी रुचियां में दोनां री सरावणजोग समता ।

आदरजोग श्री नरोत्तमदासजी स्वामी रै गोलोकवासी हुवण रै बाद श्री पुरुषोत्तमदास स्वामी राजस्थानी ज्ञानपीठ संस्थान रो कार्यभार संभालचो । स्वामीजी धुन रा धणी हा । जिकी बात बारै मन में जच जावती उणनै अवश्य आछी तरियां पूरी करता । आपरी इण प्रकृति रै ताण बां राजस्थानी ज्ञानपीठ संस्थान रो पुनर्गठन कर सही रूप सू चलावण री चर्चा संस्थान रै संस्थापक सदस्यां सू करी । क्यूंकै हूं भी संस्थान रै संस्थापक सदस्यां में अेक हो, इण खातर संस्थान नै आछी तरै चलावण री बात कैवण रै सागै-सागै संस्थान नै कीं सावळ समय देयर काम करण री बात करी । मैं साहित्यिक मीटिंगां में आया-जाया करतो हो अर स्वामीजी म्हारी मोकळी गतिविधियां सू वाकिफ हा । स्वामीजी मनै संस्थान रो पीठमन्त्री वणायो अर काम चालण लाग्यो ।

म्हारी नौकरी रेलवे वर्कशोप रै लालगढ-स्थित आफिस में ही अर स्वामीजी रो निवास वसुधा नांव रो बंगलो अमरसिंहपुरा में हुवण सू, जद कदैई भी आफिस सू हूं घरै

जावतो श्री स्वामीजी सून घणकरी वार मिलनै घरै पूगतो । इण मोकळी मुलाकातां में श्री स्वामीजी नै निकट सून देखण री म्हारी हंस पूरी हुयी ।

स्वामीजी अंतस सून चावता हा कै श्री नरोत्तमदासजी रो सगळो अणकूंत्यो महताऊ साहित्य प्रकाशित हुवै अर गुणी विद्वानां तथा पाठकां ताई पूगै । इण खातर उणां सोच विचारनै 'राजस्थानी गंगा' नांव री राजस्थानी में संस्थान री मुख-पत्रिका निकालण रो दृढ़ निश्चय करचो । इण पत्रिका रै परिचय रूप में स्मारिका 'वंदना' शीर्षक सून निकळी, उणरै पछै 'राजस्थानी गंगा' रो अवतरण अंक, फेरूं उणरो प्रवाह अंक अर उणरै पछै 'राजस्थानी गंगा' रा नियमित रूप सून दूजा अंक निकळता रैया । अबार ताई इणरा दस अंक प्रकाशित हुय चुक्या है ।

स्वामीजी मूलतः विज्ञान रा विद्यार्थी अर प्राध्यापक हा । पण उणांरी दीठ राजस्थानी, हिंदी, अंग्रेजी, गुजराती, अर संस्कृत साहित्य कानी भी घणी गहरी ही । डिगळ साहित्य रो गंभीर अध्ययन, 'डिगळ' शब्द री उत्पत्ति, उण रो विकास आदि-आदि प्रसंगां माथै उणां मोकळो सोच्यो, विचारचो अर लिख्यो । राजस्थानी भाषा री ऐक-रूपता रा हिमायती श्री स्वामीजी राजस्थानी भाषा रो लेखण श्री नरोत्तमदासजी री वणायोड़ी वर्तनी नै थोडै-घणै बदलाव रै सागै सही मानता । स्वामीजी इण खातर लेखकां सून आयोड़ी सगळी रचनावां नै दूसर लिखर प्रेसकापी तैयार करता । उण पछै सगळी सामग्री मुद्रण हेतु प्रेस में देवता । प्रूफ री गळतियां नीं रैवणी चाहीजै, छपाई चोखी हुवै, कागद टिकाऊ अर फूटरो प्रयुक्त हुवै अर पत्रिका रो अंक दीखण में घणो रूपाळो लागै । इण सगळी वातां कानी स्वामीजी आपरो पुरो ध्यान देवण में कीं कोर-कसर नीं राखता ।

स्वामीजी घणा मेहनती हा । अबार ताई 74-75 वरसां री ऊमर में भगवती सरस्वती री कृपा सून ऐक जोध-जवान सून घणो सही, घणो आकरो, पुख्तो अर वेगो काम करता । वात उण दिनां री है, जद दिनांक 31 दिसम्बर 1983 सून 2 जनवरी 1984 ताई ज्ञान-पीठ संस्थान री तरफ सून स्व. श्री नरोत्तमदास स्वामी रो अस्सीवां जयन्ती-समारोह अर स्व. श्री अगरचंदजी नाहटा रो स्मृति-दिवस मनायो जावणो हो, उण वेळा श्री पुरुषोत्तम-दासजी स्वामी जितो लगन, निष्ठा अर धीरज सून काम लियो, वो सगळो उणां रै असाधारण व्यक्तित्व रो परिचायक हो । दिन-रात ऐक कर उणां सगळा काडं छपाया, प्रूफ देख्या, बारै जठै डाक सून भेजणा हा, उणां खुद डाक में चढायनै सगळां रा पत्ता लिख-लिख टिकटां चेपर डाक में नखवाया । उण वेळा उणां री मेहनत देखनै हूं तो दंग रैयग्यो । अप्रत्यक्ष रूप सून ओ जरूर मन में निश्चय करचो कै जे प्रभु कृपा करी तो लारली ऊमर इणी तरह साहित्य-सेवा-साधना में बिताऊंला ।

स्वामीजी हिसाब रै प्रति घणा साचा हा । ऐक पईसै रो दुरुपयोग उणां नै सहन को हुवतो नी, सदुपयोग सारू भलै ही सैकडूं रुपिया खर्च हुय जावै । सार्वजनिक संपत्ति रो हिसाब ऐक-ऐक पईसै रो राखणो और सगळां रै आगै जमा-खरच रो व्यौरो प्रस्तुत करणो श्री स्वामीजी आपरो सगळां सून वडो फरज समझता । हाल ही में उणां लारलै तीन वरसां

रैहिसाव-किताब रो अेक चार्टर्ड अेकाउंटेंट फर्म सूं अंकेक्षण (हिसाव परीक्षण) करायो हो । उणरी रिपोर्ट मुताबिक संस्थान रो हिसाव ठीक ढंग सूं राख्यो गयो है अर रत्ती भर भी गोळमाळ नीं हुयो । 'राजस्थानी गंगा' में दानदाता सूं प्राप्त 100 रु. सूं वेसी रकम रो उल्लेख कर उणरै प्रति आभार प्रकट करीजतो रैयो है । सार्वजनिक संपत्ति रै इण सदुपयोगी री भावना लारै श्री स्वामीजी री सरावणा सारा धनदातां करी अर खुलै हाथां सहायता प्रदान करै है ।

स्वामीजी वातां माथै नीं, काम माथै विश्वास राखता । अणूती वातां, लफावाजी स्वामीजी नै रत्तीभर भी पसन्द नीं ही । काम हुवैउत्ती वात, नीं जणै आपरो काम करता । इणी तरियां स्वामीजी समय रा बडा पावंद हा । जद मिलण खातर वखत दियोड़ो हुवतो उण वखत स्वामीजी आपरा सगळी काम-धंधा छोड़नै आवण वाळै व्यक्ति री उडीक में रैवता । नम्रता, सज्जनता अर शालीनता इण तरै री कै आवण वाळै अतिथि नै बारणो खोलण वास्तै खुद पधारता, ओपतो आदर देयर मांय बुलाय सगळी वात-चींत करता । सादगी तो उणां रो आभूषण ही हो । जीवण में कठै ही वणावटीपणो को होनी । फूठरै बंगलें में आछी तरियां रैवणो, सगळी चीज वस्तुवां, कितावां करीनै सूं राखणी उणां री अनुकरणजोग विशेषतावां ही ।

स्वामीजी विचार देवता, व्याख्या कोनी करता । उणां रा विचार किता दूरगामी हुसी, उण रो परिणाम कांई हुसी, इणरी घणी चिंता फिकर वै को करता नी । उणांनै ओ ध्यान रैवतो कै आज रै काम नै हजार वरस वाद भी कोई देखै तो आ कैय सकै कै ओ काम समझदार आदम्यां सूं समझदारी रै सागै करियोड़ो है, ऊंतावळ अर हडबड़ाहट में नीं ।

स्वामीजी ऊपर सूं जिता रूखा, भोळा, अस्त-व्यस्त-सा दीखता, मांयनै उता ही सरस, समझदार अर सधियोड़ा हा । अेक-अेक आखर नै तोल-तोल बोलणो अर सोच-सोचनै लिखणो उणां री सहज प्रवृत्ति ही । स्वामीजी दर असल अेक साचा साहित्यकार संत हा । आज उणां रै भागीरथ-प्रयत्न सूं 'राजस्थानी गंगा' वेगवती हुयर प्रवाहित हुय रैयी है ।

स्वामीजी मोकळी पोथ्यां लिखी, विज्ञान रै मोकळा छात्रां नै पढाया । माध्यम उम्र भर घणकरो अंग्रेजी रो रैयो पण हिंदी अर राजस्थानी तो उणां रै खून में, रग-रग में रमियोड़ी ही । कणै-कणैई हिंदी बोलो भलां ही पण लिखणो हुवतो जणै ठावी, टकसाळी राजस्थानी लिखणें में कदै ही पाळ नीं राखता । स्वामीजी कवि, निबंधकार, समीक्षक अर अनूठा संपादक हा ।

मनै श्री पुरुषोत्तमदासजी स्वामी रै श्रीचरणां में बैठर पढणै रो तो मीको नीं मिलियो पण जद सूं उणा सूं मिलणो-जुलणो चालू हुयो, उण वखत सूं अप्रत्यक्ष अर प्रत्यक्ष रूप सूं भी मोकळी वातां सीखी । हूं उणां रो जीवण-भर कृतज्ञ रैसूं । □

—साहित्य साधना सदन
केला पाड़ा, जैसलमेर-345 001

राजस्थानी गंगा 25

श्री पुरुषोत्तदासजी स्वामी -- अेक अनुकरणीय जीवण-दर्शन

नानूराम संस्कर्ता

उण वखत रै वीकानेर राज्य में उघड़तै उजास री फड़फड़ाहट फैल रैयी ही । राज्य रै आखा महकमां माथै मोटा साव बारै सू बुलाया जाया करता हा । आम लोगों में उणां रै दरसन री अखूट लालसा जागी । वै गोरी चाम रा टोपधारी दूधिया मोटियार आपरी विदेशी-अंग्रेजी बोली में समय परवाण हिंदी शब्दां री लड़ां रै टुकड़ां नै पाव-पूण करता उलझावता दीखता । कई नगरवासियां रै हिड़दां में होळी री चिणगारचां उपड़ण लागती । अेहड़ा अवसर माथै शहर रै लोगों रै जठै-कठै आपरै आंधलै ज्ञान रा चींचड़-सा चढण लागता । वै सोचता-आपणै देश में सागीड़ो सो कीं वापरै अर लाधै; पण आंख्यां में प्रकाश तो दीयै सू देख्यां ही नीं पांगरै ।

पैलड़ै विश्व युद्ध री प्राणघाती लाय में यूरोपवाळा आपरै लालच सू अठै रा जवान मिनखां नै बुला-बुलाय नै झूका भरती करणा चावता हा । पण समझदार लोग आपरै गाभरू टाबरां नै फौज सू अलायदा राखणै री जुगत बैठावता तथा टाबरां नै भणाई रै चानणपाखै में टोरण-सरकावण रो प्रयत्न करता । केई ज्ञानी-ध्यानी सत्संगी कथावाचक संत 'माता शत्रु पिता वैरी, येन बालो न पाठितः' बाळी कैवत सू अणभिज्ञ कोनी रैया ।

देश रै खदबदतै ज्ञान-उफाण रै समय-औसाण राजस्थानीरत्न श्री पुरुषोत्तमदास स्वामी रो जनम 31 जनवरी 1913 नै, इण मुजब विक्रमीय संवत् 1969 रै माघ वदी दस्यूं शुक्रवार रै दिन वीकानेर में पं. जयश्रीरामजी रै राम-नेमी घराणै में हुयो । उणां रो परिवार (नख-सूवटा) पैली दुलचासर सू उठनै आयो हो, इण कारण दुलचासरियो वाजै । आप भजनीक अर भणायी रै केड़-कडू बें में अवतरिया, फूल्या-फळ्या अर वडा हुया । उण वखत दूजा गांवां में तो पढाई रो जावक नांव नीं हो, पण वीकानेर में वखत वळ अंग्रेजी री पढाई रा केई मदरसा थरपीजग्या हा । घर रा वण्या वधता कारणां सू उणांरा संस्कार साव ऊजळा वणनै ऊंचा चढता-खिचता रैया । उणांरै आगै आठ श्रेणी ऊंचा भणीजता उणांरा वडा भाई श्री नरोत्तमदासजी री लेखणकळा सू मोवणी मोड़ रा मोती सिरखा सोवणा-चमकणा आखरां रो लेखण उणां भी सीख्यो अर जमायो । साहित्य अर व्याकरण रो हियाव ही उणां साथै खुल्यो । संस्कृत रै प्रति अनुराग-भाव भी उणां में आपरै दो और वडा भायां लक्ष्मणदासजी अर माधवदासजी सू विरासत में उपज्यो अर फळाप्यो । काका स्व. महंत चतुर्भुजदासजी पण अेक जाण्या-मान्या वडा भक्त कवि हा । उणां 'भवानी

मंगल' री रचना करी ही। उणां रो साहित्य वारें घरां घणो गायीजतो सुण्यो गुण्यो। संगतियां रै वतायै मुजव 'पुरुषोत्तमदासजी बाळपणै सूं ही मेधावी अर अध्यवसायी विद्यार्थी रैया हा। उणां रो पढणो-लिखणो, मनन-चित्तिण सूं सराबोर कैयीजतो।'।

आंठवीं सूं दसवीं कक्षा रै बीच पुरुषोत्तमदासजी हिंदी साहित्य सम्मेलन, प्रयाग री प्रथमा, मध्यमा (विशारद) व सम्पादन कला प्रवेशिका जिसी महत्वपूर्ण परीक्षावां उत्तीर्ण करी। मध्यमा री परीक्षा देवण में उणांरा साथी डूंगर कालेज में उण वखत रा शिक्षक श्री लाभदत्त गड़सी व्यास हा।

श्री नरोत्तमदासजी आपरै केई सहयोगी मित्रां रै साथै जिणां में पं. सूर्यकरणजी पारीक भी हा, सन् 1923 में राजस्थानी में शोध-खोज अर नूवें साहित्य सरजण खातर राजस्थानी साहित्य सभा स्थापित करी। आगै चालनै पनरै बरस पछै इण संस्था रो नांव 'राजस्थानी साहित्यपीठ' राख्यो गयो। पुरुषोत्तमदासजी सख्वात सूं इण संस्था रा कोडायत सदस्य अर सक्रिय कार्यकर्ता रैया। इण संस्था रो सभापति पद सख्पोत में तत्कालीन वाल्टर नोबल्स स्कूल रा संस्कृत-अध्यापक अर मानीता विद्वान पं. विद्याधरजी शास्त्री संभाल्छो-सोभायो। डूजा अगुवा विद्वानां री कार्यकारिणी समिति वणीजी जिण में ठा. रामसिंहजी, पं. दशरथ शर्मा, पं. रामनिवास हारीत, श्री रावत सारस्वत, नाथूरामजी खड़गावत अर अगरचन्दजी नाहटा रा नांव उल्लेख करणजोग है। इण संस्था द्वारा अनुसंधान रो लूँठो काम-काज हुयो।

इण सूं प्रेरणा लेयर पुरुषोत्तमदासजी भी आपरै विद्यार्थी-काळ में नाना भांत रा लेख, निबंध, कहाणी, कविता वगैरै तैयार कर उण वखतरी घणकरी प्रसिद्ध पत्र-पत्रिकावां में प्रकाशित कराया। इण पत्रिकावां में खांडल विप्र हितैपी सूं लेयनै काशी री नागरी-प्रचारिणी पत्रिका भी आवै है।

श्री स्वामी आपरै अग्रज नरोत्तमदासजी रै साहित्य-पथ पर चालनै लगोलग लूँठा कदम धरता गया। म्हारी जाण में अँ बै ही श्री पुरुषोत्तमदास स्वामी हा, जिणां रो नांव नागरी-प्रचारिणी पत्रिका भाग, 14 अंक 2 पृष्ठ 225 माथै 'डिगळ' रो अर्थ बतावणिया तथ्य-कारणां में प्रकाशित हुयोड़ो है; उणनै सदा सूं शोधार्थी वांचै-घोटै। (आपरो ओ कयास सही है-संपादक।) वै जद विश्वविद्यालय काशी में विद्याध्ययन करता हा, बडा स्वामीजी रै सहयोग सूं सुंदर-कांड रो संपादन करचो जिको इंडियन प्रेस प्रयाग सूं प्रकाशित हुयो।

श्री पुरुषोत्तमदास स्वामी वीकानेर री पढ़ाई पूरी करियां पछै काशी हिंदू विश्व-विद्यालय में पढणै वेगो गया। श्री नरोत्तमदासजी रा अनुज हुवणै रै नातै बठै उणां नै केई-अेक व्याख्यातावां सूं आछा काम-इनाम मिल्या। अधिकारी विद्वानां साहित्य सभावां री ठावी जाग्यां उणां नै संपी-संभळायी। उणां करड़ा-कंवळा सैंग कारज खिमता-बिखमता सूं करचा तथा संतुलण रो सागीड़ो परिचय दियो; जियां कैयीजै-प्रकृति विकृति न जायते

चोत्तमानां, मोटा मिनखां री प्रकृति में विकार नीं आवैं । श्री स्वामीजी उण विश्व-विद्यालय में शिक्षा-साहित्य री प्रवृत्तियां में पूरमपूर भाग लियां राख्यो जिकां री जाणकारी अनुसार वाराणसी रै विद्वानां में भी उणां रो मान-काण वध्यो । बठै सूं अेम. एस-सी. रसायन विज्ञान में सन् 1938 में उत्तीर्ण करी अर ओठा वीकानेर घरै आया । वै छात्रावस्था सूं ही साहित्यसेवी अर मातृभाषा राजस्थानी रा महान हिमायती रैवता आया हा ।

सन् 1939 में स्वामीजी वीकानेर राज्य रै महकमा खास में फोरेन अेंड पोलिटिकल डिपार्टमेंट में राज्य-सेवा में लाग्या । वै 1-8-40 नै वीकानेर महाराजा गंगासिंहजी रै पोतां भंवर करणीसिंहजी तथा भंवर अमरसिंहजी रा साइंस ट्यूटर (विज्ञान-शिक्षक) नियुक्त हुया । 17-11-40 नै वै गुणप्रकाशक सज्जनालय रा पुस्तकाध्यक्ष चुणीज्या । उण वखत इण संस्था री कार्यकारिणी समिति रा अध्यक्ष ठा. रामसिंह अर सचिव डा. हरनारायण हर्ष हा । सन् 1942 में अखिल भारतीय रांकावत ब्राह्मण महासभा रा स्वामीजी मानीता साहित्यमंत्री वण्या । उणां रै संपादकत्व में 'रांकावत ब्राह्मण' रो पैलड़ो अंक वडी सजधज रै साथै निकलछो ।

ऊंची पढाई री उणां री लालसा वणी रैयी । देश रै स्वतंत्र हुवणै रै समय वै संयुक्त राज्य अमेरिका रै ओहायो राजकीय विश्वविद्यालय में वीकानेर राज्य री छात्र-वृत्ति पायनै जा पूग्या अर बठै अेम. अेस. (रासायनिक अभियांत्रिकी अर सिरेमिक टेक्नोलोजी) री उपाधि सन् 1948 में प्राप्त करी । उणां अमेरिका रै विभिन्न स्थानां रो भ्रमण पर्यटक रै तौर पर आपरै दो अन्य सहपाठियां अर प्रसिद्ध सिने-तारिका शोभना समर्थ रै सागै करचो । बठै लोस अेंजेलस में अेक फर्म में कार्यानुभव भी प्राप्त करचो । उणां रै कार्य रो प्रशंसा उण फर्म रै तकनीकी अधिकार्यां मुक्तकंठ सूं करी ।

अमेरिका सूं वापस आयां पछै अेक-दो व्यावसायिक औद्योगिक फर्मां में उणां सफलता-पूर्वक काम करचो । पछै वै राजस्थान सरकार री सेवा में आयग्या । खान तथा भूविज्ञान विभाग में रासायनिक अेवं सिरेमिक अभियंता रै पद सूं वै 25 मई 1970 में सेवानिवृत्त हुया । विज्ञान अर तकनीकी अधिकारी हुवता थकां वै प्रशासन रै काम में भी पटु हा अर घणी वार उणां संयुक्त निदेशक (प्रशासन) अर निदेशक रै पदां पर काम करचो । हिंदी अर अंग्रेजी री अनूठी अभिज्ञता रै कारण उणां नै विभाग में घणी प्रसिद्धि मिली । अंग्रेजी सूं हिंदी में अनुवाद रो काम उणां री देखरेख बिना कोनी करचो जावतो ।

श्री पुरुषोत्तमदासजी स्वामी सदैव श्रद्धास्वरूप हिंदी, राजस्थानी अर अंग्रेजी में लेख लिखणें में अग्रणी रैया, तो भी विज्ञान-वाङ्मय में उणां री रचनावां कम संख्या में नीं है । उणां री पोथ्यां रा नांव है- रत्नविज्ञान, विज्ञान के पथ पर, दैनिक जीवन में विज्ञान, स्वास्थ्य रक्षा, औद्योगिक अर आभियांत्रिक उपयोग के पदार्थ, नूतन रसायन विज्ञान, Clays of Rajasthan, Ceramic industry in Rajasthan इत्यादि ।

श्री स्वामी नै हास्यरस में भी अभिरुचि कम नीं ही । उणां रो हास्य रस रो प्रसिद्ध लेख 'दादुर देव रो दैन्य-प्रदर्शन' जिकै रो हिंदी रूप 'हंस' में छप्यो हो आज भी लोगां नै

याद आवै है। ओ हास्य रस सू सरावोर लेख उणां वीकानेर में नागरीमंडार तथा गुण-प्रकाशक सज्जनालय री विशाल जनसभावां में, जिकै री अध्यक्षता क्रमशः श्री जुगलसिंह खीची अर श्री केसरीप्रसादजी शास्त्री करी ही, सुणायो हो। उण री उण वखत भूरि-भूरि प्रशंसा करीजी।

उणां री साहित्यसेवा सू हिंदी अर राजस्थानी री घणकरीक पत्रिकावां अछूती नीं रैयी। इणां में चांद, माधुरी, हंस, वीणा, सरस्वती, विज्ञान, लेखक, कमलिनी, राजस्थान भारती, जागती जोत, माणक, डूंगर कालेज मैगेजीन, सिरैमिक बुलेटिन, प्राची, राजस्थानी गंगा आदि उल्लेखनीय है।

स्वामीजी डूंगर कालेज रै हस्तलिखित मुखपत्र 'आलोक' रो संपादन करद्यो। उणां श्री गुरुप्रकाश गुप्त 'मुकुल' रै सहयोग सू हिंदी री हस्तलिखित पत्रिका 'धारा' रो संपादन भी खासा दिनां ताई करद्यो। अँ दोनू पत्रिकावां स्थानीय साहित्यिक क्षेत्र में खूब सरायीजी।

श्री स्वामी वीकानेर राज्य साहित्य सम्मेलन रै चौथै अधिवेशन में, जिको चुरू में हुयो अर जिणरा अध्यक्ष प्रसिद्ध राजस्थानी-त्रयी रा प्रमुख सदस्य ठा. रामसिंहजी हा, गिरधारी-लाल टांटिया पुरस्कार सू सन् 1944 में सम्मानित हुया। ओ पुरस्कार उणांनै 'दैनिक जीवन में विज्ञान' शीर्षक पोथी पर मिल्यो हो। निर्णायकां में डा. दशरथ शर्मा भी हा।

श्री स्वामीजी महाप्रयाण ताई राजस्थानी ज्ञानपीठ संस्थान, वीकानेर रा पीठाधिपति हा। इण संस्थान री तिमाही मुखपत्रिका रो संपादन-कार्य भी स्वामीजी ही कर रैया हा। वै विज्ञान परिपद्, प्रयाग रा आजीवन सभ्य, भारत री प्रसिद्ध विज्ञान संस्था इंडियन साइंस कांग्रेस असोसियेशन, कलकत्ता रा सन् 1942 सू आजीवन सदस्य अर सादृळ राजस्थानी रिसर्च इंस्टिट्यूट, वीकानेर रा संस्थापक सभ्य हा।

प्रशस्ति

पिता प्रभ जयश्रीराम, जप्यो नित राम-नाम
वसुधा अमर धाम, वीकानेर वास है।
रांकावत महाराज, करत साहित्य काज
राजस्थानी गंगा गाज, भ्रातृप्रेम खास है ॥
ओज अनुराग भाल, संयम नियम पाल
विद्यागुरु गुणमाल, ज्ञानपीठ रास है।
आखर मोती सरूप, ज्ञान-साधना अनूप
माता मीरां रा सपूत, पुरुषोत्तमदास है ॥

□

लोक साहित्य प्रतिष्ठान,
काळू (वीकानेर)

राजस्थानी गंगा 29

स्व. पुरुषोत्तमदास स्वामी

रामनिवास शर्मा

लू जोर सूं चालै ही । डील रो पसीनो आवण सूं पैली भाप वणनै उडै हो । छियां आप रो अस्तित्व वचावण खातर ठंडी जागा जोवै ही । हूं कमरै में बैठो-बैठो जीवण रा लारला पाना उथळै हो । पंखै री पून लू री भायली ही । इतै नै मोड़ो खड़खड़ायीज्यो । लिलाड़ माथै तीन सळ घालनै मोड़ो खोल्यो । भायलै नै देखर इचरज हुयो । वो मनै बोल्यो—‘अवार ई श्री नरोत्तमदासजी स्वामी कनै चालणो है । बां कनै सूं वनस्थळी में भरती करावण री जाणकारी लेवणी है ।’

‘थोड़ा पछै चालां तो कीं हरज है कांई ?’

‘नहीं, अवार ही सगळी वात पूछनै कागद नाखणो है ।’

हारनै उण रै सागै श्री नरोत्तमदामजी रै घरै गयो ।

स्वामी जी वनस्थळी सूं रिटायर हुयर आपरै घरै रैवण खातर थोड़ा दिनां पैली आया हा । उणां री पिरोळ खुली ही । जीवणै हाथ कानी कमरै में स्वामीजी ढोलियै माथै बैठा पढै हा । नमस्कार करने भरती संबंधी वातां करी । सगळी जाणकारी मिली । इतै नै घर मांय सूं बांसू मिलतो-जुलतो थोड़ी ऊंची काठी रो आदमी कमरै में आयो । नमस्कार करने पूछ्यो—‘आप कद पधारचा ?’

आपरै वडै भाई जियां ही होळै-सैक बोल्यो—‘काल । सगळा ठीक है नी ?’

थोड़ी ताळ वात करनै पाछा घरै आयग्या ।

आज उण वात नै याद करण खातर याददास्त रो दरवाजो वार-वार खोलणो पड़ै । श्री पुरुषोत्तमदास स्वामी आपरै वडै भाई श्री नरोत्तमदासजी स्वामी जियां ही दुवळा-पतळा थोड़ा पकै रंग रा हा । मितभाषी भी बिसा ई । आ मुलाकात दूसरी ही । पैली मुलाकात नवयुग ग्रंथ-कुटीर में स्व. श्री शंभूदयालजी सक्सेना साथै हुयी ही ।

आज जद बां सगळी वातां नै याद करां जणै मन में एक रिक्तता वण जावै । श्री शंभूदयालजी चल्या गया । नरोत्तमदासजी स्वामी भी चल्या गया अर चल्या श्री पुरुषोत्तमदासजी ही गया ।

रिटायर हुयां पछै श्री पुरुषोत्तमदासजी स्वामी उदयपुर छोडनै आपरै घरै आयग्या हा । नागरी मंडार अर शोध प्रतिष्ठान रै सभा-समारोहां में बराबर मिलणो हुवतो रैवतो ।

वां अेम. अेस-सी. तांई पढाई करी अर हिंदी में साहित्यरत्न हा। राजस्थानी सूं उणां रो घणो नेह हो। उणां री, केई वरसां पैली, आ इच्छा हुयी कै वडै भाई रा संपादित ग्रंथ जित्ता भी है सगळां नै प्रकाशित करवा दूं। आ सोचनै उणां अेक राजस्थानी पत्रिका चलावण री योजना वणायी। उण योजना रो साकार रूप 'राजस्थानी गंगा' है।

वृद्धावस्था, दुबळो-पतळो डील, बीमार सरीर पण स्वस्थ मन लेयर वै इण काम में अेकलव्य दांई जुटग्या। रात अर दिन अेक-सा कर दिया। आंधी देखी नां तावड़ो। लोगां सूं वरावर मिलणै अर 'राजस्थानी गंगा' सारू धन संग्रह करण सारू अेक कर्मठ युवक दांई इण अनुष्ठान में मिशनरी भावना सूं लागग्या। छाती वजर री करनै सगळा दुख सैवणा सारू कर दिया, पण मूढे माथै कदैई सल नई आवण दियो।

श्री पुरुषोत्तमदासजी व्याकरणाचार्य जियां शब्दां में मितभाषी हा, धन वासतै भी वियां ई मितव्ययी हा। मनै अेक वात याद आवै है कै मार्च में हूं लालगढ सूं स्कूल जावै हो। अेक वजण आळी ही। तावड़ो पड़ै हो। गेडियै रै सारै-सारै स्वामीजी जावै हा। म्हारै कनै छोटी गाडी ही। कनै जायनै गाडी ढाबी। नमस्कार करनै बोल्यो—'आप कठीनै पधारो हो ?'

'लालगढ जायर आयो हूं। घरै जाऊं हूं। अबार घड़ीक नै पूग जासूं।'

'म्हारै सागै चालो, अबार घरै छोड़ दूं।'

'आप पधारो, मनै कोई तकलीफ कोनी।'

'हूं स्कूल जाऊं हूं। आपनै घरै छोड़ देसूं। म्हारै कनै गाडी है।'

गाडी में बैठायर उणां नै घरै छोड़ दिया। पण हूं सोचतो रेंयो—उणां में कित्तो धीरज है, काम री कित्ती लगन है। गोडै में दरद है, चालण-फिरण में तकलीफ है, फेर भी लकड़ी रै सारै घूमै-फिरै अर सगळो काम करै है। काम रै पेटै कित्ती आस्था है, विश्वास है, लगन है। इसा लोगां नै देखां जणै मन सोचण नै मजबूर हुवै कै भिनख-भिनख में कित्तो फरक है। अेक आपरै स्वार्थ रै लारै लाग्योड़ो रैवै अर अेक सेवा में भागतो फिरै—नां तो जस री लिप्ता अर नां धन री चावना। अेक मिशन राखै, ध्येय राखै काम करण रो। भावना कित्ती ऊंची है, त्याग कित्तो वडो है। आज श्री पुरुषोत्तमदासजी स्वामी मौजूद कोनी पण उणां री प्रेरणा कायम है।

□

प्रिसिपल,

राजस्थान वाल भारती, बीकानेर

म्हारो अमरीका-प्रवास

पुरुषोत्तमदास स्वाभी

(1)

मैं 15 नवंबर, 1945 नै दोपारै रा दो वजी कराची बंदरगाह सू सजळ नयनां सू आपणी भारतभोम सू विदा ली । पूरा इक्कीस दिन मैं टारेंस नांव रै जहाज में विताया । ओ नावो में वण्योड़ो जहाज हो, जिकै नै अमरीका री सरकार युद्धकाल में उपयोग करणै वास्तै ले लियो हो । इण रो वजन करीब पन्द्रह हजार टण हो । युद्ध अबार-अबार ही समाप्त हुयो हो । अमरीका रा सिपाही घरै जावण नै घणा उत्सुक हा । इण जहाज में सगळी जागां इणां वास्तै राखी गयी ही, पण भारत सरकार रै अनुरोध पर इणां मांय सू पचास जागां भारत रै विद्यार्थियां नै दे दी गयी ही । उण पचास भाग्यशाली लोगां में हूं भी अेक हो ।

म्हारो ओ टारेंस जहाज रस्तै में खाली पोर्ट-सईद में केई घंटां रै वास्तै रुक्यो हो । अठै सू मैं भारत अपणै रिश्तेदारां अर मित्रां नै कागद लिखनै भेज्या । म्हांरी आ समंदर-यात्रा खूब आनन्दप्रद रैयी । अेक-दो दिन नै छोड़'र जद अटलांटिक (अशांत) महासागर में टारेंस प्रवेश करचो हो कदै ही समुद्री बीमारी मनै को संताई नी । म्हांरै केई दोस्तां नै आ यात्रा सगळा दिन वडी कष्टदायी रैयी । बै सरू सू अंत ताई जहाज रै अस्पताळ में ही रैया ।

उण दिनां जठै-कठै निजर पड़ती पाणी ही पाणी देखण में आवतो । केई दिनां ताई तो इसो दृश्य खूब चोखो लागतो पण पछै ओ कीं अखरण सो लागग्यो । अशांत महासागर में जद म्हांनै दूर सू अेजोर्स द्वीप रा दरसन हुया तो हृदय बांसां उछलण लागग्यो । जी करतो कै म्हे घरती माथै पग धरां पण ओ कद संभव हो ?

जहाज रै मांय म्हांनै यथेष्ट खावण नै मिलतो । इण रै अलावा कराची सू चालती बखत म्हारै मित्र श्री नरहरि वैद्य खावण रो पूरो समान म्हारै सागै कर दियो हो । इण वास्तै इण बारै में मनै कदैई कोई शिकायत नीं रैयी ।

जहाज यद्यपि सेना रै आदमियां नै लेजावण वास्तै ही हो, आ वात हुवता थकां भी उण में मनोरंजन री काफी व्यवस्था ही । सिनेमा री चालती-फिरती अर बोलती तसवीरां (मूवी) दिखावण रो प्रबंध भी उण में हो । इणरै अतिरिक्त अमरीकी सेना रा अफसरां विशेष रूप सू अेक वाद-विवाद समिति रो आयोजन करचो हो । इणरी बैठक रोजीनै

तीसरै प्रहर दो-तीन वज्यां हुया करती ही । उण में विभिन्न भारतीय अर अमरीकी प्रश्नां पर चर्चा हुया करती ।

टारेंस जहाज में शल्य-चिकित्सा रै वास्तै पूरो समान हो । जहाज में अेक अमरीकी सैनिक रै उंडुक शोथ (अपेंडिसाइटिस) रोग रो आपरेशन सफलतापूर्वक करीज्यो । इण वास्तै जहाज नै समंदर पर विना लंगर नाख्यां करीव-करीव स्थिर राखण में जहाज रै चालक अभूतपूर्व कौशल रो प्रदर्शन करचो । न्यूयार्क पूगणै सूं पैली बो सैनिक चोखो भलो-चंगो हुयग्यो हो ।

छव् दिसम्बर नै सिझ्या रा तीन वजी म्हांरो जहाज अमरीकन धरती रै कनै आ पुग्यो । दूर सूं स्वतन्त्रता देवी री मूर्ति रा दर्शन करनै जी खिल उठचो । मन में सोच्यो—कदै ही भारत माथै भी इण देवी री कृपा हुसी । इमिग्रेशन-सम्बन्धी कागदां री जरूरी खाना-पूरी में घणो वखत लागग्यो । अमरीकन भूमि माथै पग धरतां समै रात पड़गी ही । न्यूयार्क में सूरज सीयाळै रै दिनां में लगभग चार वजी छिप जाया करै है । कीं वखत चुंगी सम्बन्धी कार्यवाही में लाग्यो । होटल पूगनै विश्राम करतां रात आधी सूं घणी बीतगी ही ।

(2)

हूं अमरीका में करीव इकतीस महीनां ताई रैयो । इण अवधि में हूं वठै खूब घूम्यो-फिरचो । घणकरोक घूमणो रेल सूं ही हुयो पण वस अर कार रो भी उपयोग करणै में कोताही को वरती नी । अमरीका रै आधै सूं वेसी राज्यां नै घूम-फिरनै देख्या । न्यूयार्क, सेन-फ्रांसिस्को, शिकागो, सियेटल, लास-अंजेलस, सेंट लुई, क्लीवलैंड, डिट्रोइट, वाशिंगटन, पोर्टलैंड, लास वेगस, साल्ट लेक, सेंट पाल, मेडिसन, सिनसिनेटी, मिलवाकी, इंडियाना-पोलिस, कैसस, कोलंबस आदि प्रसिद्ध नगरां में कोई अछूतो नीं वच्यो ।

सन् 1947 रै गरमी रै दिनां में लगभग दो महीना मैं लास-अंजेलस नगर में रैयो । इण नै देवदूतां रो शहर कैयो जावै है । ओ संसार भर रो सगळां सूं विस्तृत नगर है । ओ 451 वर्ग-मील रै घेरै में फैल्योड़ो है । इण नै अगर कार सूं अेक सिरै सूं दूजै सिरै ताई पार करचो जावै तो 50 मील री यात्रा करणी पड़सी । लास-अंजेलस नगर में पाणी रो वितरण नळां द्वारा कोलेरेडो नदी रै बांध बोल्टर डैम री झील सूं लायनै करीजै है । आ झील मानव-निर्मित झीलां में सब सूं वडी है । अेक इसी ही वडी झील राजस्थान में उदयपुर कनै जयसमंद झील है । इण झील री गहराई 589 फुट है अर इणमें 33,500,000 अेकड़ फुट पाणी है । इणरै किनारै री लम्बाई 550 मील है । बोल्टर डैम नामक बांध री ऊंचाई 726 फुट है । ओ सबसूं ऊंचा बांधां मांयसूं अेक है । इण बांध अर विजलीघर रै वणावण में लगभग साढी इग्यारै करोड़ डालर लाग्या हा । अजकाळै (1987 में) अेक डालर कोई तेरह रुपियां वरोवर हुवै है । विजलीघर में पूगणै वास्तै बांध रै नीचै लिफ्ट सूं जावणो हुवै । नीचै जाणै री फीस करीव डेढ रुपियो है । साथै अेक पथप्रदर्शक रै व । बो सब वातां समझायनै बतावै ।

सिनेमा-संसार रो सब सूं प्रसिद्ध नगर हालीवुड लास अंजेलस रो ही भाग है। सिनेमा-जगत री विश्वप्रसिद्ध तारिकावां बेवर्ली हिल्स नांव रें उपनगर में रेंवै। हालीवुड बुलिवाड री छटा रात में देखतां ही वणै। उणनै देखनै वच्चन री आ ओळी सहसा याद आ जावै—‘दिन को होली, रात दिवाली, सदा मनाती मधुशाला’। अक तरचां अगर ओ कैयो जावै कै अमरीका रो प्रत्येक शहर रात नै जगमगाया करै तो कीं भी अत्युक्ति कोनी हुवै। हालीवुड में अक प्राकृतिक ऑफीथियेटर वणियोड़ो है जिकै नै हालीवुड बाउल (bowl) कैवै। अठै बीस हजार लोग बैठ सकै है। हालीवुड में ही च्यार बडी ब्राडकास्टिंग कंपनियां रें प्रशांत तटीय मुख्य स्थान है। अं च्यार कम्पनियां नेशनल ब्रोडकास्टिंग, कोलंबिया ब्रोडकास्टिंग, अमेरिका ब्रोडकास्टिंग अर म्युचुअल ब्राडकास्टिंग कारपोरेशन है। इणां री शृंखलावां सगळै देश में जठै-तठै फैल्योड़ी है।

लास अंजेलस सूं वाईस मील दूर प्रशांत महासागर में स्थित सांता कैटेलिना द्वीप छुट्टियां वितावण वास्तै अक आदर्श जागा है। अठै जहाज सूं ढाई घंटा में पूग्यो जा सकै है। हूं म्हारै मित्र राजेश्वरदयाल माथुर अर अक भारतीय सिंधी धलवानी परिवार रें, जिको अमरीका में ही वसग्यो हो, सदस्यां रें साथै बठै गयो हो। ओ द्वीप सताईस मील लांबो अर 7॥ मील चवड़ो है। इण में अक चिड़ियाघर है जिकै में उष्णदेशीय घणीसारी चिड़ियां है। बठै मोर नै देखनै म्हां लोगां नै घणी खुशी हुयी। बठै सूं नाव में बैठनै सील चट्टाणां नै देखणनै गया। बठै हजारूं सील मछल्यां मिलै।

लास अंजेलस में केई दर्शनीय जागां देखण नै मिलै। अक्सपोजिशन पार्क नै देखनै तो तुलसीदासजी री आ उक्ति वरवस याद आ जावै—‘अवसि देखिये देखन जोगू’ अठै 120 जात्यां रें गुलाब रा करीब 15000 पेड़ है। दूसरो दर्शनीय स्थान ग्रिफिथ पार्क में वेधशाला अर प्लेनेटोरियम है। इण में गोलाकार छत पर लाग्योड़ै रजत-पटमाथै सिनेमा फिल्म द्वारा ग्रहां री जागां, आकार अर उणां री गति पर प्रकाश नाख्यो जावै है। इणी ग्रिफिथ पार्क में झूलै माथै अक अमरीकन महिला रें आपरै टावर नै भुलावण रो दृश्य मन नै सहसा अपणै कानी आकर्षित कर लियो। ओ दृश्य घणो चोखो लाग्यो। साथै कैमरो हुयां सूं उणरो फोटू भी खांच लियो।

(3)

नेवादा राज्य रो लास वेगस नगर छोटो अर स्वच्छ हुवण सूं काफी आकर्षक लाग्यो। नेवादा राज्य में हर कठै ही खुलै आम जूवो खेलीजै, हर जागां आप नै स्लोट मशीनां मिलसी जिकां नै देखनै आप पइसा नाखनै वेसी रुपिया पावण रो लोभ संवरण कोनी कर सको। मैं भी कीं पईसा इणां में नाख्या हा। अक-दो बार दूणा-तिगणा दाम मिल भी गया। म्हारै मित्र श्री माथुर सौ डालर रें ऊंचै इनाम वास्तै केई मशीनां में उणसूं वेसी डालर नाखनै स्वाहा कर दिया। लास वेगस नगर सूं बस द्वारा बोलडर सिटी नै जावै जठै सूं बोलडर डैम नेड़ो रेंवै। नेवादा राज्य में तलाक रा नियम बडा आसान है।

यूटा राज्य की साल्टलेक नगरी भी स्मरणीय है। अठे नमक की बहोत बड़ी झील है। इण में न्हावण वास्तै घणा-सारा लोग आवै। झील रै पाणी में लूण की मात्रा 27% है। इण की आ खूबी है कै इण में कोई आदमी डूबै कोनी। इण वास्तै जिकै व्यक्ति नै तिरणो नीं आवै वो उठै बखूबी तिरणो सीख सकै है। डूवण रो तो कोई खतरा है ही कोनी। म्हे भी इण झील में काफी देर तांई तिरता रैया। साल्टलेक नगरी में हीमार्मन लोगां रो मिंदर है जिको घणो खूबसूरत बणियोड़ो है। मिंदर रै बणावण में चाळीस बरस लाग्या हा। इणरै कनै ही टेवरनकल है जिणरी छत गोळाकार बणी है। इण में आठ हजार लोग बैठ सकै है। ओ इण भांत बणयोड़ो है कै आंगण में पिन रै गिरणै की आवाज भी दूर सूं दूर बँठचोड़ै आदमी नै सुणीज जावै है। साल्टलेक यूटा राज्य की राजधानी है। जद म्हे बठै पूग्या तो यूटा राज्य रो शती-समारोह मनायीजतो हो। यूटा नै अमरीकन फेडरेशन में सामल हुयां सौ बरस बीत चुक्या हा। साल्टलेक नगरी कनै थोड़ी दूर माथै तांबै की खाणां है।

न्यूयार्क नै तो विश्व की राजधानी बणनै रो सौभाग्य मिल्योड़ो है। ओ बहोत ही घणो बस्योड़ो नगर है। ओ अमरीका रो सबसूं बड़ो नगर है। न्यूयार्क रो सबसूं मुख्य भाग मैनहैटन द्वीप है। ओ अमरीका रै आदिम निवासी लाल-भारतीय (रेड इंडियन) सूं चौईस डालर में खरीदचो गयो हो। ओ आशूण में हडसन, जिकै नै उत्तरी नदी (नार्थ रिवर) कैवै है अर अगूण में ईस्ट रिवर सूं घिरियोड़ो है। हडसन अशांत महासागर में जायनै मिलै।

न्यूयार्क की दर्शनीय जागां में स्वतंत्रता देवी की मूर्ति रो जिक्र करचो जा चुक्यो है। आ डेवलो द्वीप में स्थित है। आ 51 फुट लांबै अर 156 फुट ऊंचै प्लेटफार्म पर बणयोड़ो है। लिफ्ट में बँठनै बालकनी तांई पूगीजै। उण सूं ऊपर जावण वास्तै घेरैदार पनोथिया बणयोड़ो है जिका मूर्ति रै सिर तांई ले जावै। न्यूयार्क की दूजी देखण-जोग जागा अंपायर स्टेट इमारत संसार भर रो सब सूं ऊंचो भवन है। इण की ऊंचाई 1248 फुट है। इण में 102 तल्ला है। इण भवन में इती जाग्यां है कै 80,000 व्यक्ति इण में रैय सकै है। इणरै ऊपर पूगनै न्यूयार्क नगर रो विहंगम दृश्य घणो मनोरम लागै। नीचै सड़क माथै चालता आदमी बहोत ही छोटा बावनियां ज्यूं मालम पड़ै। न्यूयार्क की ब्राडवै सड़क घणी सोवणी लागै। न्यूयार्क की और दर्शनीय जागां में सेंट्रल पार्क, बाल स्ट्रीट, टाइम्स स्क्वायर, मेडिसन स्क्वायर, गार्डन हेडन, प्लैनेटोरियम आदि है। टाइम्स स्क्वायर की छवि रात नै देखतां ही बणै। अठै खबरां रा शीर्षक चक्कर खावती बिजली द्वारा दिखायीजै। न्यूयार्क रो सबसूं मशहूर होटल बालडोर्फ अस्टोरिया है।

न्यूयार्क रै समुद्री तट माथै कोनी द्वीप नै देखनै बंबई की चौपाटी रो दृश्य की-कीं याद आ जावै। अठै लोग रेली माथै लेटनै धूप-स्नान करै। कोनी द्वीप में मनोरंजन रा तरह-तरह रा साधन मौजूद है। बठै पूगनै तबियत बेगी पाछो जावण की नीं करै। बठै पूगणै वास्तै सर्वोत्तम साधन जमीन रै मांथ चालणै वाली रेलगाड़ी है। ब्रुकलिन में आ घरां की छतां की ऊंचाई तांई चालै। न्यूयार्क रै प्रसिद्ध नियागरा-प्रपात की शोभा तो विश्वविख्यात है।

म्हारो घणो वखत ओहायो राज्य रै कोलंबस नगर में वीत्यो । ओ शहर ओहायो राज्य री राजधानी है । ओ सीयोटो अर ओलंटेजी सरितावां रै संगम माथै वस्योड़ो है ।

मिसूरी राज्य रै सेंट लुई नगर री प्राणिशाला में राजस्थान रै सुपरिचित जिनावर—
ऊंट नै देखनै घणी खुशी हुई । वीकानेर रै महाराजा रायसिंह रो उण अवस्था रो स्मरण हुयो जद उणां परदेस में फोग नै देख'र ओ दूहो कैयो हो—

तू सैं देसी रूखड़ो, म्हे परदेसी लोग
म्हानै अकबर तेड़िया, तू कत आयो फोग ?

मनै अमरीका में यलोस्टोन नेशनल पार्क, पोर्टलैंड नगर, मिसिसिपी नदी, बोल्डर बांध, ओहायो राजकीय विश्वविद्यालय रो परिसर, वाशिंगटन री ट्राम-गाडचां, न्यूयार्क री तेज भूगर्भ-रेल अर नियागरा प्रपात खूब आछा लाग्या ।

(4)

अमरीका रो ग्राम्य-जीवन भी देख्यो । ओ घणो दाय आयो । गांवां में भी वै ही सुविधावां मिलै जिकी नगरां में प्राप्य है । भीड़-भड़क्को बठै कम है । आळस रो तो बठै नामनिशाण को देख्यो नी । म्हारै अक किसान-मित्र अडगर वेग मनै उणरै अठै आयनै कीं दिन वितावण रो नूतो दियो । मैं इण नूतैं नै घणी खुशी सूं स्वीकार करचो । आपरै अक भारतीय मित्र शांतिलाल जैन रै सागै हूं उणरै अठै कोलंबस-ग्रोव गयो । उणां अर उणां री धर्मपत्नी श्रीमती (अवै स्व.) अस्थिर वेग बडै प्रेम सूं स्वागत करचो अर भोजन करायो । म्हे दोनूं उणां रै अतिथिघर में ठहराया गया हा । सियाळै रा दिन हा । जद म्हे सोवण वासतै उण कमरै में पूस्या तो देख्यो कै उणनै गरम करणै रो बठै कोई साधन को होनी । घणो अचूंभो हुयो । अमरीका में विना गरम क्रियां किणी जागां में ठंड रै दिनां में सोवणो मौत नै बुलावण सूं कम कोनी हुवै । मैं म्हारै दोस्त जैन सूं हंसनै कैयो—शायद अमरीका में पावणां नै ठंडी जाग्यां सोवण खातर देवण री रीत है, जिकै सूं बो फेर पावणो वणनै आवण रो दुस्साहस नीं करै । म्हे दोनूं जणा उण कमरै में सोया अर सुखद अचरज री बात तो आ है कै म्हानै ठंड बिलकुल नीं लागी । कमरो गरमी अर सरदी सूं चोखी तरै सुरक्षित वण्योड़ो हो ।

अमरीकन लोगां रै आतिथ्य नै देखनै मनै दांता नीचै आंगळी दवावणी पड़ती ही । आपां रो देश भारत इण दिशा में सब सूं आगै मानीजै पण मैं देख्यो कै आपां नै इण तरफ भी अमरीका सूं घणो सीखणो है । वेग-दंपति अर उणरा दो वच्चां—जोन अर बिल रो कुटुंब रै व्यक्ति सरीखो म्हारै प्रति आचरण मनै सदा याद रैसी ।

अमरीकन लोगां रो निष्कपट व्यवहार अर मात्र दिखाऊ शिष्टाचार रो अभाव उणां सूं घुलणै-मिलणै में सहायक हुवै । उणां सूं वातां करणै वास्तै किणी दूजै व्यक्ति द्वारा परिचय दिरीजणै री जरूरत कोनी हुवै । उणां री स्पष्टवादिता मनै आछी लागी । मीठी वातां कैयनै टाळनै री प्रवृत्ति उणां में मैं को देखी नी । म्हारो केई अमरीकन परिवारां

साथै घनिष्ठ संबंध रैयो है। श्रीमती कोरा राइन हार्ट रै अठै हूं किरायो देयनै अतिथि रूप में लगभग दो वरस ताई रैयो। उणां मनै सदा ही बेटे ज्यूं मान्यो। म्हारो परिचय बै सदा दूजां नै म्हारो भारतीय बेटो कैयनै देवती ही। हूं सदा उणां नै आपरै कागदां में अमरीकन माजी सूं संबोधन करतो रैयो हो। उणां थोड़ो कीं वीमार पड़्यां जिण तरै सेवाशुश्रूषा करणै में तत्परतां दिखायी बा मै कदैई नीं भूल सकूं। शिकागो में डालर शेष हुय जावणै पर टेलीफोन द्वारा खबर करतां ही तुरंत तार सूं आवश्यक रकम भेजनै जिण विश्वास अर स्नेह रो उणां परिचय दियो वो मनै सदा याद रैसी। त्यूहारां रै मौकां माथै भेंट वगैरा रो आदान-प्रदान इण अमरीकन परिवारां अर म्हारै बीच हुवतो रैवतो। कप, गोर्डन, राइन-हार्ट, जेकव्सन, मैकोमिक अर बैग परिवार रा व्यक्ति मनै सदा ही आपरै कुटुंब रो आदमी मानता हा।

मन केई सभा-संस्थावां में विचार-विमर्श रो अवसर भी मिल्यो। भारतीय समाज, धर्म अवं राजनीति सम्बन्धी विषयां माथै अमरीकन लोगां री घणी रहि है। अवश्य ही बै इणां बावत कम जाणै पर और बेसी जाणनै खातर काफी उत्सुक मालूम पड़ै। मनै अेक संस्था में हिंदू धर्म पर भाषण देवण रो मौको मिल्यो। भाषण रै पछै अेक महिला-श्रोता सूं आ वात सुणनै मनै घणो अचूंभो हुयो कै बै उण वखत ताई आ समझ बैठी ही कै हिंदू धर्म ईश्वर नै को मानैनी— किमाश्चर्यमतः परम्।

अमरीकन टावर माईतां माथै घणा निर्भर नीं रैवै। धन कमावणो भी बै छोटी ऊमर सूं ही सरू कर देवै। उणां री आ वात मनै आछी लागी।

जठै इतरा आछा अनुभव मनै हुया वठै कीं कड़वा अनुभवां रो भी मनै सामनो करणो पड़्यो। केई लोग धर्म रै मामलै में काफी अनुदार मालूम हुया। उणां रो विश्वास, ओ मालूम पड़्यो, है कै निर्वाण रा अधिकारी मात्र क्राइस्ट रा अनुयायी ही हुय सकै है। इणरो विरोध करणै रै कारण मनै अेकर म्हारै रैवण रो कमरो खाली कर देवणो पड़्यो। वाशिंगटन में वस में बैठनै स्टेशन पाछी आवतां वखत अेक अमरीकन वृद्धा नै ओ जाणनै दुःख हुयो कै हूं ईसाई नीं हूं अर इण कारण मोक्ष रो अधिकार मनै कोनी। शिकागो में बटुवै रो अर लास वेगस में घड़ी रो खो जावणो अेक-दो इसी दुःखद घटनावां है पण इणरी संख्या नगण्य है।

चरित्र रै लिहाज सूं घणा-सा लोग अमरीका रै लोगां नै निम्न कोटि रा मानै पण हूं इण सूं सहमत कोनी। उणां चरित्र रो जिको मापदंड वणा राख्यो है, उण सूं बै शायद ही च्युत हुवता हुसी। हां, अपवाद री वात न्यारी है।

जळवायु री दृष्टि सूं अमरीका रो कैलिफोर्निया राज्य आछो है। वठै सूर्य भगवान रा दरसन लगभग रोजीनै ही हुवता रैवै। रहण-सहण रै लिहाज सूं मध्य-पश्चिम रा राज्य सस्ता पड़ै। इणां रो जळवायु काफी ठण्डो रैवै। सीयाळै में तापमान—20° फारेनहाइट ताई केई जागां पूग जावै है।

अमरीका नै छोडती वखत आनन्द अर दुःख दोनू ही हुया । खुशी स्वदेश पाछो आव्णरी अर दुःख अमरीकन धरती अर उण रै लोगां नै छोडणै रो । 16 जुलाई, 1948 रै दिनूगै क्वीन अलिजाबेथ जहाज न्यूयार्क नगर सूं साउथहैपटन री कानी प्रयाण करचो । सजळ नेत्रां सूं अमरीकन भोम सूं विदाई ली । 21 जुलाई नै लंदन पूग्यो अर वठै करीब अेक महीनो ठहरनै वायुयान सूं 28 अगस्त नै भारत री धरती पर पग धरचो । जद तांई भारत स्वाधीन हुय चुक्यो हो ।

□

संत-सुभाव

उदयवीर शर्मा

३५

संतां री जग-जातरा, सुगणी सदा सुरंग
मिनखपणो जागै खरो, वाजै इमरत-चंग 1

संतां री जग-जातरा, मेटै सकल विकार
जागै सत री साधना, समरस इमरत-धार 2

संतां री कीरत-कथा, इमरत रूप अपार
कथै-सुणै जग चाव सूं, थरपै जीवण-सार 3

करड़ी जीवण-साधना, जग-जंजाळ अनंत
मुळक मगन हुय जो करै, सो ज्ञानी जन संत 4

सत, रज, तम तीनूं मिला, करता रचियो जाळ
ज्यूं सुळझायो उलझियो, संतां लियो संभाळ 5

माया में भटकै मिनख, भूलर कुळ री रीत
धरम-करम सब छोडिया, गावै अवंळा गीत 6

संसारि माया रम्या, जीवतड़ा बेजान
रस वरसावै रामजी, पीवै संत सुजान 7

गुरु दरसायो जगत-पथ, समझायो जग-रीत
सौनै रो सूरज उग्यो, पायो ज्ञान पुनीत 8

□

—राजस्थान साहित्य समिति
विसाऊ (राजस्थान)

दूहा-इक्कीसी

नागरमल सहल

ओलखाण कवि री हुवै,
जद आपो नीं याद
बिन डूव्यां चितराम में,
नीं कविता रो स्वाद 1

भजण जीव टाळो करै,
करतां आज-र काल
कदै न निवडै काम अैं,
समझ काळ री चाल 2

महाजन रो मतळव अवै,
धनपति जाण कुवेर
पइसां री महिमा घणी,
कर दी चोट अवेर 3

ध्यान रात-दिन जगत रो,
पूजा करै छिनेक
ईश्वर नीं भोळो इतो,
राखो तनिक विवेक 4

मूळ धरम रो अेक है,
डाळी - पात अनेक
बिना मूळ संभाळ रैं,
हरी डाळ नहं अेक 5

आज सियाळो है सही,
होसी काल वसंत
मौसम रैंव वदळतो,
दुख क्यूं फेर निरंत ? 6

मनमोहक सुख भोग रो,
 माया खींचणहार
 डोलर - हींडा हींडतां,
 खावै सिर पर मार 7

दरपण साफ हुया विना
 नीं चिलकै प्रतिबिंब
 विन आतम निरमळ हुयां,
 धुंधळो दीखै बिंब 8

अणविवेक, जोवन, सता
 करै नरां नै अंध
 अंकुश विना विवेक रै,
 फैल जाय दुरगंध 9

देस-भगत रो भेस धर,
 फैलावै जंजाळ
 स्वार्थ सूं वढ देस नीं,
 करचां जाय पंपाळ 10

कोई धरम वुरो नहीं,
 अड़भिड़िया संप्रदाय
 नाम धरम पण स्वार्थी,
 उलटो-सुलटो खाय 11

आडंबर, छापा-तिलक,
 है या मन री हूंस
 जप सूं हुवै नचीत मन,
 जदै मिटे काळूस 12

रे मन ! टाळचां हरिभजन
 औसर जासी चूक
 चाल रुकै नीं काळ री,
 मत उठवा दै हूक 13

बुरा मिनख मिल बैठकर,
 तिकड़म करै अनेक
 गळो दबोचै न्याय रो,
 उलटा पासा फेंक 14

धन री होवै तीन गत,
 दान, भोग अर नाम
 देय नहीं, भोगै नहीं,
 उणरी कदै न आस 15

प्रेमी हार न मानवै,
 जस वृद्धता जलाल
 टेढो-मेढो प्रेम-पथ,
 डरा सकै नीं काल 16

अपरिग्रह उपदेश पण,
 है प्रभाव विपरीत
 जाणै सै भूँडो-भलो,
 चालै उलटी रीत 17

वकील मानो कतरणी,
 करै न अपनी काट
 विच में आवणिया कटै,
 पइसां री है चाट 18

धन री गरमी जावतां,
 मिनख घणो वेहाल
 छिन में क्यूँ-रो-क्यूँ वणै,
 दीखै दूजी चाल 19

तीरथ, तप, सत, यज्ञ, जप,
 है सगळा वेकाम
 जे पवित्र मन सौ टका,
 होवै धन्य सुनाम 20

धन हाथां रो मैल है,
 धन अखूट संतोष
 दुनिया में संतोष विन,
 दुरगत लूटाखोस 21

□

— वासंती, हाइकोर्ट कोलोनी, जोधपुर-342 001

पदमै चारण री वात : अेक विवेचन

मनोहर शर्मा

राजस्थान री केई वातां (कहाणियां) आकार में घणी छोटी है, पण इण छोटी वातां में अनेक घणी रोचक नै महत्त्व री है। पदमै चारण री वात इणी भांतरी है। उणरो मूळ-पाठ इण प्रकार रो है—

गुजरात मांहै सिधराज जेसंघदे राज्य करै। मारवाड़ मांहै पदमो चारण रहै। सु मारवाड़ मांहै मेह न हुवो। ताहरां पदमै विचारीयो, कबीलै क्यूं करि टंवै ? ताहरां दीठो सिधराजा आगि जाईजै। ताहरां वहिल जोगडी, सखरा विछावण करि वहिल वैंसिनै पदमो चारण गुजरात नूं हालियो।

नेउरो गांव छै। नडै रो तळाव छै। सु झोंटीगा आगा वसण न पावै। तठै पदमो चारण ओध जाइ नीसरियो। ताहरां पदमो यंत्रचारी करण लागो। सु भूत बैठो हुतो, आवतो दीठो। ताहरां जाणियो—ईयै नूं मारीस, ईयै मारिग क्यूं आयो ? आज लग मारिग ईयै कोई वहतो नहीं, म्हांहूं बीहतो। अर ओ मनुष्य कठा सू आयो ? ज्यूं नेड़ो आयो, सु आलाप सुणि अर राजी हुवो। बैठो राग सुणण लागो। मारण री वात वीसरि गई।

वहिल आधी हाली, ज्यूं वांसै हूवो चालियो। यंत्र हेठो मेल्हियो, ताहरां भूत मनुष्य रूप करि आइ राम-राम कीयो। पूछियो—‘तूं कुण छै ?’ कह्यो—‘जी, हूं चारण छूं।’ ‘यंत्र तूं हीज वजावतो ?’ तो कह्यो—‘अेक वार यंत्र वजावो, आलापचारी करो।’ ताहरां चारण बोलियो—‘आवो, ऊंचा वैंसो।’ ताहरां भूत वहिल बैठो।

चारण यंत्र पकड़िनै आलापचारी करण लागो। ताहरां भूत बहुत राजी हुवो। ताहरां भूत बोलियो—‘तूं मोनूं ओळखै छै ?’ कह्यो—‘जी, जाणूं छूं। साहिवजादो छै।’ कहियो—‘हूं भूत छूं।’ ताहरां पदमो बीहण लागो। भूत कह्यो—‘तूं बीह नां। हूं तोनूं निहाल करीस। हालो, म्हे गुजरात आविस्यां।’

ताहरां भूत पदमै रै साथै हालियो छै। गुजरात अणहिलपुर पाटण जाइ पहुंचा छै। ताहरां पदमो बोलियो—‘हूं तो गांव मांहि डेरो करीस। भूत बोलियो—‘हूं वाग में रहीस। तूं मो कन्है दोपहरि आयो करै। यंत्र वजाइनै पछै जीमै।’

हिवै पदमो राजा रो मुजरो करि भूत कन्है आवै, यंत्र वजावै। पाछलै पोहर डेरै आवै। हिवै भूत लागै लोकां नूं। ताहरां पदमो आवै, यंत्र वजावै। मांगै जितरो ले,

ताहरां भूत उतरै । वरस अक रह्या । द्रव्य भेलो कीयो । हिवै घर यादि आया । राजा सूं विदा करि चारण भूत नूँ कह्यो— हालो । ताहरां हालिया छै ।

आवतां-आवतां सागी नडै रै तळाव आया । ताहरां भूत पदमै राम-राम किया । भूत वहिल सूं उतरि नडै बैठो । पदमो आघो हालियो । ताहरां भूत दूहा कहै—

दिहाड़ा रो दिलार, पदमै सूं पाटण गया ।

बीजा बीजी वार, निगमिस्यां बैठा नडै ॥ १ ॥

ओ इस नडो निवाण, ओ इस कौडो नेउरो ।

ओ मो आही ठाण, ओ बोळावो सजणां ॥ 2 ॥

वात इती सी ही है । आधुनिक सरल राजस्थानी में इणरो सार इण भांत है—

गुजरात में जद सिद्धराज राज करतो हो उण वखत मारवाड़ में पदमो नांव रो अक चारण रैवतो हो । अकर मारवाड़ में विरखा नीं हुयी जद पदमै सिद्धराज रै कनै जावण रो निश्चय करचो । उण आपरी वहली जोती अर गुजरात कानी दुरग्यो । मार्ग में नेउरा नांव रो गांव आयो । उणरै कनै ही अक तळाव हो जिणमें भूतां रा डेरा हा । उणारै डर सूं बठै कोई कोनी जाया करतो, पण पदमो आपरो यंत्र वजावतो आणंदपूर्वक जा रैयो हो ।

भूत सोच्यो— ओ कुण है जिको इण पासी सूं आ रैयो है ? इण नै अवार मार नाखूं । पण जद भूत पदमै रै कनै पूग्यो जणै वो उण रै संगीत माथै मुग्ध हुयग्यो अर उण नै मारणै री वात भूलग्यो । ज्यूं-ज्यूं वहली आगै चालती त्यूं-त्यूं भूत उण रै लारै लाग्यो चालतो रैयो । जद पदमै यंत्र नीचै राख्यो तो भूत उण रै सामनै मिनख रूप में प्रकट हुयनै बोल्यो— थांरो यंत्र वजावो अर गावो । जणै चारण उण नै भी आपरी वहली माथै बैठा लियो अर संगीत सुरू करचो । इण सूं भूत खूब राजी हुयो ।

जद भूत आपरो परिचय दियो तो चारण डरण लाग्यो । भूत उणनै समझायो कै तूं डर मती । तूं तनै निहाल कर देसू । पदमै रै सागै भूत ई गुजरात आयग्यो । वै अणहिलपुर आ पूग्या । बठै पदमै शहर में डेरो करचो जद कै भूत नगर सूं वारै अक वाग में ठैरग्यो । भूत पदमै नै कैयो कै तूं रोजीनै दोपारै रा म्हारै कनै आ जाया कर अर गाणो सुणाया कर । पछै खाणो खाया कर । पदमै उणरी वात मान ली ।

भूत नगर रै लोगां रै सिर चढतो अर पदमो आयनै यंत्र वजावतो जणै वो उतर जावतो । इण वासतै पदमो मूढ़ें-मांग्यो धन लोगां कनै सूं ले लेवतो । इण भांत चारण कनै मोकळो धन भेलो हुयग्यो जणै उणनै घर याद आयो । लगै-टगै अक वरस पाटण में रैयनै वो भूत रै सागै पाछो आयग्यो ।

मारग में भूत रो निवास-स्थान आयो जणै वो वहली सूं नीचै उतरनै बठै ठैरग्यो अर पदमो आगै चाल पड़्यो । भूत पदमै रै संगीत नै याद करतो रैयो ।

इण वात में मात्र दो पात्र है । उणां में अक मानव अर दूजो अति-मानव अर्थात् भूत । भूत में अलौकिक शक्ति है पण फेर भी उण में मानवीयता जाग उठी । वो संगीत-प्रेमी है

अर कळा पर मुग्ध हुयनै आपरी क्रूरता नै भूल जावै है। वो आप री अलौकिक शक्ति सूं कलाकार नै निहाल कर देवै है। इण भांत उण में मानव अर अति-मानव दोनों रूपां रो अकीकरण प्रकट हुवै।

असल में इण बात में संगीत-कला री महिमा प्रकट करी गयी है। इण विषय में 'सयणी चारणी री बात', 'भृंग तमाइची री बात', 'राव तीडै री बात' जिसी बातों रा नांव लिया जा सकै है। इण सूं लागै कै इण प्रदेश में संगीत रै प्रति जनता री विशेष अभिरुचि रैयी है। लोक-कथावां में वीणा वजावणआळी वहू री कहाणी भी उल्लेखकरण-जोग है। राजस्थान ऊपर सूं सूको अर फीको-सो लागै पण भीतर सूं ओ बडो सरस है। अठै संगीत संबंधी अनेक ग्रंथ लिख्या गया है। राग-रागण्यां सूं संबद्ध चित्रां री तो गिनती ही नीं है। इण सूं राजस्थान रो कळा-प्रेम सहज ई स्पष्ट हुय जावै है।

उपर्युक्त बात रै साथै ही आपां रो ध्यान पदमसी नांव रै राजपूत री मौखिक कहाणी माथै चलयो जावै है। कहाणी रो सार इण भांत है—

किणी गांव में पदमसी नांव रो अेक राजपूत रैया करतो हो। वो खेती करने आपरो गुजर चलावतो हो। अेकर खेत में फसल आछी खड़ी ही, इण वासतै खाळा खातर पदमसी रात नै बठै ही सोवणो सुरू कर दियो। संजोग इसो हुयो कै अेक भूत अेक रात में नारी रूप धारण करने उण रै साथै ई आयनै सोयग्यो। पदमसी री आंख खुली जद उण देख्यो कै उण युवती रै रूप-सौंदर्य में उतार-चढ़ाव हुय रैयो है। इण सूं वो समझ्यो कै आ सगळी प्रेत-लीला है। फेर तो उण प्रेत नै ललकारयो। अवै प्रेत आपरै असली रूप में प्रगट हुयग्यो।

इणरै पछै प्रेत अर राजपूत में युद्ध छिड़ग्यो। इण में कदैई राजपूत नीचो पड़तो तो कदैई भूत। छेकड़ वीर राजपूत भूत नै छका दियो अर वो भूत री छाती माथै जा बैठयो। अवै भूत धवरायो अर दीनता सूं गिड़गिड़ावण लागग्यो। पदमसी उण नै इण शर्त माथै छोड़यो कै वो जलमभर उण री सेवा-चाकरी करतो रैसी। भूत आ शर्त मंजूर कर ली अर राजपूत रो चाकर वणनै उण रै सागै ही रैवण लागग्यो।

पदमसी रै खेत अर घर रो काम मानव रूप धारण करने भूत ई करतो। रात हुवो चाव दिन, जद कदैई राजपूत रो जिसो हुकम हुवतो भूत तत्काळ उण रो पालण करतो। कीं वखत वीत्यो अर अेक साल उण इलाकै में मेह नीं हुयो। काळ री हालत में पदमसी परदेस जावण रो विचार करयो तो भूत ई सेवक रै रूप में उण रै साथै चाल पड़यो।

वै दोनूं पाटण पूग्या। अवै भूत रो तो ओ धंधो हो कै वो धनवान लोगां रै सिर माथै चढ़ जावतो अर पदमसी खूब-सारो धन लेयर उण व्यक्ति रो इलाज करतो। इण भांत अेक वरस पाटण में रैयनै पदमसी धनो ई धन भेलो कर लियो अर पछै वै आपरै गांव पाछा आयग्या। बठै आयनै भी जितै ताई पदमसी जीवतो रैयो, वो भूत सदा ई उण री चाकरी में लाग्यो रैयो। छेकड़ जद पदमसी रो निधन हुयो जद भूत उणरै घर नै छोडर आप रै थान-मुकाम गयो।

स्पष्ट ई आ कहाणी अर ऊपर आळी वात दोनां में अेक ही चीज रा दो रूप है। राजस्थानी वातां में वडी संख्या राजपूत-जीवण सूं संबंध राखै, पण घणकरीक वातां में चारण भी उणां रै साथै ही चित्रित करीज्या है। केई वातां स्वतंत्र रूप सूं चारण-जीवण रै विषय री ई है। 'जोगराज चारण री वात' अेक इसी ई वात है।

ऊपर आळी वात रो प्रधान पात्र पदमो चारण है, जिको खेती सूं आप रो गुजारो करै। विशेषता आ है कै वात रो भूत संगीत पर मुग्ध हुयनै चारण नै आप री चतुराई सूं निहाल कर देवै है तो कहाणीआळो भूत लड़ाई में हारनै राजपूत री जिदगी-भर चाकरी करै। वो आप रै प्रण रो पक्को अर स्वामि-भवत है। इसी स्थिति में वो भूत ई प्रतीत को हुवै नी। दूजी केई वातां भी इसी है कै जिणां में राजपूत सूं भूत पराजित हुवै है। मांडणसी, सिखरो आदि राजपूतां सूं संबंधित वातां में इण भांत ही हुयो है। इण सूं प्रगट हुवै कै जनता में भूत-प्रेतां रै अस्तित्व में विश्वास रैयो है तो महावीर राजपूतां री असाधारण शक्ति में भी पूरी श्रद्धा रैयी है।

इण कथा रो उत्तर भाग दोनूं जाग्यां अेक-जिसो है, पण उण रै पूर्व-भाग में आ समानता कोनी। इण भिन्नता रो कारण प्रधान पात्र रो जाति-भेद है। राजपूत कनै आप री भुजावां रो पराक्रम है, चारण रै कनै उण री कळा री शक्ति। ध्यान राखणो चाहीजै कै इण अंतर रै कारण ही कथानक रै प्रारम्भ में घटना तथा वातावरण बदळग्यो है। इसी स्थिति में इण विषय में निश्चयपूर्वक कीं नीं कैयो जा सकै कै इण दोनां में मूळ-कथा कुण-सी है अर उण रो रूपांतर कुण-सो है। कथा-रचना री आ विशेषता घणी महत्वपूर्ण है।

□

—19, कैलास निकुंज, रानी बाजार
वीकानेर-334 001

वर दा

(त्रैमासिक शोध पत्रिका)

संपादक

डा. मनोहर शर्मा

डा. उदयवीर शर्मा

मूल्य 25 रु. वार्षिक

संपर्क

राजस्थान साहित्य समिति

बिसाऊ (राजस्थान)

फूफी रासो

बद्रीदान गाडण

राजस्थानी साहित्य री प्राचीन काव्य-परम्परा में किणी घटना विशेष अथवा व्यक्ति विशेष रै संबंध में वर्णन करण वास्तै 'रासो' अथवा 'रासा' शब्द रो प्रयोग करीजतो रैयो हो, जियां—पृथ्वीराज रासो, वीसलदेव रासो, खुमाण रासो, कायमखां रासो, इत्यादि अत्यंत उत्कृष्ट कोटि रा काव्यग्रंथ 'रासो' नांव सूं लिखिया गया है वठै ही लोकानुरंजन री सरल अर लघु काव्य-रचनावां भी 'रासो' नांव सूं समय-समय पर कवियां करी है, जियां में 'फूफी रासो', बाण्यां रासो' आदि केई रचनावां घणी लोकप्रिय, बोधगम्य अर रोचक हुवण सूं लोगां रै कंठाग्र रैयो है। प्रस्तुत 'फूफी रासो' इणी कोटि री अेक रचना है। आ रचना लेखक आपरै वचपण सूं आज ताई केई व्यक्तियां सूं सुणी है, किन्तु संपूर्ण रूप में नीं। हाल ही में इणरी अेक हस्तलिखित प्रति श्री भोजराजसिंह रै सौजन्य सूं प्राप्त हुयी है जिन में प्रारंभिक 15 दूहा अर मूळ 'फूफी रासो' रा सैतीस छंद है। हुय सकै है कै आ भी अपूर्ण हुवै। लोकमुख सूं सुण्योड़ा दूजा छव छंद इण साथै और भी सामिल कर दिया गया है।

प्रस्तुत 'फूफी रासो' रा रचयिता श्री मुरारिदास किसनावत वारठ हा। मिडपी सांभर सूं मात्र तीन कोस उत्तर-आश्रूण री कानी अवस्थित है। श्री मुरारिदास रै जनम तथा निधन रै समय रो कीं व्यीरो को मिलै नी।

रचना रो विषय सांभर रो युद्ध (जिको सन् 1708 ईस्वी में हुयो हो) है। इण युद्ध में मेवात रै फौजदार सैयद हुसैन खां, आंवेर रै फौजदार गैरतखां अर सैयद इज्जत खां भाग लियो। रविवार दिनांक 3 अक्टूबर, 1708 नै भयानक युद्ध हुयो जिन में राजपूत परास्त हुयनै भागग्या अर सैयदां राजपूतां री सगळी संपत्ति माथै अधिकार कर लियो। जिन वखत शाही सेना विजयोल्लास में मगन ही, सैयद हुसैन खां वारहा री दृष्टि नरूका संग्रामसिंह नांव रै राजपूत सिरदार माथै पड़ी जिको आपरै दो हजार सैनिकां रै साथै भागणै री तयारी कर रैयो हो। हुसैन खां तत्काल थोड़ीसी सेना रै साथै उणरी तरफ वध्यो। संग्रामसिंह अेक टीलै पर हो। जद उण सैयदां नै आपरी तरफ आवतां देख्यो तो आपरी स्थिति रो फायदो उठायनै अेकै-साथै दोय सौ बंदूकां सूं गोळ्यां वरसावणी सरू कर दी। सैयदां नै म्यान सूं तरवार निकालण रो अवसर भी कोनी मिलियो अर इण पहली ही वाढ में वो आपरै दो भाइयां तथा पचास सैनिकां सागै मारयो गयो। उणरी मौत रै साथै ही शाही सैनिकां में भगदड़ मचगी। कछवाहा राजा जयसिंह अर राठौड़ अजीतसिंह भी

पाछा आयग्या अर सांभर माथै कब्जो कर लियो। प्रायः दो हजार मुगल सैनिक खेत रैया। सांभर रो फौजदार अली अहमद तथा सांभर रो काजी खालिकमुहम्मद भी बंदी वणा लिया गया।

उपर्युक्त ओलछां सूं सांभर युद्ध रो अतिहासिक पक्ष स्पष्ट हुय जावै है (महाराजा अजीतसिंह अेव' उनका युग, लेखक — मीरा मित्र, राजस्थान हिंदी ग्रंथ अकादमी, प्रथम संस्करण, 1973 ई., पृष्ठ 158)।

'फूफी रासो' रै अनुसार इण युद्ध में जयपुर रा कछवाहां तथा जोधपुर रै राठीड़ां संमिलित रूप सूं भाग लियो हो अर अंततोगत्वा मुगलां नै (जिणां में सैयद, शेख तथा मीरखां सामल हा) हराय नै सांभर सामलात रो प्रबंध स्थापित करचो हो; किंतु युद्ध रै पूर्व भाग में कछवाहां री फौज बुरी तरियां हारी अर भाग खड़ी हुयो। कवि सरू रा पंद्रह दूहां में युद्ध री भूमिका तथा तैयारी वावत वर्णन करचो है। उण रै मुताबिक जोधपुर अर जयपुर रै राजावां मिल'र युद्ध रचणै री वात कैयी है तथा जोधपुर नरेश सूं राठीड़ां रै क्रुद्ध हुवण री वात कैयी गयी है जिण सूं युद्ध में कुचामण, आडवा, रायपुर, रियां, बगड़ी, मीठड़ी तथा बूडसू ठाकुरां रै सिवाय कछवाहां री सेना ही मूळ रूप सूं भाग ले रैयी ही। युद्ध रो वर्णन अेक मुसलिम नारी रै मुख सूं कैवायो गयो है जिणनै कवि 'फूफी' नांव सूं संबोधित करी है।

'फूफी रासो' री मूळ रचना में कवि जिण छंद रो प्रयोग करचो है, उणनै 'सवदी' (अथवा शब्दी) लिखियो है। इणमें किण भांत भिन्न-भिन्न ठाकुर (राजावत, खंगारोत, शेखावत, नाथावत, गौड़ आदि) युद्ध में सामल हुया अर किण प्रकार भाग्या—इण रो घणो रोचक वर्णन हुयो है। कवि रै अनुसार युद्ध तीन चरणां में हुयो जिण रै अंतिम चरण में बूडसू ठाकुर री बीरता सूं युद्ध में राजपूतां री जीत हुवण रो संकेत है—

‘तीन वार तुरक मिल सारा, करली सहा करतूती
भाग्या नहीं बूडसू ठाकर, राख लिवी रजपूती।’

कवि रै अनुसार आ घटना सोमवार सन् 1700 रै सावण री है, यथा 'सोमवार सत्रासै सावण बंधी राव कै राखी। ठाकुरदास मंडपी को बारठ देखी जिसड़ी दाखी।'

वास्तव में सांभर युद्ध सन् 1708 ई. तदनुसार विक्रमी संवत् 1765 में हुयो हो।

इण आखरी 'सवदी' रै अनुसार तो मुरारिदास स्वयं प्रत्यक्षदर्शी हो, किन्तु रचना रै अंत में अेक दूहो इण भांत है :—

भूँडी वा अथवा भली, है विधना कै हाथ
कवि नै तो कहणी पड़ै, सुणै जिसी सह वात

इण दूहै सूं आ ध्वनित हुवै कै कवि तो जिसी सुणी वा ही वात कैयी है। लेखक रै विचार सूं आ घटना 'फूफी' सूं सुणियोड़ी वात रै आधार पर कवि इण वास्तै लिखी है जिण सूं तत्कालीन राजपूत लोग नाराज नीं हुवै अर कवि रै लारै नीं पड़ जावै क्यूं क उण

वखत सत्ता उणां रै हाथां में ही । कीं भी हुवै अेक वात स्पष्ट है कै कवि तथ्यां नै निडर हुयनै उजागर करचा है अर आपरै तीखें व्यंग द्वारा भगोड़ां रो वडो सजीव चित्रण प्रस्तुत करखो है जिको इण आम धारणा नै 'कै चारण कवि केवल प्रशस्ति-गायक चाटुकार हुवै है' खंडित करै है ।

जठै ताई युद्ध री तिथि रो प्रश्न है 'फूफी रासो' में वतलायो गयो समय ठीक नीं है अर नां ही सत्य है कै वूडसू रै ठाकुर री वीरता रै फल-स्वरूप ही कछवाहां अर राठौड़ां री सेना नै विजय प्राप्त हुयी । इतिहास सूं तो विजय रो श्रेय नरूका संग्रामसिंह उणियारा नै मिलै है । अस्तु ।

रचना में प्रयुक्त छंद 'सवदी' रै विषय में कोई मत व्यक्त करणो संभव कोनी क्यूं कै इसो छंद कठै ही पिगल या छंदशास्त्रां में वर्णित कोनी । हां, संत कवियां री रचनावां में 'सवद' जरूर मिलै, किंतु उणां सूं इण 'सवदी' री रचना सर्वथा न्यारी है । स्वर्गीय हिगलाज-दान कविया कृत 'वाण्यां रासो' में प्रयुक्त छंद भी कीं इणी भांत सूं नूवो ही प्रयोग लागै ।

इण प्रकार री रचनावां में जठै ध्वनि अर प्रवाह रो क्रम रैवै बठै शैली री विशेषता रो चमत्कार श्रोतावां नै आह्लादित करै । 'फूफी रासो' री जिकी चौतीस सवदियां इण हस्तलिखित प्रति में प्राप्य है उणां रै अतिरिक्त अेक और 'सवदी' जिकी इण रचना रै प्रारंभ री प्रतीत हुवै इण तरै सरू हुवै है :—

'फूफी कह सांभर की बातां । पगड़ी खोस लई घर जातां ॥'

अठै फूफी रासो अविकल रूप में दियो जा रैयो है ।

फूफी रासो

(रचयिता— श्री मुरारदास बारहठ, ग्राम मंडपी)

दोहा

पत जैपर जोधाण पत, भेळां हवै दुहुं भूप
सांभर में कीन्ही सला, रचो राड़ को रूप 1

कूरभ भाखी कमध नै, अैसी करां उपाय
उभय राज राखां अठै, आखां चौड़े आय 2

आप पती आमेर हैं, कही कमध कर जोड़
आफत मो वीती इसी, रीस गया राठौड़ 3

तिण जागां इक तुरकणी, आई करण उपाय
बैकाई दल देखकै, जकै सुणाई जाय 4

जैपर दल आयो जबर, धरो अबै मत धीर
ताण दिया तंबू बडा, तिण नळियासर तीर 5

सेख सथ्यद काजी मुगल, सुण सारा समचार
 मदत बुलाओ मीर खां, धीरज मन में धार 6
 आठ दिवस आयो नहीं, वो मुगलन को मोड़
 सह सांभर खाली करी, कछवाहा राठीड़ 7
 हंसतै हिंदू नगर में, नोपत लगै घुरान
 मैं जाकै महजीत में, कैसे पढ़ूं कुरान 8
 पोढे हम नित पिलंग पै, ओढे साल दुसाल
 दोय दिवस में कर दिये, विसमिल्ला बेहाल 9
 मसलै आंख्यां मुगल सब, आंसू पड़ै अपार
 खुदा आज खोटी करी, वण बैठै वेकार 10
 मन में सोची मीरखां, सुण सांभर की बात
 काजी कागद बांचकै, कियो कूच परभात 11
 लड़वा लागो मीरखां, भागो भूप अगूण
 आय गया उण दिवस ही, बगरू और विचूण 12
 उणियारो आयो अवस, ल्यायो बीठळ लार
 दरसायो चौड़े दगो, मुगल हटायो मार 13
 मरै मुगल हिंदू हटै, फटै फौज दुहुं ओर
 रटै खुदा रघुनाथ नै, कटै बगतरां कोर 14
 कोप चढचो कूरम कटक, पटक मूँछ पर हाथ
 ग्रीध मांस गहरो गटक, रटक उडै दिन रात 15

सबदी

फूफी कह सांभर की वातां, पगड़ी खोस लई घर जातां
 इण राठोड़ां इण कछवाआं, कैसा जुलम किया है ।
 नळियासर की तीर ऊपरै, तंवू ताण दिया है 1
 दीपक, डिगी, पचेवर, दूद, बोरावाज बखानूं
 आया अ सारां सूं पहली, पूरी रीत पिछाणूं 2
 जेतासुत जगमालसिंह का, तेता मूँछां ताणै
 भाईपो भेळो कर लीनो, नामी भूप निराणै 3
 मूँछ हाथ धर कहै मीरखां, हिंदू सब हट जाना
 तुरकां तेज घटैगो नांही, कर में रखां कवाणा 4

पूछ्यो जाय पाडली ठाकर, विरथा वात बखाणै
 क्या जाणै क्या होय मीरखां, तुरक मूँछ मत ताणै 5
 रावण रामचन्द्र नै कहतो, करुं सिया महराणी
 भालू, रीछ, भांग्या दसमाथा, लंका भई विराणी 6
 साली अर साखूण सिरोही, मीढा विरगी मानो
 सर में सेल वंदूकां राळी, धरचो विप्र को वानो 7
 मांगी सीख ममाणै ठाकर, घबराया म्हे गाढा
 मरवै ठाकर घणा मिजाजी, आसी बै कद आडा 8
 छेड़ वात छर्र का ठाकर, चौड़े चुगली खावै
 सांभर में सारा दुख पावां, मरवो मौज उडावै 9
 रैठाणो गागरडू लड़वा, सांभर सरै सिधाया
 चढतै दिन चाळीस जणां नै, मुगल दोय मचकाया 10
 धूँढैराव दगो कर आयो, बायो एक दुधारो
 पैखानो पैली कर दीनो, बोल्यो नहीं बिचारो 11
 दूणी राव देख तुरकां नै, भरचा रीस में भारी
 आया घर अेड्यां उचकाता, कोय न लागी कारी 12
 चढता तुरंग चौकड़ी ठाकर, सूण हुया सह खोटा
 बडा बाप को करचो कनागत, आय घरां नै ओठा 13
 मुगलां चरख चढाई तोपां, हिंदू दळ अब हारचा
 ईसरदो अचरोळ उसी दिन, काळख किलै पधारचा 14
 चौमू अर सामोद सरीसा, जका रीत नहं जाणी
 भेळा होय भाजगा सारा, नामी भड़ नाथाणी 15
 सीकर खेतड़ी सागै भीळी वीसाऊ में आकर
 खूड़ ठिकाणै वाट्यां खावै पूरी पदवी पाकर 16
 खाग लियां खूड़ को ठाकर, मानो मूँछ मरोड़ै
 हीमत हार घरां नहिं जाऊं, कह दरसाई चीड़ै 17
 मींडो और मारोठ गिणीजै, गोडारी रा राजा
 लुकता छिपता लियो लूणवों, सातभायां का साजा 18
 आकोदो उणियारो दोऊं, कर ली अेक कमेटी
 तंवू बाळ दिया तुरकां का, सारी फौज समेटी 19

काचरोदा कूरम बड़वंका, दे डंका दल मांही
तोप चोर लेग्या तुरकां की, पूरी सोभा पाई 20

भूल करी भादव ठाकर, भिड़ियां पहली भग्ना
हालां का तो करचा टोकरा, लूण काढवा लग्ना 21

वागडचास का यूं उठ बोल्या, म्हे भगड़ा का मांभी
भीड़ पड़्यां दरगां में धसग्या, खाग खोस ली खांजी 22

कुरव लिया कुचामण ठाकर, जका जुद्ध में आया
तुरकां का तंबू में बड़ग्या, मूंडा यूं मुरझाया 23

नीमी और वेरी धनकोली, मोटी कूक मचाई
तेरा दिन तोसीणै ठाकर, रहग्या मरता लाई 24

लेडी और लाडणू देखो, भेळा दोन्यूं भाई
गींगोली सू गया गांवनें, सारी सरम गमाई 25

अकट करी आउवै ठाकर, लूंठो लाछण लागो
माल गंवाय मीठड़ी ठाकर, भाकर सामूं भागो 26

रीयां और रायपुर ठाकर, बगड़ी जाय विराज्या
जावा दिया जोधपुर मांहीं, भूम छोडकर भाज्या 27

भकरी और जावळो जंगी, निलज होय वै नीता
मेड़तियां घर मांही बैठचा, नारचा जेम नचीता 28

काजी कहै सुणो सब हिंदू, भटपट खाणा खाओ
मुगल आज मारेगा तुमकूं, अपणै घर उठ जाओ 29

मरवा खातर आय मरद सब, घोड़ां पाखर घाल्यो
फुड़कट करै वात क्यूं फीकी, दूदूपती दकाल्यो 30

डचोडी कोडी, मंडो भादवो, जोवनेर का सारा
वै तरवार कठै सू वावै माता तणा पुजारा 31

हेक बार हरसोली ठाकर, लियो फौज को लेखो
भाग्या जाय भोजपर ठाकर, दूदू सामां देखो 32

कूहड़ धणी बडाळो कूरम, मरद धार मजबूती
तुरकां रा ताबूत तोड़िया, राख लई रजपूती
फूफी कहो सांभर की वातां,
घोड़े खोस लिअे घर जातां 33

गवदे-सी खाडा में वड़ग्यो, सोहदो लेगो सरणो
 भिड़तां पैली भाज गयो, ओ काळवाड़ को करणो 34
 भागा धीर डावडी वाळा, वह सादा का पोता
 भिड़तां फौज अणी की दोनूं गैला खाय गया गोता 35
 तीन बार तुरक मिल सारा, कर ली सह करतूती
 भाग्या नहीं वूडसू ठाकर, राख लई रजपूती 36
 घूहड़सिध डूंगरीवाळो फौजां हंदो लाडो
 कूद पड़यो नाथा को पोतो, भोभर को-सो गाडो 37
 हाडी राणी यू वतलायो, सुण देवर हरिराम !
 भिड़तर पैली भाजसी, अ थारा म्हांरा जाम 38
 बागरास का ठाकर बोल्या-म्हे झगडै का मांभी
 घोड़ा लेय नळां में धसग्या, खड़ग खोस ली खांजी 39
 गांवां-गांवां खूद घालतां, घोड़ा रखता ताजा
 भिड़तां ही झट भाज गया अ, नीमेड़ा का राजा 40
 कूला फिर खुसामदचा, स्वारथ सबनै मीठो
 खाटूवाळै खारडै, ओ देवो भाग्यो पूठो 41
 सोमवार सतरोंसै सावण, बंधी राव कै राखी
 मुरारदास मंडपी को बारठ, देखी जिसड़ी दाखी 42

दोहा

भूंडी वा अथवा भली, है विधना कै हाथ
 कवि नै तो कहणी पड़ै, सुणै जिसी सह बात 43

□

—पो. हरमाड़ा (जयपुर), राजस्थान

वि श्वं भ रा

(त्रैमासिक शोध पत्रिका)

संपादक

डा. मनोहर शर्मा

डा. दिवाकर शर्मा

वार्षिक मूल्य 25 रु.

संपर्क

हिंदी विश्वभारती, नागरी भंडार
 बीकानेर (राजस्थान)

विघन-संतोषी

नृसिंह राजपुरोहित

— नींद आयगी काई ?

— ... ऊं हूं s s s !

— तो अपूठा कियों फिरग्या ? दो दिनां में ही धापग्या काई ?

गिरधारी पसवाड़ो फोरनै धापू नै पाछी काठी बाथ में भरली ।

वो दियाळी माथै च्यार दिन वासतै गांव आयोड़ो । कनलै शहर में वो नौकरी करै । गवर जिसी रूपाळी धापू, जिणनै देखनै संगी-साथी गिरधारी सूं ईसको करै । गिरधारी केई वार उणां नै मजाक में कैया करै —

उर चवड़ी कड़ पातळी, झीणी पांसळियांह
कै तो हर तूठचां मिलै, (कै) हीमाळै गळियांह !

व्यांव हुयां नै पांच-सात वरस हुया । धापू रै हाल पेट मंडचो नीं । नौकरी में छुट्टी मिलै कै वो भागनै गांव आय जावै अर च्यार दिन रळी मनायनै पाछो बुवो जावै ।

बडो भाई जगमाल घर-गृहस्थी अर खेती-पाती संभाळै । गिरधारी तो कुंवरपदाई में वडै भाई रै पाण निचींतो रैवै अर मौज करै । घर में रामजी राजी, कोई देण दुवाळ नीं । पण अबकाळें गांव आयनै गिरधारी जंजाळ में फसग्यो । धापू रै नां जाणै काई जची सो अक रट पकड़ ली..... वस, आपणै तो जेठजी सूं न्यारो हुवणो.....सौ वात री अक वात !अवै भेळा तो अक दिन ही नीं चालै । चालग्यो जिको ही घणो समझो ।

गिरधारी कीं पड़ूतर नीं दियो । वो धापू री आदत जाणै । बा जद कोई रट पकड़ लेवै तो वस बा आपरी ही गायां जासी । आगलै री कीं सुणै आथ नीं । थोड़ी ताळ में बा फेरुं बोली — तो काई विचार कियो थां ?

— किण वात रो ?

— तो काई इतरी ताळ में मँस रै आगै भागवत ही वांची ? हे भगवान ! म्हारै बाप नै दूजो कोई ठायो नीं मिल्यो सो मन्नै लायनै इण नरकवाड़ें में पटक दी ।

गिरधारी री बाथ ढीली पड़गी । वो पाछो अपूठो फुरनै चुपचाप सूयग्यो । कमरै में स्यापो छायग्यो । रात आधी ढळगी ही । लारली कानी वाड़ें में तिवरियां तरणाट करै ही ।

थोड़ीक ताल में उननै महसूस हुयो कै धापू मांयनै ही मांयनै रोय रैयी है। उणरो अंदाज सही निकलियो। इतो गाजियां-खिवियां पछै छांटो-छिड़को हुवणो तो स्वाभाविक ही हो।

वो इण बात नै खूब जानतो हो कै देराणी-जेठाणी रै आपसरी में कम वणै। पण अँ वातां तो जग-चावी। माटी रा चूल्हा घर-घर में। इण में कोई नूवीं वात नीं। उण नै आ तो ठा ही कै जेठाणी थोड़ी बड़का-बोली है, पण कम देराणी भी कोनी। पूनम पूरी है तो ओछी अमावस ही नीं। पण मामलो इण हृद ताई पूग जासी, ओ अंदाज उणनै नीं हो। भेला पड़्या तो ठाम-ठीकर खड़वड़ै ही। देराणियां-जेठाणियां री खटपट परंपरा सूं बुवी आयी। कठै ही कमती तो कठै ही वेसी। पण घर-घर अँ ही रांडी-रोणा। आ बात उणरै दिमाग में कदै ही नीं आयी कै इतरो वेगो वड़ै भाई सूं न्यारो हुवण वावत सोचणो पड़ैला।

उण रो बाप टावरपणें में ही गुजरग्यो हो जिण सूं घर में नैनग पड़गी ही। तिण उपरांत घर में अंगां ही खालीपो हो। मां बापड़ी दोनू भाईयां नै पांखड़ां में घालनै घणै कळापां सूं मोटा करचा। जगमाल गिरधारी सूं दस-बारै साल वडो हो। जिण साल जगमाल रो व्यांव हुयो उण साल डोकरी चालती रैयी। उण वखत ताई घर में थाकेलो ही हो।

पण अबै घर अठोरियां में। जगमाल वडो मैण्ती। अकल हलियो हुवता थकां ही पैदावारी में गांव में सै सूं आगै। अठिनै गिरधारी री कमाई घर में आवण लागी तो देखतां-देखतां घर में नवीं-नंद रा वासा हुयग्या। लिछमी नै भूंडो सुहावै कोनी सो सै वातां रा ठाट हुयग्या। जमीन-जायदाद, घर-वार, ढोर-डांगर अर गहणो-गांठो, कैई वात री कमी नीं रैयी। माया वधै तो मन ही वधै। इण कारण चढियां-उतरियां री ही पूरी चाकरी। मिनखां जिसी मनवार। भूखो आवै अर धापनै जावै। घी-दूध सूं चळू करावै। पछै क्यूं बूझो इण घर री वातां? दुनिया रो तो कायदो कै खावै मूंडो अर लाजै आंख। कैयो है—हाथ पोलो तो जगत गोलो। इण भांत ओ घर चोखळै-चावो हुयग्यो।

पण गांव में मिंदर हुवै उठै उखरड़ा भी तैयार लावै। गांव में भला मिनख मिळै तो भूंडा जणां री भी कमी कोनी। किणी नै सुखी देखनै उणांरो पेट दूखण लाग जावै। उणांरी मनस्या आ ही रैवै कै म्हारै जिसा सगळा ही हुय जावै तो ठीक। कोई सोगरो सोरो खावै तो भला क्यूं? इसा मिनखां नै इण घर री संपत अर समृद्धि अंगां ही नीं सुहायी।

वातां रा फटकारा लागण लाग्या। मूंडै मीठा अर परपूठै खोटा इसा पेट-खोटा मिनखां री गांव में कोई कमी नीं ही। इसा दो-च्चार-अक लखणा भेळा हुयां परनिंदा-पुराण सुरू हुय जावतो—देखो वखत आयो...कीड़ियां रै ही पांख्यां आयगी। अबै राव कैवै मनै दांतां सूं चावो। काल री जोगण अर गोडां सूधी जटा। बाप तो जियो जितै अन्न दांतै वैर रैयो अर अबै बेटा घोड़ै चढचा फिरै। थोड़ा धीमा खड़ा रैवो भायां। कठै ही आखड़-नै पड़ग्या तो मूंडै री बतीसी बारै आय जासी। लारला दिन याद राखो वीरां! इतरा फाट नै फळै मत जावो। माजी तो मरिया जितै ही फाटोड़ै फेटियै फिरचा अर अबै बेटा वारै जावै तो मांचे में ही कोनी मावै... देखो तो सही, दुनिया रो खिलको!

दूजा पुराणां रो तो अध्याय पूरा हुआ छेह आय जावै पण परनिदा-पुराण रो कोई छेह नीं । अध्याय खतम हुआं क्षेपक सरू हुय जावै अर क्षेपक रो अंत आयां पाछो नूवों अध्याय प्रारम्भ हुय जावै । वाचकां रो कोई घाटो नीं, ज्यू श्रोतावां री ही कोई कमी नीं । जरूरी काम सूं खोटी हुयनै श्रोता मारग वैवता पग थामनै ही अेकाध श्लोक रो श्रवण-लाभ तो लेय ही लेवै ।

इसा घर मंगवावणिया मिनखां जायनै गिरधारी री सासू रा कान भरणा सरू करचा-भला मिनखां ! थे वेटी नै परणायनै सासरै भेजी है कै उण घर री दासी वणायनै सीख दीनी है ? ... जेठाणी तो वैठी हुकम चलावै अर वा वापड़ी रात दिन घाणी रो बलद वणी आठ पोहर काम में पीलीज्योड़ी रैवै । तिण उपरांत ही जेठाणी मूंडें में आवै ज्यू बोलै अर वा तो बोलै सो बोलै ही उणरी छोरियां भी सागै री सागै बोलणें में कीं कसर को राखै नी । आ तो भला माईतां री जायी है जद इतरी गाळचां-राळचां सुणै । कोई दूसरी हुवती नीं तो कदै ही कूवो-वावड़ी कर लेवती । म्हे तो देखां जिसी कैवां । वाकी म्हांरै कांई लेणो-देणो । पण अन्याय हुवतो देखां तो चुप को रैयीजै नी ।

गिरधारी री सासू रै घर-मंगवावणियां अर विधन-संतोषियां री अै वातां हियें में पूरी हूकगी । वा निसासा नाखनै बोली-थे साची कैवो सा ! पण इण रो इलाज कांई ?

—इलाज ? इलाज क्यूं कोनी ? भाई-भागिया परंपरा सूं जुदा हुवता आया । फेर थांरो जंवाई तो वांकड़ो कमाऊ है । घर रो हरको जगमालजी रै पाण को चालैनी । म्हांसूं कोई बात छानी कोयनी । गिरधारी सीधो अर असराफ आदमी है । आपरो भलो-मूंडो समझै कोनी ! वाकी कालै न्यारो हुय जावै, आपरी लुगाई नै सागै लेयनै नौकरी माथै जावै अर ठाठ सूं रैवै । म्हे तो देखां जिसी कैय दां । पछै मानो कै मत मानो, आगलै री मरजी । खांधियो खांध देवै, भेलो को वळै नी । कैयो है-अकल सरीरां ऊपजै, दीयां लागै डाम । छेवट तो आगलै री अकल ही काम आसी ।

वेटी पीहर आयी तो गिरधारी री सासू उणनै पाटी पढावणी सरू करी । ऊपर सूं समझायनै कैयो-थारै जेठ रै दोनूं वेटियां परणावणजोग हुयगी । इण वरस नीं तो आगलै साल हाथ पीळा करणा ही पड़सी । अर अवै जिसो थारै घर रो नामूदो है उणरै मुजब खरचो ही करणो पड़सी । थे अणूता क्यूं खरचें में पजो गैलां ! म्हारी मानो तो अवकी दीयाळी माथै न्यारा हुय जावो । भाई-भागिया परंपरा सूं जुदा हुवता आया है । इणमें कोई अणजोगी बात कोनी ।

मा री मीठी सीख वेटी रै ही बराबर हियै हूकगी अर दीयाळी माथै गिरधारी घरां आयो तो उण गोधम मचा ही नाख्यो ।

अेक रात तो गिरधारी गाढ राखी, पण दूजी रात ही सागण वा हीज रामायण, सागण वा हीज रट । छेवट उण धापू नै जुदा हुवण रो कारण पूछ्यो, जणां वा रोवती थकी बोली-कारण ? थे मनै कारण पूछो ? थांनै दीसै कोनी कांई ? मैं इण घर में वहू वणनै आयो हूं ।

किणी रै दायजै में गोली वणनै नीं आयी । आज इतरा वरस हुया, हूं नौकरणी ज्यूं इण घर रो सगळो घरड़ियो करूं, तिण उपरांत ही सगळो घर म्हारै लारै पड़्यो रैवै, मूंडे में आवै ज्यूं बोलै, वात-वात में बांझड़ी हुवण रा मोसा देवै । इत्ता दिन मैं गाढ राख ली । अबै म्हारै सूं सहन को करीजै नी । जे थे अबै ही न्यारा नीं हुया तो अबै थारै घर में ऊंधो पाकसी । कान खोलनै सुण लीजो हां । हूं अबै गलै-सूधी धापगी हूं, सो किणी दिन कूवो-वावड़ी कर लेसूं ।

गिरधारी आ वात सुणनै चुप रैयग्यो । अक आखर ही नीं बोल्यो । धापू रो सुभाव, घर रो वातावरण अर मौकै री नाजुकता देखतां उणनै आ उक्ति याद आयगी —

रोजीना री राड़, आपस री आछी नहीं
वणै जठा लग वाड़, चटपट करणी चकरिया !

बो सोचण लाग्यो— अबै इण हालत में समझदारी इण में ही है कै भाई सूं न्यारो हुय जाऊं । घर रो इण खटपट में कदै ही कीं हुयग्यो तो काळो मूंडो हुय जासी अर गवाड़ी री इज्जत धूड़ में मिल जासी ।

तीसरै दिन बंटवाड़ै री वात चाली तो दोनूं भाईयां गांव में चिड़ी रै जायै नै ही ठा नीं पड़ण दियो । पण भीतां रै ही कान हुवै । काई ठा, लोगां नै कियां सुराग लागगी । दोनूं भाई बंटवाड़ै रो फैसलो करण बैठा तो बिना बुलायां अक-अक करनै लोग आवणा सरु हुयग्या । कोई चिलम भरणै रै मिस आयो तो कोई कागद बचावण रै मिस । कोई नै गिरधारी सागै शहर सूं कीं जरूरी चीज-वस्त मंगावणी ही तो कोई नै जगमाल सागै कीं सलाह-सूत करणी हीं । पण वाई बतीस लखणी तो बीरो छतीस लखणो । दोनूं भाई लोगां री मनस्या समझग्या अर सगळां नै विदा करचा । पछै आडो जड़नै बंटवाड़ै री चरचा जवान माथै लाया ।

चौथै दिन गिरधारी धापू नै सागै लेयनै नौकरी माथै शहर बुवो गयो जणां लोगड़ां नै नेहचो हुयो । उण गांव में घर-घर अै समंचार पुगाय दिया कै जगमाल अर गिरधारी न्यारा हुयग्या है । जिण लोगां सुण्यो उणां ही अचूंभो करियो । पण नूवीं वात नव दिन, खेचीताणी दस दिन । कुण किणरो ध्यान राखै । वात आयी-गयी हुयगी ।

दूजै वरस जगमाल री दोनूं बेटचां रो व्यांव मंडचो । गिरधारी अकलो च्यार दिन वास्तै आयनै बुवो गयो । इण रै पछै लगोलग च्यार दुकाळ पड़ग्या अर जगमाल री माली हालत कमजोर हुयगी । पण गिरधारी घर कानी मूंडो ही नीं करचो । जगमाल नै माठो तो लाग्यो पण उण भाई नै कोई समंचार नीं करचा ।

कुदरत रा खेल घणा अजूवा हुवै । मिनख सोचै कीं अर हुवै कीं और ही । गिरधारी री लुगाई सोरी सुखी रैवण वास्तै आपाळा खाया पण उलटी दुखी हुयगी । कैयो है— नर चींती होवै नहीं, हर चींती तत्काळ । वात यूं वणी कै गिरधारी अक फर्म में नौकरो करतो । उणरै काम-काज खातर उणनै दौरै पर जावणो पड़तो । साल-डोढ साल तो मजै सूं निकळग्या ।

56 राजस्थानी गंगा

धणी-लुगाई शहरी ज़िंदगी अर आजादी रो आणंद खूब लूटचो । दिन यूं बीत्या जाणै पांख लगायनै उडग्या हुवै ।

अकर गिरधारी कंपनी रै काम सूं दीरै माथै गयो तो अक दुर्घटना में उणरो पग टूटग्यो । बेहोशी री हालत में उणनै अस्पताळ लाया तो डाक्टर टांग काटणै रो फेसलो सुणायो । सुणतां ही गिरधारी री बहू चेताचूक हुयगी । उणनै आपरै च्याखुंमेर अंधारो निजर आवण लागग्यो । लोगां उणनै पूछनै जगमाल नै समंचार भेज्या । जगमाल नै इण बात री ठा पड़ी तो उणरो हिवड़ो फाटण लाग्यो । धणी-लुगाई दोनूं जणा तुरंत अस्पताळ पूग्या । भाई-भोजाई नै आया देखनै गिरधारी री छाती भरीजगी । दोनूं भाई बाथ घालनै रोवण लाग्या तो देखणवाळां रा भी मन पसीजग्या । खासी ताळ ताई तो किणी सूं बोलीज्यो ही कोनी । छेवट जगमाल बोल्ह्यो जणै निःशब्दता भागी । पण गिरधारी रा बोल तो होठां ताई आयनै ही अटकग्या जाणै सबद-पंखी उडण वासतै पांख्यां खोलनै पाछी सांवट ली । वो अपराध री भावना सूं दत्रियोड़ो हो । पण अश्रु-प्रवाह दोनूं भायां रै मन री काळख धोय नाखी ।

गिरधारी नै अस्पताळ में पूरा तीन महीनां रैवणो पड़चो । अक टांग उणनै कटावणी पड़ी । जगमाल भाई री जवरी चाकरी कीधी । अस्पताळ सूं छुट्टी मिली जितरै गिरधारी नै नौकरी सूं ही छुट्टी मिलगी ही । जगमाल उणनै लेयनै गांव आयो तो सगळो गांव मिलणनै उमड़ पड़चो ।

व्यांव, दुकाळ अर दुर्घटना रै कारण घर री माली हालत पहली जिसी नीं ही । दुनियां में चलती रो नांव गाडी है । माया थारा तीन नांव, फरसू, फरसो, फरसराम । जगमाल फरसू सूं फरसराम वण्यो हो जणां गांव रा केई भला मिनख राजी हा तो केई दुष्ट लोग दुखी पण हा । आज ही वो माली हालत सूं कमजोर भलां ही हुयो हुवै पण मन सूं वो थोड़ो भी कमजोर नीं हो ।

उण गिरधारी नै हिम्मत बंधायी अर गांव में अक दुकान खुलवा दी । धंधे में गिरधारी वणो हुसियार हो । दुकान जमगी अर आछी चालण लागी । अठिनै दो-तीन साल खेती री पैदावार ही चोखी वेंठी । घर पाछो ठायै आयग्यो । देराणी-जेठाणी भी वणै संप सूं रैवण लागगी । इण भांत सगळी वातां ठीक हुयगी पण विधन-संतोषियां रै जीव नै पाछी गिरै हुयगी ।

□

— खांडप, वाङ्गमेर

री

‘खम्मा’ शब्द ख्री व्युत्पत्ति और अर्थ

नरोत्तमदास स्वामी

राजस्थान के राज्यों में प्रजाजन, दरबारी तथा अन्यान्य लोग राजा एवं राज-परिवार के प्रमुख व्यक्तियों का अभिवादन एवं अभिनंदन प्रायः ‘खम्मा !’ संबोधन के द्वारा करते हैं। साधारणतया यह समझा जाता है कि ‘खम्मा’ शब्द संस्कृत के ‘क्षमा’ शब्द का रूपांतर है, पर वास्तविक बात ऐसी नहीं है। वस्तुतः ‘खम्मा’ शब्द संस्कृत के ‘आयुष्मान्’ शब्द से बना है। ‘आयुष्मान्’ से ‘आयुखमाण’ बना और जोर से पुकारते समय शब्द के पिछले भाग पर अधिक जोर पड़ने से उसका पूर्व भाग ‘आयु’ धीरे-धीरे लुप्त हो गया और ‘खम्माण’ शेष रहा, जो धीरे-धीरे ‘खम्मा’ बन गया।

‘जय-जय !’ की भांति ‘खम्मा !’ भी आशीर्वादात्मक अभिवादन है, जिसका अर्थ है— दीर्घजीवी हो। प्रजा, राजा को सदा आशीर्वाद ही देती आयी है, क्षमा मांगने का तो कोई प्रश्न ही नहीं उठता। अंग्रेजी में भी राजा-रानी का अभिवादन— Long live the King या Long live the Queen कहकर किया जाता है।

आशीर्वाद, बड़ों द्वारा छोटों को ही नहीं, किंतु छोटों द्वारा बड़ों को भी दिया जाता है। संस्कृत के नाटकों में सारथी, रथी को ‘आयुष्मन्’ कह कर संबोधित करता है।¹ मनुस्मृति में कहा गया है कि ब्राह्मण का अभिवादन ‘आयुष्मान् हो’ इन शब्दों के द्वारा करना चाहिये।²

□

1. देखिये कालिदासकृत अभिज्ञान शाकुंतलम् नाटक (अंक 1 में राजा दुष्यन्त और सूत का वार्तालाप) तथा भवभूति का उत्तररामचरित नाटक (अंक 5 में राजकुमार चंद्रकेतु और सुमित्र का संवाद)।

2. आयुष्मान् भव सौम्येति वाच्यो विप्रोऽभिवादाने (अध्याय 2, श्लोक 125)।

[वैचारिकी. भाग 1 अंक 2-3 से साभार]

जुगां सू जूझता लोक-शब्द

रावत सारस्वत

आपरे इतिहास री ओलखाण लियां सैकड़-हजारुं शब्द आपणी बोल-चाल में लावें। उणां नै पिछाणनै अर परखणै री जरूरत है। अठै कुछेक शब्द विद्वानां रै विचार सारु मांड्या गया है।

1. लूंगी — गणगौर पूजवाली कन्यावां अेक गीत गाया करै-

म्हारा ईसरजी ओ उमराव जटाधारी ! लूंगी लाज्योजी

लूंगी म्हंगी अे गुमानण राणी ! लूंगी म्हंगी अे.....

आ लूंगी कांडै है ? अजकालै मरद घरां में जिकी तहमद पुरै उणनै भी लूंगी ही कैवै। मुसलमान-समाज में तो इणरो आम रिवाज है। 'आईने अकबरी' पृष्ठ 389 अर Fitch Pyley 118-119, अर्ली ट्रेवेलस, 28 अर आईन 391, बंबई 208 पर जिक्र है कै 'उड़िया लोग घणा गरीब है। लूंगी रै अलावा कुछ भी कोनी पुरै या अेक सफेद कपड़ो कमर रै लपेट लेवै' (The Oriyas ... are very poor, wear no better habit than a Lungee, or a white cloth made fast about their waist.)

आ लूंगी तो लगभग वा ही है, जिणरो जिक्र ऊपर करचो है। आईन में फेर लिख्यो है—'Large number of men and women go naked and donot wear any thing except for the lean cloth (Lung). (Agrarian system of Mughal India, page 95, Irfan Habib, New Delhi, 1963). अेच. अेच. विल्सन आपरै कोश Glossary of Judicial and Revenue Terms, पृष्ठ 313 पर लिखै है—'Lung and Lungee, a cloth passed between the thighs, Bengali Lungi, a petticoat. It is said also to be a large handkerchief of blue silk and cotton mixed, carried over one shoulder; used sometimes as a searf, sometimes as a waist belt.'

इण अर्था नै देखतां 'लूंगी' या तो कीमती कपड़ै रो लहंगो है या रेशमी ओढणो नीलै रंग रो। कानां में पुरैणै री लूंग बावत लोग जिकी कल्पना करै वा इण अर्था नै देखतां संभव कोनी। लहंगो, लंगोट, लिंग जिसा शब्द भी ध्यान में राखणा चाहीजै जिका इण अर्थ में सहायक हुवै।

2. सरबतो—जयपुर रै राजमहलां में खासा दरबार रो अेक भवन है, जिण नै बोलचाल में 'सरबतो' कैवै । 'सरबतो' संस्कृत शब्द 'सर्वतोभद्र' सूं निकलचोड़ो है । ओ भवन च्याहंमेर सूं खुलो है अर बीचू-बीच राजा रै बैठणै री व्यवस्था रैयी हुसी । इण नै केई लोग 'सर्वतोभद्र' नांव री अेक तांत्रिक वणावट मानै । पण 'सर्वतोभद्र' अेक प्रकार रो प्रासाद हुवतो जिण री पूरी जाणकारी 'प्रासाद मंडन' में दी गयी है । 'केसरी' जाति रा पच्चीस प्रकारां में अेक रो नांव 'सर्वतोभद्र' हो —

'केसरी सर्वतोभद्रो नंदनो नंदशालिक'

इण री वणावट री पूरी व्याख्या रो पैलड़ो श्लोक यूं है—

'क्षेत्रे विभक्ते दशधा गर्भः षोडश कोष्ठकैः ।

भित्ति भ्रमंच भित्तिच भगभागं प्रकल्पयेत् ॥'

आ वणावट प्रासाद (मंदिरां) सारू हुवता हुयां भी जयपुर रै सरबतै पर भी घटै ।

भद्र शब्द रा अर्थ है — सोवणो, शुभ, कल्याणकारी । इण वास्तै चारू कानी सूं फूटरो लागणवाळो अर च्याहं दिसां सूं प्रवेश करणै पर शुभ महल 'सर्वतोभद्र' कैवायो । इसो प्रासाद राजा अर प्रजा दोनों रै कल्याण रो कारक है —

प्रासादाः केसरी मुख्याः सर्वदेवेषु पूजिताः ।

पुर रालः प्रजादीनां कर्तुः कल्याणकारिकाः ॥

● अै परिभाषावां मूलरूप सूं प्रासादां पर लागू हुवै । पण सरबतै में चतुर्दिक् प्रवेश रै कारण ओ शुभ अर कल्याणकारी स्वरूप वणायीज्यो । प्रासाद मंडन (15/70) में राजगृह में चौतरफै प्रवेश रो विधान है—

'चतुर्द्वारं चतुर्दिक्षु शिव ब्रह्म जिनालये ।

होमशालायां कर्तव्यं क्वचित् राजगृहे तथा ॥'

इण प्रसंग में अेक बात और ध्यान देवणजोगी है । सिखां में 'सरबत खालसा' नांव रो अेक जलसो या संमेलन हुवै जिण में च्याहं कूट सूं लोग भेळा हुवै । ओ 'सरबतो' भी 'सर्वतो' रो ही विकृत रूप हुय सकै है । 'सरबत' (मीठो पेय) सूं इणरो संबंध बैठावणो ठीक कोनी । भारतीय समाज में शुभ, मंगळ अर कल्याण री भावनावां पर ही जोर रैवतो आयो है सो 'सरबतो' भी उण रो ही प्रतीक है ।

3. सूरज सामी पोळ— अेक राजस्थानी लोकगीत री झड़ इण भांत है— 'सूरज सामी पोळ, केळ शबरकै राजीड़ा रै बारणै ।' वास्तुशास्त्र रै मुजब भवन रो अेक ही दरवाजो हुवै तो वो अगूण दिशा में हुवणो चाहीजै, दो हुवै तो अगूण अर आयूण में अर तीन हुवै तो दोनूं दरवाजो रै बीच में मुख्य दरवाजो राखणो चाहीजै । पण दिखणाद में खास दरवाजो राखणै री मनाही है । 'प्रासाद मंडन' में ओ उल्लेख है—

अेकद्वारं भवेत् पूर्वे द्विद्वारं पूर्व-पश्चिमे ।

त्रिद्वारं मध्यमं द्वारं दाक्षिणात्यं विवर्जयेत् ॥ (5/9)

इण श्लोक में उत्तरमुखी दरवाजो राखण रो भी कोई विधान कोनी। अपराजित-पृच्छा (सूत्र 157) में भी प्रासादां रा दरवाजा (प्रवेशद्वार) राखण रा न्यारा-न्यारा विधान है। पण अगूण दिशा रो द्वार सगळा ही मतां सू शुभ मानीज्यो है।

घरां री 'सूरज सामी पोळ' री जड़ में भी आ ही मान्यता है। मौसम रै हिसाव सू भी ओ विधान ठीक ही है। ऊगतै सूरज रो तावडो सुहावणो अर घर सारू जरूरी हुवै। दोपारै पळै रो तेज तावडो घरवाळां नै दुख कोनी देवै। आशूण री वारियां सू सीलो वायरो भी आतो रैवै अर पिछोकडै में सांझ रै सूरज रो चानणो वण्यो रैवै।

4. चिणगारी — 'चिणी' शब्द चिंचा सू वण्यो है जिणरो अर्थ है— 'इमली'। इण वास्तै चिणगि, चिणाग्नि, चिनाग्नि, चिनिगी अर चिणगारी रो अर्थ इमली रै अंगारै रै पतंगै सू है। इमली रो कोयलो सगळां सू वेसी दहकणवाळो अर साचो हुवै। इण री व्युत्पत्ति इण भांत है—

चिणीगारिका → चिनांगारिआ → चिनगारी → चिंगारी।

5. भार — अेक कहावत है— 'गाडै में छाजलै रो कांई भार?' अठै 'भार' रो मतलब है बोझ। भारवाहक, घास रो भारो, भार-बोझ, भार-तार आदि शब्द भी आजकल बोझ रै रूप में ही मानीजै। पण 'भार' खुद अेक खास वजन हुया करतो हो जियां मण, सेर वगैरा हुवै। अमरकोश में लिख्यो है कै पांच सेर री तुला अर बीस तुला रो अेक भार हुवै—

'तुलास्त्रियां पलशतंभारः स्याद्विशतिस्तुला।

याचितो दशभाराः स्युः शाकटो भार आचितः॥' ('अमरकोश 2/9/87')

आज भी नाज वगैरा तोलै तो ताकड़ी में पांच सेर (किलोवाट) राखै अर पांच-पांच सेर (किलो) रै हिसाव सू ही तोलै। पांच सेर रो ओ तोल 'तुला' कहीजतो अर इसी बीस तुला रो अेक भार यानी अढाई मण वण जातो। इण नै 'भार' इण वास्तै कहीजतो क्यूं कै अेक पळदार 2½ मण (अेक भार) ही सरळता सू उठा सकतो। ओ 'मिनख रो भार' वाजतो। 'गाडी रो भार' मिनख रै भार सू दस गुणो हुवतो अर उणनै 'महाभार' कैवत हा जिको पच्चीस मण रै बरोबर हुवतो। पच्चीस मण री गाडी में अेक छाजलो और मेल दियो जावै तो 'भार' में किसी वढोतरी हुवै। आ वात ही कैवत वणगी। आज भी 2½ मण रो वो 'मिनख रो भार' ही अेक क्विटल री बोरी रै रूप में चालू है। आपणै जूनै व्योहार री आ चतराई हजारों बरसां सू चाल रैयी है।

कृष्ण आपरी बैन सुभद्रा नै दायजै में जो दियो वो 'मनुष्यभार' भी वर्णित है—

कृता कृतस्य मुख्यस्य कनकस्याग्नि वर्चसः।

मनुष्यभारान् दाणार्हो ददौ दश जनार्दनः।

(महाभारत, आदिपर्व, 220 अध्याय)

ओ दस 'मनुष्यभार' अर्थात् 25 मण स्वर्ण अेक 'शकटभार' रै बरोबर हो। □

— डी-282, मीरां मार्ग,

वनी पार्क, जयपुर-302 006

राजस्थानी गंगा 61

राजस्थान-इतिहास रो महत्त्वपूर्ण स्रोत : राजस्थानी साहित्य

गिरिजाशंकर शर्मा

अपणै पैलै अेक लेख 'राजस्थानी भाषा साहित्य में इतिहास की आधारभूत सामग्री' रै संबंध में जद इण पंक्तियां रो लेखक सामग्री रो चयन कर रैयो हो, उण समय राजस्थान राज्य अभिलेखागार, वीकानेर में अपुरालेखीय खंड री सामग्री में जोधपुर राज्य सूं प्राप्त राजस्थानी भाषा साहित्य सूं संबंधित ऐतिहासिक सामग्री रो अध्ययन करणै रो अवसर मिलियो । यद्यपि राजस्थानी भाषा में लिखी आ सामग्री मुख्यतः जोधपुर रियासत रै विविध पहलुवां सूं ही संबद्ध है; फेर भी इण सामग्री री आ विशेषता है कै मध्यकाल में राजस्थानी भाषा रै साहित्य रो जिण विविध रूपां में सृजन हुयो वै सगळा रूप इण सामग्री में मिलै है । इण वास्तै राजस्थान अर उण रै बारै रा शोध-अध्येतां वास्तै, जिका राजस्थान रै इतिहास रै अध्ययन में संलग्न है, इण सामग्री रो महत्त्व और घणो वधग्यो है । ओ सही है कै आजादी सूं पैलां रै भारतीय इतिहास रो राजस्थान रै संदर्भ में अध्ययन करचो जावू तो मालूम पड़सी कै तत्कालीन इतिहासकारां उण में साहित्यिक सामग्री रो भी काफी उपयोग करचो हो, पण तथ्यां सूं ओ पतो चालै कै इण तरै री सामग्री रो सबसूं बेसी उपयोग उण बखत री राजनीतिक घटनावां रो विस्तार सूं वर्णन करणै रै वास्तै ही हुयो हो । किंतु आज इतिहास-लेखन में राजनीति रै साथै-साथै तत्कालीन सामाजिक, धार्मिक अर आर्थिक स्थिति रो अधिक अध्ययन करीजणै सूं राजस्थानी भाषा री साहित्यिक आधार-सामग्री रो महत्त्व काफी वधग्यो है, क्यूं कै इण साहित्य में उपर्युक्त पक्षां री घणी सारी जाणकारी मिलै । राजस्थानी भाषा में लिखियोड़ो ओ साहित्य, च्यार मुख्य भागां में वांटीजण री परंपरा रैयी है । अे च्यार भाग जैन-साहित्य, चारण-साहित्य, भक्ति-साहित्य अर लोक-साहित्य है । जैन साहित्य अधिकांशतः जैन यतियां अर उणां रा अनुयायी श्रावक-श्राविकावां द्वारा लिखियोड़ो है । चारण शैली में साहित्य रै निर्माण में चारण जाति रै लोगां री देन मानीजै । राजस्थान में भक्ति साहित्य भी घणी सारी मात्रा में लिखीज्यो है । संत कवियां री वाण्यां आज भी समाज में खूब प्रचलित है । इण तीनां रै अलावा राजस्थान रा हजारूं कवियां आपरी काव्य-कला रै माध्यम सूं राजस्थानी लोक साहित्य रो सृजन करचो जिको आज प्रचुर मात्रा में उपलब्ध हुवै है । इण में जैन अर भक्ति साहित्य री आंतरिक सचाई, जियां-विभिन्न धर्म-संप्रदायां, उणां रा आंदोलनां अर क्रियाकलापां री पद्धतियां रो उण बखत रै परिप्रेक्ष में तटस्थ अर संतुलित दृष्टि सूं अध्ययन री जाणकारी वास्तै महत्त्वपूर्ण है, वठै ही चारण शैली में लिखियोड़ो अर दूजो लोक साहित्य समाज री छोटी-सूं-छोटी मान्यतावां,

धारणावां अर जीवण-मूल्यां नै समझणै वास्तै महत्त्वपूर्ण है। गद्य अर पद्य में रचियोडो राजस्थानी रो ओ साहित्य इतो विपुल परिमाण में है कै उण रो विवेचन अक लेख में संभव कोनी। इण बात नै दृष्टिगत राखता थकां प्रस्तुत लेख में वीकानेर रै राजस्थान राज्य अभिलेखागार में राजस्थानी में उपलब्ध ऐतिहासिक महत्व वाळै साहित्य री अक संक्षिप्त ग्रंथ-सूची देवण रै साथै उणरै विभिन्न स्वरूपां रै वारै में वतलावण रो प्रयत्न करचो गयो है। राजस्थानी भाषा री उपलब्ध साहित्यिक सामग्री पद्य अवं गद्य दोनू रूपां में है। पद्य रूप में उपलब्ध सामग्री जठै विलास, रूपक, वचनिका, वेलि, नीसाणी, झूलणा, झमाल, गीत, कवित्त (छप्पय) व दूहा रूप में है, वठै ही गद्य साहित्य में ख्यात, तवारीख, बात, विगत, वंशावली अर वार्ता आदि रूपां में मिलै।

राजस्थानी गद्य साहित्य रै विकास में ख्यातां रो काफी महत्व है। साहित्यिक दृष्टि रै अतिरिक्त इण रो ऐतिहासिक महत्व भी कम कोनी। राजस्थानी ख्यात शब्द प्रायः इतिहास रै पर्यायवाची शब्द रै रूप में ही प्रयुक्त हुवै है। अठारवीं सदी में कई ख्यातां लिखीजी। ख्यातां प्रायः दो ढंग सूं लिखी जावतां ही। अक तो वै है, जिकी लगातार इतिहास ग्रंथ रै रूप में, जिण में क्रमभंग नीं हुवै, लिखी गयी। इण कोटि में दयालदास री ख्यात राखी जा सकै है। दूजै भांत री वै ख्यातां है, जिण में क्रमवद्ध इतिहास रै स्थान पर फुटकर वातां पायी जावै। अगर इण वातां नै क्रमवद्ध कर दी जावै तो भी शृंखलावद्ध इतिहास ग्रंथ को वणै नी। इस भांत री ख्यातां में वांकीदासरी ख्यात उल्लेख करणै जोग है। ख्यात लेखक या तो ख्यात रो नामकरण आपरै नांव सूं कर देवतो हो, या जिण राजा या राजवंश रै नांव पर जिण नै वो आपरी ख्यात रो विषय वणावतो। उपर्युक्त ख्यातां में नैणसी री ख्यात व मुंदियाड़ री ख्यात में सतरहवीं सदी रै राजस्थान में राजपूत अर मुगलां रै संबंधां पर विस्तार सूं प्रकाश पड़े। वांकीदास री ख्यात सूं दूजी वातां रै अलावा अंग्रेज-विरोधी विचारधारा री जाणकारी मिलै। दोनू भांत री प्रमुख ख्यातां इण भांत है—

1. ठिकाणा मुंदियाड़ री पुस्तक, 2. राठौड़ां री ख्यात जोधपुर री, 3. परगना फलौदी रै गांव खारिया रै पठावतां री ख्यात (खुलासो), 4. ठाकुर रणजीतसिंघजी री ख्यात, 5. परगनै जालोर रै गांव भवरा रै राठौड़ वभूतसिंहजी खांप अडळावतां री पीढियां री ख्यात, 6. परगनै सोजत रै गांव वगड़ी खांप जेतावतां री ख्यात, 7. खांप कुमावतां री ख्यात, 8. खांप करणोतां री ख्यात, 9. खांप जोधाजी री ख्यात, 10. महाराणा अजीतसिंघजी री ख्यात, 11. खांप कांधळोत राठौड़ां री ख्यात, 12. खांप भिवोत राठौड़ां री ख्यात 13. खांप करमसोतां री ख्यात 14. ऊदावतां री ख्यात, 15. खांप मांडणोतां री ख्यात, 16. ख्यातरी वही वणसुर जादूदान री वही री नकल, 17. महाराजा श्री जसवंत सिंह री ख्यात, 18. रावसिंहाजी री ख्यात, 19. दिल्ली राजा पातसाह हुया जिणां री ख्यात, 20. मूता नैणसी री ख्यात, 21. ख्यात श्री कुचामन री 22. महाराजा सवाई सूरसिंघजी री ख्यात, 23. राव श्री मालदेवजी री ख्यात, 24. राव श्री सातळजी री ख्यात, 25. महाराजा श्री रायसिंघजी री ख्यात, 26. महाराजा श्री अभयसिंघजी री ख्यात

27. परगना नागौर रै गांवां री ख्यात, 28. परगनै विलाडै रै गांवां री ख्यात 29. खांप भादावत चांपावत अर कुंआवतां री ख्यात, 30. मुंदियाड ठिगाणै री ख्यात, 31. ख्यात बीकानेर रै राठौड़ां री, 32. दयालदास री ख्यात, 33. ख्यात नैनसी री, 34. जोधपुर री ख्यात, 35-36 जोधपुर रा महाराज मानसिंघजी री नै तखतसिंघजी री ख्यात, 37. बांकीदास री ख्यात, आदि । इण ख्यातां में राजस्थान रै राजवंशां रै इतिहास री जाणकारी मिलै ।

राजस्थान में ख्यात-लेखन रै साथै ही तवारीख-लेखन भी कम नीं हुयो । यद्यपि ओ लेखन अधिकांशतः उगणीसवीं सदी रै अंतिम दशकां अर उण रै बाद रो है । मुगल दरबार री भांत राजस्थान रा शासक बडा जागीरदारां नै आपरै स्वयं री अथवा आपरै पैली रा राज्यां, जागीरां अर उणां रै अन्तर्गत आवण बाळा गांवां री तवारीखां लिखावणी प्रारंभ कर दी ही । इण तवारीखां री विशेषता आ है कै अँ मुगल शासन में लिखीजणवाळी तवारीखां री दाई फारसी में नीं लिखी जायनै राजस्थानी में लिखवायोड़ी मिलै ! इण में कतिपय प्रमुख तवारीखां इण प्रकार है— तवारीख कुशलगढ राज्य, तवारीख खांप जोधा (दूसरो भाग), तवारीख महाराजा श्री तख्तसिंघजी, तवारीख जोधपुर महाराजा श्री विजयसिंघजी री, परगनै पाली रै गांव सेखा री तवारीख, सीतामऊ राज्य री तवारीख, रतलाम राज्य री तवारीख, टांटोटी इलाकै अजमेर री तवारीख, तवारीख रियासत झावुआ री, मालपुरा री तवारीख, श्री अजीतसिंघ जी री तवारीख, परगना मेड़ता गांव छातो री तवारीख, मोटाराजा उदयसिंघजी री तवारीख, तवारीख ठाकुरां राज श्री शिवनाथजी री महाराजा श्री गजसिंहजी री तवारीख, महाराजा श्री भीमसिंहजी रै राज री तवारीख, महाराजा सूरसिंहजी रै राज री तवारीख, राव गांगाजी री तवारीख, राव चन्द्रसेन जी व मोटा राजा उदयसिंघजी रै काळ री तवारीख, महाराजा श्री अभयसिंघजी री तवारीख, महाराजा श्री विजयसिंघजी री तवारीख, महाराजा मानसिंघजी री तवारीख, राव सूजाजी अर बाघाजी री तवारीख, महाराजा श्री विजसिंघजी री तवारीख आदि । मुगलकालीन तवारीखां री भांत आं तवारीखां में भी घणी सारी अतिशयोक्तिपूर्ण वातां समायोड़ी है, पण इणरै हुवता थकां इणरो ऐतिहासिक महत्व कम कोनी ।

राजस्थानी गद्य-साहित्य में वात साहित्य रो इतिहास भी महत्वपूर्ण आधारभूत सामग्री है । ख्यातां रै विभिन्न अध्यायां नै वातां रै रूप में लिखणै री परंपरा रैयी है । इणरै अतिरिक्त राजावां रै विशिष्ट व्यक्तियां अर उणांरै कार्यकलापां रै आधार माथै भी अणगिणत वातां री रचना हुयी है । समृद्धता री दृष्टि सँ राजस्थानी रो वात साहित्य सबसँ बेसी महत्वपूर्ण है । इण में सँ ऐतिहासिक वातां रो राजस्थान रै इतिहास लेखन में विशेष महत्व है । वातां री आ विशेषता है कै इण में सामान्य जन-जीवण री जाणकारी मिलै । वातां रो नामकरण भी ख्यातां री भांति ही राखीजतो हो । कतिपय प्रमुख वातां इण प्रकार है— बीकानेर रै राठौड़ां री वात, नागौर रै मामलै री वात, दिल्ली रै धणियां री वात, रायधण री वातां, लाखै फूलाणी री वात बीजी फुटकर वातां, फुटकर वातां रो संग्रह, जगदेव पंवार री वात, कुंवरसी सांखळा री वात, हाला झाला री वात, ढोला मरवण री

वातां, राव रिडमल री वात, पावूजी री वात, कान्हडदे री वात, नापै सांखळै री वात, राव अमरसिंहजी री वात, फीरोजशाह पातिसाह री वात अर मूमल री वात ।

वात साहित्य री दांई राजस्थान राज्य अभिलेखागार में वार्तावां रो संग्रह भी उपलब्ध है । वार्तावां ऐतिहासिक दृष्टि सूं काफी महत्त्वपूर्ण मानी गयी है । इण में कतिपय वार्तावां इण प्रकार है— वार्ता महाराणा सांगा री, वार्ता जलाल वूवना री, विविध वार्ता संग्रह, वार्ता शाहजादा कुतुबुद्दीन री, वार्ता रिडमलखां वड़िया री, वार्ता पन्ना री, वार्ता ढोला-मरवण री, वार्ता महचो कंवर जगमालसिंघजी री, भाटियां री ख्यात वार्ता, अनंतराय सांखळा री वार्ता आदि वार्तावां महत्त्वपूर्ण है ।

वार्ता साहित्य री भांति 'विगत' साहित्य भी ऐतिहासिक दृष्टि सूं घणो महत्त्व रो है । विगत रो शाब्दिक अर्थ वृत्तांत है । राजस्थानी में लिखी विगतां री संख्या कम कोनी । अठै आ वात उल्लेखनीय है कै आज रा इतिहासकार विगत साहित्य नै राजस्थान रै सामाजिक व आर्थिक इतिहास री जाणकारी रै वास्तै महत्त्वपूर्ण आधार सामग्री मान रैया है । महाराजा अनूपसिंघजी रै मुनसव रै तलव री विगत संवत् 1724 सूं 1752 तांई री मुगलकालीन घटनावां रै साथै तत्कालीन विषयां सूं संबंधित आंकड़ा भी प्रस्तुत करै है । नैणसी री मारवाड़ रा परगना री विगतां में, जिकी आज रै इतिहास री सर्वश्रेष्ठ आधारभूत सामग्री वणगी है, मारवाड़ रै परगना रै गांवां री भौगोलिक स्थिति, वाणिज्य, व्यापार, व्यापारी-मार्ग, विभिन्न स्रोतां सूं आय रा साधन, किसानां री स्थिति आदि पर विस्तार सूं प्रकाश पड़ै है । अभिलेखागार में प्राप्त कतिपय दूजी विगतां इण भांत है— महाराजा रामसिंघजी गढ ऊपर टीकै विराजिया री विगत, पुस्तक प्रकाश री जूनी वही में लिखी तिणरी विगत, श्रीजी साहवां रै अर रामचन्द्र रै व्याह री विगत, महाराजा जसवंतसिंघजी रै व्याह री विगत, महाराजा अजीतसिंघजी साहवां रै राज लोक री विगत आदि महत्त्वपूर्ण विगतां है । इण रै अतिरिक्त गहलोतां री चौबीस शाखां री विगत, कछवाहा-शेखावतां री विगत, जोधपुर-बीकानेर टीकायतां री विगत भी उल्लेखनीय है ।

राजस्थान में कत्ता लिखणै री परंपरा काफी समय सूं रैया है । कत्ता रो शाब्दिक अर्थ राजकीय विवरण सूं लेवां तो अतिशयोक्ति कोनी हुसी । इण वास्तै इण में ऐतिहासिक सामग्री भरपूर मात्रा में मिलै है । अभिलेखागार में पाया जावण वाला कत्ता घणा पुराना तो कोनी पण फेर भी काफी महत्त्व रा है । उण मांय सूं केई कत्ता इण भांत है— डावी मिसल रो कत्तो, महाराजा श्री अजीतसिंघजी रै समय रो कत्तो, महाराजा श्री अजीतसिंघजी रो जीवणी मिसल रो कत्तो, राठौड़ां रै गढावतां री बंदगियां रो कत्तो, सन 1885 सूं 1886 तांई महाराजा सरदारसिंघजी रै राजतिलक रो कत्तो, सन 1885 सूं 1889 तांई रो कत्तो, महाराजा श्री जसवंतसिंघजी द्वितीय रै जन्म अर अहमदनगर पधारणै रो कत्तो आदि महत्त्वपूर्ण कत्ता कैया जा सकै है ।

कुर्सीनांवां व वंशावळी रो ऐतिहासिक महत्त्व सर्वविदित है । राजस्थान राज्य अभिलेखागार बीकानेर में घणी सारी वंशावळियां अर कुर्सीनांवां मिलै है । इणां मांय सूं केई

प्रमुख वंशावलिओं अर कुर्सीनांवा इण भांत है— कुर्सीनांवा अचलदास खीची रो, राठीड़ वंशावली, वंशावली उणियांरा रा राव राजा फतहसिंघजी रो, खांप मेड़तिया विठलदासोत, केसोदासोत तथा मेड़तिया रघुनाथसिंघोत तथा आनंदसिंघोत रो कुर्सीनांवा, परगणै नागौर रै गांव माण रो पोटलिया रै जागीरदारां रायमलोत, नाहरसिंघ रै पट्टे रै गांव रो कुर्सीनांवा, नकल कुर्सीनांवा महाराजा साहब माढा, अचलदासजी, आसकरणजी, रावत सिंघोत, शंकरदास, भानीदासोत आदि रा कुर्सीनांवा अर खीचियां रा कुर्सीनांवा महत्वपूर्ण कैया जा सकै है।

राजस्थानी गद्य साहित्य में 'हाल' लिखणै रो परंपरा भी रैयी है। इण रो भी काफी अतिहासिक महत्व है। राजस्थान रै विभिन्न भागां में अनेक हाल मिलै है। महाराजा जोधा रो हाल व जोधा रो जन्म संबंधी हाल मारवाड़ रै इतिहास रै वारै में महत्वपूर्ण जाणकारी देवै। इण रै अलावा गद्य-साहित्य में अनेक दवावेत भी उपलब्ध है जिका हाल अर ख्यात रो भांत इतिहास रै वास्तै आधार-सामग्री रै रूप में महत्वपूर्ण कैया जा सकै है। दवावेतां में राजस्थानी शब्दां रै सागै उर्दू रै शब्दां रो प्रयोग भी हुवतो हो। उपलब्ध दवावेतां में महाराजा अजीतसिंघजी रो दवावेत उल्लेखनीय है।

राजस्थानी भाषा रै गद्य साहित्य रो भांत उण रो पद्य-साहित्य भी इतिहास रो आधार-सामग्री रै रूप में कम महत्व रो नीं है। इण अभिलेखागार में पद्य रूप में जिको साहित्य उपलब्ध है, उण में वचनिका साहित्य भी अतिहासिक दृष्टि सूं जाणकारी देवण में समर्थ है। वचनिका लिखणै रो आ विशेषता रैयी है कै किणी अतिहासिक व्यक्ति नै आधार वणायनै जिकी वचनिका रो रचना करीजती ही, उण में गद्य अर पद्य दोनूं हुवता हा। शिवदास चारण कृत अचलदास खीची रो वचनिका अर राठीड़ रतनसिंघजी महेसदासोत रो वचनिका उल्लेख करणैजोग है।

राजस्थानी रै पद्य साहित्य में 'नीसाणी' लिखणै रो भी परंपरा रैयी है। किणी व्यक्ति अथवा घटना रो स्तुतिपरक अथवा स्मरण दिरावण वाळी रचना नीसाणी कैयीजती ही। राजस्थानी साहित्य में नीसाणी रो भी अतिहासिक महत्व रैयो है। कतिपय उपलब्ध नीसाणियां इण प्रकार है— ठाकुर राजसिंघजी खीमावत रो नीसाणियां, नीसाणी परगना सोजत रै गांव पंचोटिया रै कशनोजी दुरसावत रो कही हुयी, नीसाणी ठाकुर विठलदास गोपाळदास चांपावत रो, नीसाणियां भंडारी गंगारामजी रो, नीसाणी सेवक मंछारामजी रो रो कही हुयी, नीसाणी वीरमाण रो, गोमैजी चौहाण रो नीसाणी अर आवेर रा महाराजा प्रतापसिंघजी रो नीसाणी उल्लेखनीय है।

नीसाणी अर वचनिका रो भांत 'वेलि' लिखणै रो परंपरा भी राजस्थान में काफी पुराणै काळ सूं रैयी है। इण कारण अठै वेलि-साहित्य प्रचुर मात्रा में मिलै। वेलियां में वीर रसात्मक वेलियां अतिहासिक महत्व रो है। प्राचीन राजस्थानी में लोकहित रै वास्तै प्राणोत्सर्ग करणैवाळा वीरां रो चारित्रिक विशेषतावां तथा उणां रै आदर्श कार्यां माथै घणी-सी वेलियां रो निर्माण हुयो है। सतरहवीं सदी में रचियोड़ी राठीड़ रतनसिंघजी रो

वेलि काफी महत्वपूर्ण है। वेलि साहित्य री दूजी महत्वपूर्ण वेलियां क्रिसण रुक्मणि री वेलि, बीकानेर महाराज पृथ्वीराज राठौड़ द्वारा विरचित अर राजा रायसिंघजी री वेलि, (ठाकुर माला सांदू) महत्वपूर्ण वेलि रचनावां है।

वचनिका अर वेलि रै अतिरिक्त राजस्थानी रै बीर रसात्मक साहित्य में अनेक काव्य गीत, फुटकर दूहा अवां छंद आदि अठै उपलब्ध है। इण दूहां, गीतां अर कवित्त आदि में डिगळ में छप्पय, कवित्त, रूपक, भमाल, भूलणा, मरसिया आदि रचनावां काफी महत्वपूर्ण है।

इतिहास रा अध्येता उक्त पद्य-साहित्य नै इतिहास री आधार सामग्री वणावै इण सूं पैली अनेकू नांवां सूं प्रसिद्ध इण साहित्य रो शाब्दिक अर्थ जाण लेवणो ठीक रैसी। रूपक सूं तात्पर्य उण काव्य या ग्रंथ सूं है जिण में किणी महान योद्धा रो चरित्र-चित्रण हुवै, किंतु वास्तव में ओ डिगळ गीत (छंद) विशेष है जिणरी संख्या 84 हुवै है। इणी भांत झमाल डिगळ रो वो छंदविशेष है जिण में छंद रै पछै चांद्रायण अर फेर उल्लाला छंद राख'र सिंहावलोकन री रीत सूं पढ़यो जावै। भमाल री भांत झूलणा 37 मात्रावां रो मात्रिक छंद अथवा 24 आखरां रो वर्णिक छंदविशेष है जिण रै अंत में यगण (ISS) हुवै। मरसिया किणी मृत व्यक्ति रै शोक में वणायोड़ो पद्य हुवै है। उण ऐतिहासिक घटनावां रै जिण रो दूजी मूळ सामग्री सूं सत्यापन नीं हुय पावै, सत्यापन रै वास्तै आ सारी सामग्री उपयोगी सिद्ध हुवै। अभिलेखागार में इण भांत री कुछ सामग्री इण प्रकार है— जोधपुर महाराजा जसवंतसिंघजी, मानसिंघजी, अजीतसिंघजी, देवीसिंघजी शेखावत, सीसोदिया भीमसिंघजी, राणा अमरसिंघजी आदि राजावां रा विड़द गीत, महाराजा अर बडा सरदार जिका युद्ध में काम आया तिणां रा विड़द अर यशगीत, कवित्त-छप्पय भटियाणाजी उम्मेदीजी राव मालदेवजी रै लारै सती हुवा तिण भाव रो, जयपुर, जोधपुर, उदयपुर, बूंदी, कोटा, जैसलमेर इत्यादि रै राजावां रा विड़द गीत, जोधपुर महाराजा बखतसिंघजी रो फुटकर गीत, कवित्त, छप्पय, इत्यादि, महाराजा जसवंतसिंघ, रामसिंघ, रायमल, राव मालदेव, पृथ्वीराज इत्यादि रा विड़द गीत, जोधपुर, सीकर, उदयपुर रै सीहाजी, बखतसिंघजी, राणा अमरसिंघजी तथा बडा सरदारां रा, जिका युद्ध में काम आया, विड़द गीत; उदयपुर, जयपुर रै राजावां समेत कोटा रै दुर्जनशाल तथा बडा सरदारां सूं संबंधित गीत; महाराजा अजीतसिंघजी, अमरसिंघजी, मानसिंघजी, व महाराणा प्रतापसिंघजी रा विड़द गीत; जोधपुर महाराजा अभयसिंघजी अहमदानाद रै नवाब शेखुलंद खां सूं झगड़ो करयो, उण सूं संबंधित छप्पय, किशनगढ़ महाराजा बहादुरसिंघजी, जोधपुर महाराजा मानसिंघजी, अभयसिंघजी, अजीतसिंघजी, सरदारसिंघजी अर बूंदी रा महारावल तथा जैसलमेर रा रावल गजसिंघजी अर देवलिया अर विदनौर रै ठिकाणां रा गीत; जैसलमेर, बीकानेर, बूंदी, कोटा तथा जोधपुर ठिकाणां रै सरदारां री बीरता रा गीत; आलिया चारण अखैदानजी कृत डिगळ भाषा काव्य-गीत, कवित्त, दूहा, छंद इत्यादि फुटकर संग्रह; उम्मेदसिंघजी रा कवित्त, छप्पय, छंद आदि, सांदू रिडमलदानजी कृत डिगळ भाषा काव्य-गीत, कवित्त फुटकर संग्रह; महाराजा बखतसिंघजी रो कवित्त, छप्पय, आढा चारण मूळराज कृत गीत-संग्रह, क्षेत्रपालजी

रा छंद, महाराजा मानसिंघजी रो जस कवित्त (आसिया वांकीदास कृत), फुटकर गीत दूहा, नाथियां तथा मोतीसरां रा दूहा, पोहकरण ठाकुर बभूतसिंघजी रा छप्पय, जळंधरनाथजी रो जस वर्णन, मेहड़ू महादान कृत नाथजी रा कवित्त, सेवक मघजी बड़लू वाळा कृत रूप-नगर री सतियां रा कवित्त, परगनो जसवंतपुरा गांव अवातर री रै गांव-चारण हणूदानजी री पुस्तक री नकल, फुटकर गीत कवित्त आदि, फुटकर गीत कविराजा गणेशदानजी री पुस्तक री नकल, फुटकर गीत, कवित्त, दूहा (खिड़िया पीरदानजी री पुस्तक री नकल), फुटकर गीत, कवित्त, दूहा आदिनाथजी रा, विविध गीत, कवित्त संग्रह, बारहट रूपदान कृत; विविध गीत संग्रह, आढा चारण चतुर्भुज कृत; फुटकर गीत कवित्त संग्रह, खिड़िया चारण हरसुख कृत; फुटकर गीत कवित्त संग्रह, वणासुर महादानजी कृत; विरद प्रकाश फुटकर गीत कवित्त,— वीकानेर रै गांव सीलवा रै चारण आसिया मोतीराम कृत; उदयपुर, जोधपुर रै सरदारां अर राजावां रा फुटकर गीत; पावूजी रा छंद; चौथ री कथा तथा अन्य फुटकर गीत, राजावां सरदारां अर वडा ठाकुरां रा यश अर वीरता रा गीत; महाराजा सूरत-सिंघजी, महाराजा गजसिंघजी, राजा जसवंतसिंघजी, राव चौड़ो धूहड़जी, छत्रशालजी संबंधी गीत, विविध गीत संग्रह रो गुटको, जोधपुर रै राजा तखतसिंघजी रा कवित्त, छप्पय, तथा छंद आदि रो संग्रह; फुटकर गीत संग्रह कवित्त, दूहा आदि गोरखदान री पुस्तक मांय मूं लिया हुवा, डिंगळ काव्य फुटकर विविध गीत चारण शंकरदानजी री पुस्तक मूं संग्रहीत; आसिया मोतीराम कृत गीतां रो फुटकर संग्रह, बारठ रूपदान कृत विविध गीत संग्रह, चारण आढा चतुर्भुज कृत फुटकर गीत संग्रह; रतनू चारण पावूदान अर जुगतीदान कृत गीत संग्रह; बारठ विहारीदास कृत फुटकर गीत कवित्त संग्रह; चारण दुरसाजी कृत विविध गीत संग्रह; सांदू चारण घनश्यामजी कृत विविध गीत संग्रह; बारठ देवकरण रतनू चारण, पावूदान अर जुगतीदान कृत फुटकर गीत, कवित्त दूहा अर निसाणी; सिढायच पीरदान कृत फुटकर गीत, कवित्त अर दूहा संग्रह; जेतदान संग्रहीत फुटकर गीत, कवित्त अर दूहा; रतनू चारण गणेशदान तथा खेमदान द्वारा संग्रहीत फुटकर गीत, कवित्त; डिंगळ भाषा काव्य, गीत, कवित्त, दूहा अर छंद; सांदू चारण शोभजी कृत फुटकर गीत; बारठ रुद्रजी कृत फुटकर गीत, कवित्त अर दूहा; चारण नाथूदानजी कृत फुटकर गीत, कवित्त अर आढा पहाड़सिंघ विरचित फुटकर गीत-संग्रह उल्लेखनीय है।

गीत, कवित्त अर दूहां री भांत झमालां में उदयपुर महाराणा री झमाल, रतनू चारण कृत जोधपुर महाराजा री झमाल अर पोकरण देवीसिंह री झमाल उल्लेखनीय है। इणी भांत महत्वपूर्ण रूपकां में मोतीसर वखतावर कृत पावूजी रो रूपक, गोगाजी रो रूपक, महाराजा वजरंगसिंघजी रो रूपक, चारण रामदीन कृत विरदप्रकाश रूपक, महाराजा गजसिंघ अर आयश देवनाथ रो रूपक उल्लेख करण जोग है। महाराजा मानसिंघ रो मरसियो अर रायसिंघ रो झूलणो, प्रमुख मरसिया नै झूलणां में उल्लेखनीय है।

उपर्युक्त सामग्री रै अतिरिक्त हिंदी अर राजस्थानी में लिखी दूजी अनेक रचनावां इण अभिलेखागार में उपलब्ध है, जिकी मध्यकालीन राजस्थान रै इतिहास री जाणकारी

रै वास्तै बहोत महत्वपूर्ण है। इणां मांय सूं केई इण भांत है— गुण भाषा चित्र महाराजा गजसिंहजी रो कह्यो, हेमकवि कृत तवारीख पातसाह री; विजय विलास, कवि बारठ विशनसिंह कृत, रतनरासो कविराजा गणेशदान कृत, भरतपुर रो इतिहास, झाबुवा राज्य रो संक्षिप्त इतिहास, सीतामऊ राज्य रो संक्षिप्त इतिहास, पृथ्वीराज दोलमतोत री विजय, गुण जिहाज महाराजा श्रीगजसिंहजी रा, गुण कुंडलिया सांवळदास भोजराजोतरा, गुण महाराजा श्रीगजसिंहजी रो हेमकवि कृत, बडा महाराजा श्री मानसिंह रा ख्यालातां रो खरडो, महाराजा मानसिंहजी रो राजविलास, देशी नाममाला, आढा सामदान कृत नाथजी रो वर्णन, गोगामेड़ी आसाजी री कही हुयी, मानजसोमंडण, आसिया बांकीदास कृत वीर सतसई, चारण सूरजमल कृत नाममाला डिगल, हमीर रतनू कृत ओसवाळ उत्पत्ति, अनेकार्थ मंजरी नंददास कृत, परगना मलाणी रै गांव सेताराऊ री खांप, राठौड़ जैतमलोत तथा बाला नराराजोत दूदावत तथा वीदावत री खांपा, रजिस्टर खांप पतावतां री, रजिस्टर खांप नक्शो शेखावत लाडरवाणियां रो अर ऊदावतां राठौड़, गांव जसोल खांप करमसोत रा नक्शा, रजिस्टर गोगादे, पांगळिया, भाटी जैसा आदि री खांपां, रजिस्टर नक्शा मेड़तियै रघुनाथ सिंघोत चांदावत कल्याणदासोत इत्यादि पुराणी खांपां राठौड़ां री अमरखाण, रावजी श्री अमरसिंहजी रै समय रो रजिस्टर, राव रायसिंहजी अमरसिंह रै काळ रो रजिस्टर, महाराजा श्री जसवंतसिंहजी रै काळ रो रजिस्टर, महाराजा श्रीअभयसिंह रै काळ रो रजिस्टर, महाराजा श्री विजयसिंहजी रै काळ रो रजिस्टर, महाराजा तखतसिंह जी रै काळ रो रजिस्टर, महाराजा श्री भीमसिंहजी रै काळ रो रजिस्टर, महाराजा श्री सरदारसिंहजी रै काळ रो रजिस्टर, महाराजा श्री सुमेरसिंहजी रै काळ रो रजिस्टर, उदयपुर रै कविराजा श्यामलदासजी विरचित वीर विनोद में सत्ताजी सूं मंडोवर लेवण रो वृतांत, महाराजा मानसिंहजी विरचित जळंधर नाथजी रो जसभूषण पिगल गुणग्रंथ, आलमगीर नामा, पृथ्वीराज रासो चंदवरदायी कृत अर ग्रंथ लच्छ सतसंग बारठ विहारी-दास कृत ।

इण फुटकर रचनावां रो राजस्थान रै इतिहास लेखन में घणो महत्व है। मुगलकाळ सूं लेयनै राजस्थान में मराठां रो आक्रमण अर उणां पछै अंग्रेजीं सत्ता द्वारा रजवाड़ां रै आंतरिक मामलां में भरपूर मात्रा में हस्तक्षेप री सूचना इणां सूं मिलै। राव जैतसी रो छंद वीठू सूजा रो कह्यो, में वीकानेर माथै कामरान द्वारा कियै गयै आक्रमण अर वीकानेर रै शासक राव जैतसी द्वारा उणनै हरायै जावण रो महत्वपूर्ण वर्णन मिलै। राजरूपक में जोधपुर रै राठौड़ शासकां रो औरंगजेब रै मुगल सेनापतियां रै साथै हुयोडा युद्धां रो वर्णन करचो गयो है। उगणीसवीं सदी में बूंदी राज्य रै चारण कवि सूर्यमल्ल मीसण द्वारा रचित वंश भास्कर अर वीर सतसई क्रमशः राजस्थान में मराठा अर अंग्रेज विरोधी भावना री जाणकारी खातर महत्वपूर्ण आधार-सामग्री है। बांकीदास, महाराजा मानसिंह (जोधपुर) अर अन्य केई चारण कवियां आपरी अंग्रेज-विरोधी भावना सूं राजस्थान रै जनमानस नै झकझोर कर राख दियो। □

—अलखसागर मार्ग, वीकानेर-334 001

वीकै बीज थरप्पियो

परमेश्वर सोलंकी

इसो लखावै कै वीकोजी रीसां बळता जोधपुर छोडियो अथवा वानें देश निकाळो हयो, कारण उणारै कंव्रपदै में घणी मुस्कलां आयगी। संवत् 1521 में राजकुंवर नींवो देवलोक हुग्यो। उण पाछै वीको वडो कुंवर हो पण रावजी सूजै नै कंव्रपदो देवण रो कोल उणरी मां सूं कर लीनो। इण वात सूं घणी आळपताळ हुई अर छेकड़ सं. 1522 में चाचो कांधळ, मंडळो, रूपो, मांडळ, ऊधो अर नाथू साथै वीको, बीदो, जोगो अर नापै सांखळै सागै घणकरै मानखै जोधपुर छोड दियो। अै सगळा बाघोड़ा रै ठिकाणै में चांडासर आय बैसिया। अठै सं. 1516 में जोधै खुद आपरी मां कोडमदे रो कीरत थंभ ऊभो कीनो हो अर अठै हीज आपरा दोरा दिन काटिया हा। जद राव रिंगमल चित्तौड़ में धोखै सूं मारीज्यो तो जोधो उठै सूं वच निकळघो अर बाघोड़ा रै ठिकाणै में घणा दिनां रैयो।

उणी भांत रीसां बळतो वीको पण आपरै असलै-मसलै साथै दादेरै में ढूकियो। उण रो विरोध साचो हो पण रावजी कोई सुणवाई नहीं करी जणै संवत् 1529 में वीको खुदोखुद स्वयंभू राजा वणियो। वीकै सागै जोधाजी रा भाई हा। दूजा मिनख ई घणकरा हा। पण राज अर घरती बिना वीकै नै कोई राजा नहीं मानियो अर कोई पण आपरी राजकुंवरी कोनी दी। इण वेळा चारणी माता करणीजी उण नै आशीष दी अर चारणी माता री राजनीति सूं वीको जांगळूधणी वणियो। उण रो सगपण पण पूगलराव शेखा री बेटी रंगकुंवरी सागै हयो।

जांगळू उण वेळा कमजोर ठिकाणो हो अर थळी में उण री गिणती ठावै ठिकाणै ज्यूं नीं हुवती। इण सूं वीकै आपरै दादेरै कनै नूवो गढ़ वणावण सारू तजवीज करी। भाटियां नै ठाह पड़ी तो वै घणा नाराज हुया। कजियो हुयो। कजियै में वीकै मात खाई अर पाछा भागता थकां उण रो चाचो मांडळ काम आयो जिणरी देवळी पलाणै में ऊभी है। ओ वाको संवत् 1539 रो है।

थळी में उण वेळा किलूरगढ़ (पल्लू) सिंहाण कोट (वड़ोपल) अर खड़ाळ (अनूपगढ़) अै तीन वडा ठिकाणा हा। दिखणाद में भाटियां रो पूगळ अर मारोठ अर उत्तराद मोहिलवाटी में ददरेवो अर द्रोणपुर हा। उणां सूं आगै अेक तरफ क्यामखानी अर दूजी तरफ हिसार में दिल्ली रो सूबैदार सारंगखां हो जिको टीबी परगनो अर भटनेर जोहियां सूं लेयर घणो मजबूत हो। जोहियां और सूबैदार बिचाळै जाटायत रा ठिकाणा हा,

जिणां में गोदारा, पूनिया, कंसवा अर सारण—वेणीवाळ ठावा हा । वीको पण थळी रो खास सिरदार वणियो । चारणी माता री मेहर सू थळी रा झगडा-फिसाद हुवता तो वीको हाजिर रैवतो और देशणोक सू जद-तद धाड़ा मारतो अर दूर-दूर ताई पैडो करतो ।

रातीघाटी उण वेळा घणो ठावो अर सुरक्षित स्थान वणियो । देशनोक सू बहावलपुर (जोहियार) जावणो होवतो तो रातीघाटी सू पूगळ, मौजगढ़ हुयर मारग हो । भिवाणी पण रातीघाटी सू काळू, रेणी, राजगढ़ सू जावणो पड़तो । इण भांत सिरसा वास्तै भळै रातीघाटी सू मालासर, सुई, पल्लू, नोहर देयर मारग वैवतो । रातीघाटी सू नागौर, फलौधी, जोधपुर अर पुष्कर वास्तै देशणोक सू टळता मारग हा ।

इसै ठावै स्थान पर भीनाशहर रै सेठ भाण्डाशाह अेक जैन मंदिर वणावण रो मतो करयो । वीकै शाह नै सुरक्षा दीवी । इण भांत भीनाशहर सू उतराद में ऊंचै डिगळै ऊपर मंदिर रो काम सरू हुयो । काम सरू हुवण री तिथि मालूम कोनी पण ओ काम संवत् 1542 पछै सुरू हुयो हुवैला । मंदिर रो निर्माण घणो धीमो अर मधरो चाल्यो । पाणी री अवखाई सू चेजो बार-बार रुक जावतो । मंदिर में लिखियोडै शिलालेख मुजब शाह भांडा रो प्रासाद श्री लूणकरणजी रै राज में संवत् 1571 आसोज सुदि 2 रविवार नै पूरो हुयो बतायीजै ।

भांडासर मंदिर सू पैली नेमिनाथ मंदिर वणियो जिको संवत् 1570 में पूरो हुयग्यो । ओ मंदिर अवार रै लक्ष्मीनारायण पार्क में वणियो है जिको कर्मसिंह लगोलग 14 वर्ष ताई अन्नसत्र चलायनै संपूर्ण करायो हो । लाहोर में संवत् 1650 में लिखियोड़ी कविता-पोथी इण नेमिनाथ मंदिर री नीव संवत् 1556 में लागी बतावै जदकै नागौरी लुंकागच्छ री पट्टावली चउवीसटैजी रो मंदिर (भुजिया बाजार) संवत् 1562 में वच्छावतां शुरू कीनो लिखै अर वैद चौक अर आचार्य चौक विचाळै वणियोडै महावीर मंदिर वास्तै संवत् 1578 आसोज सुदि 10 नै नीवरो पायो भरघो लिखै है । इण महावीर मंदिर में प्रतोळी वणण रो अेक पद्य-वद्ध लेख है जिण में राठउड़ अधिकार बताईज्यो है पण राजा रो नांव साफ पढण में नहीं आवै । शिलालेख में महावीर नै 'माहिदेव महावीर आप आदि आप पीरः' लिखियो है । 'जिनचन्द्रसूरि विहार-पत्र' सू इण मंदिर री प्रतिष्ठा संवत् 1663 में हुयो बताईजै ।

इण भांत आ वात साफ-साफ निजूर आवै कै वीकोजी री मौत संवत् 1561 ताई वीकानेर नहीं वसियो पण संवत् 1556 में आजकाल रै लक्ष्मीनारायण पार्क कनै जिको अन्नसत्र सुरू हुयो वो अन्नसत्र 14 वरसां ताई चाल्यो अर नेमिनाथ मंदिर रो मंदिर-निर्माण संवत् 1570 में पूरो हुयां पछै बंद करीज्यो । इण विचाळै हीज वीकोजी देव्लोक हुग्या जिण सू उणां री टेकरी ई मंदिर नैडै वणाईजी, हुय सकै है ।

वीकोजी बीज जरूर थरपियो पण बीज नै उगा नहीं सकिया—आ बात इणसू पण भळै साफ-साफ निजूर आवै कै संवत् 1546 में जद कांधल नै सारंगखां मार नाख्यो उण रो बदलो लेवण जोधोजी आया । जीत पछै उणां वीकै नै शाबाशी दी अर उण सू कोल करा

लीनो कै वो जोधपुर भायां वास्तै छोड़ देसी । जोधोजी वीकै सूं लाडनूं परगनो पण छुडवाय लीनो । वीकै रावजी री आज्ञा मान ली पण राजचिह्नां पै आपरो हक जतायो अर अरज करी कै राजघराणै रा सगळा राजचिह्न उणनै मिलणा चाहीजै । रावजी वीकै री अरज मान ली । उण पछै सं. 1547 में जोधोजी देवलोक हुया । सं. 1548 सूं सं. 1550 ताई वीको जोधपुर सूं लड़तो-भिड़तो रैयो । उण पछै वीको सिहाळकोट रै मलिक जोड़या, बडोपल रै शेरसिंह अर खड़ाळ रै शुभराम सूं लड़ियो । जोहियां रो मुखियो तिहुणपाळ लूणकरण अर जैतसी सूं पण लड़तो रैयो हो । उण री कोशिश सूं हीज कामरां वीकानेर माथै आक्रमण करयो । इण सूं आ वात भळै साफ हो जावै कै वीकै नै जीवण भर जूझणो पड़ियो । उणरो जीवण सुख-शांति सूं नहीं कटियो अर उणरै नांव माथै उणरा वंशज हीज वीकानेर वसायो ।

□

पो. वो. नं.-6

वीकानेर-334 001

पवणउत (पवन-पुत्र)

(पुराणा दूहा)

हणमत हिया तणाह, मिळियो राम मनोरथां
भीछां भीर थियांह, पैसां नरींद पवणउत 1

लायो लाखै वाह, गिरिवर पै गड़िया जिहीं
रैसै रामण काह, परधा ऊपरि पमणउत 2

तूं घेरियो घणैह, हणुवा हड़वड़ियो नहीं
जुधि जूजुवो जुड़ैह, पूगो पमण नरींदउत 3

वलिहारी वह जीवियां, वह जियां वहो दिट्ट
राघव रथि घोड़ा खड़ै, हणमंत धजा वयट्ट 4

तै कोपियै ज काळ, लाई गढ़ लंका तणो
ब्रह्मंडळ लगि बराळ, पूगी पवण नरींदउत 5

ऊंडै असर तणैह, मांही तूं पायो महण
ग्यो चत्रभुज चालैह, पाजां ऊपरि पमणउत 6

(श्री सौभाग्यसिंह शेखावत रै संग्रह सूं)

वीकानेर रै राजावां रो शेखावतां सूं संबंध (मूहता वखतावरसिंह रो ख्यात रा उद्धरण)

सुरजनसिंह शेखावत

मूहता वखतावरसिंह वीकानेर रै महाराजा जोरावरसिंह रै शासन काळ सूं ही राज्य रै प्रमुख पदां पर काम करतो आ रैंयो हो। महाराजा गजसिंह रै समय में तो वो उण रै प्रधान दीवान तथा विश्वस्त सलाहकार रै रूप में उभरनै सामनै आयो। वीकानेर राज्य रै घणासारा सैनिक अभियानां रो संचालन करनै उण आपरी सैनिक दक्षता रो परिचय दियो। दिल्ली रै मुगल सम्राट अहमदशाह वि. सं. 1809 (सन् 1752 ई.) में उणनै राव रै खिताव सूं अलंकृत करनै संमानित करचो हो¹। अपनै समय रो वो अेक प्रसिद्ध व्यक्ति हो। उण रै समय में घटी प्रमुख राजनीतिक घटनावां रो विवरण 'मूहता वखतावरसिंह की ख्यात' नांव सूं लिख्यो मिलै है, जिको ओजू ताई अप्रकाशित है। इण ख्यात रो अेक हस्तलिखित प्रति भूतपूर्व जयपुर राज्य रै अंतर्गत चांपावतां रै काणोता ठिकाण रै पोथी-खाने में सुरक्षित है। उण ख्यात में वीकानेर, जोधपुर, उदयपुर तथा जयपुर रै शासकां री आपसी मैत्री, संधि, विग्रह, व्यांव अेवं दूजी तत्सामयिक महत्त्वपूर्ण घटनावां रो वृत्तांत लिख्यो गयो है। इण ख्यात सूं वीकानेर रै महाराजा गजसिंह रै सागै शेखावाटी रै शेखावतां रै—प्रमुख रूप सूं झूंझणू रै शेखावतां रै—आपसी संबंधां पर भी यथेष्ट रोचक अर प्रामाणिक प्रकाश पड़ै है। उणी ख्यात सूं की प्रमुख घटनावां रा विवरण अठै उद्धृत करीजै है, जिका इतिहास रै जिज्ञासु पाठकां वास्तै उपयोगी सिद्ध हुसी।

1. मित्ती सावण वदी 12 संवत् 1807 नै वीकानेर रा महाराजा गजसिंह नागौर रै राजाधिराज वखतसिंह नै जोधपुर रो राज दिरायनै पाछा वीकानेर पधारचा। उणी वखत रिणी सूं मूहता भीमसिंह भी आयो। महाराजा उण सूं पूछियो—'म्हारै लारै सूं शेखावतां देश में विगाड़ क्यूं करचो?' मूहता अर्ज करी—'जालेऊ गांव रै वीदावत बुधसिंह किशनसिंहोत शेखावतां रै गांवां रो विगाड़ कीधो—लूटपाट करी, उणरो वदळो लेवण वास्तै सीकर रै शेखावत सिमरथसिंह शिवसिंहोत सोभागदेसर री तरफ सूं दो गांव लूटता थका जालेवू पूग्या अर दूसरै कानी सूं भूंभणू रा शेखावत नवलसिंह अर केसरीसिंह सादावत (शार्दूलसिंह रा वंशज) सीधा जालेवू माथै चढनै आया जणां वीदावत म्हारै कनै आया अर पुकार मचायी कै शेखावत देश नै लूट रैंया है। हूं रिणी सूं जमीयत लेयनै चढचो अर रावत धीरसिंह संग्रामसिंह वणीरोत री जमीयत साथै हुयी। म्हारो डेरो गांव गोवळसर में हुयो, जठै मनरूप जमीयत लेयनै वीकानेर सूं आवतो हुयो—ओ समाचार सुणनै म्हारै कनै

पूग गयो। शेखावतां ओ कैवायो कै आप लोगां रो काई विचार है ? उणां जवाव में कैवायो कै म्हे देश में विगाड़ को करां नी। म्हांरो वर जालेवू रै ठाकर सूं है सो म्हे उणसूं लड़सां। उणां केई दिनां ताई जालेवू नै घेरचां राख्यो। अंत में गांव मोलासर में जायनै हूं शेखावतां सूं मिल्यो, उणां नै समझायो अर जालेवू रो वर तुड़ायो (आंटो भंजायो)। जद जायर उणांरो बठै सूं कूच हुयो। (ख्यात, पानो 77)।

2. भादव वदी 13 संवत् 1809 नै जोधपुर रै राजा वखतसिंह रो देहांत हुयो। जोधपुर विजयसिंह रै वास्तै टीकै रो दस्तूर भेजने महाराजा गजसिंह दौरै साथै रवाना हुया। गांव बुधणावू रै मुकाम पर ठाकर नवलसिंह शेखावत रा मुत्सद्दी महाराजकुमार राजसिंह रै व्यांव रो लग्न तय करणै आया। लग्न तय हुयो। मिति माघ सुदी 5 संवत् 1809 रै दिन वरात झूंझणू गयी। नवलसिंह री बाई चंदणकुंवरी रो व्यांव महाराजकुंवार रै साथै संपन्न हुयो। शेखावतां वरात री वढचढ नै खातरी करी। चारण-भाटां दिल खोलने त्याग वांटयो। (ख्यात पानो 80)।

3. महाराजा गजसिंह जोधपुर रै महाराजा विजयसिंह रै साथै जयपुर जावता हुया शेखावतां रै देश सूं गुजरचा जद ठाकर नवलसिंह पोह वदी 10, सं. 1812 नै महाराजा रै वास्तै अक घोड़ो, सिरोंपाव अर मिठाई भेजी। वडै प्रेम सूं आ राख ली गयी। फेर पोह वदी 12 नै स्वयं ठाकर नवलसिंह तथा सीकर रा राव चांदसिंह महाराजा सूं मिलणनै आया। वडी आत्मीयता सूं मिलाप हुयो। (ख्यात, पानो 87)।

4. माघ सुदी 14 संवत् 1812 नै महाराजा गजसिंह शादी करणै जयपुर जा रैया हा। शेखावत नवलसिंह मनवार करनै महाराजा नै वरात साथै झूंझणू लेयग्या। पूनम रै दिन मिजमानी दी। अक हाथी अर अक घोड़ो भेंट करयो। केवल घोड़ो राख्यो गयो। फागण वदी अकम रै दिन शेखावत केसरीसिंह (विसाऊ) अर भोपालसिंह (खेतड़ी) मिजमानी दी। तीन घोड़ा भेंट करचा। फागण वदी 3 नै उणां नै विदा करचा। वरात रै वापस लौटती वखत भी नवलसिंह वरात नै झूंझणू लेयग्या अर यथोचित स्वागत-सत्कार करयो। (ख्यात, पानो 88)।

5. परगना पूनियां रा दो गांव शेखावत हाळीराम (सुळतानां) अर भोपालसिंह (खेतड़ी) जबर्दस्ती दबा लिया हा। महाराजा गजसिंह इण वात सूं नाखुश हा। उणी दिनां में सिधाणा परगनै रै इधकार नै लेयनै झूंझणू रै शेखावतां में विवाद चाल रैया हो। अक तरफ शेखावत नवलसिंह अर केसरीसिंह हा अर दूसरी कानी जोरावरसिंह रा बेटा तथा खेतड़ी रा भोपालसिंह किशनसिंहोत हा। महाराजा बीकानेर सेना देयर मुंहतै वखतावरसिंह नै नवलसिंह री मदद वास्तै भेज्यो। सिधाणा सूं तीन कोस री दूरी साथै फौज पड़ाव नाख्यो। जणां भोपालसिंह (खेतड़ी) जयपुर रै महाराजा सवाई माधोसिंह रै कनै अरजी भेजी कै म्हारा काका म्हारै खिलाफ बीकानेर री सेना लायनै लड़नै री तयारी कर रैया है। इण पर जयपुर महाराजा राजावत खनाथसिंह दलेलसिंहोत नै सिधाणा भेज्यो। उण दोनूं पखां नै समझाय नै सुलह-सफाई करायी। बीकानेर रै पूनियाण परगनै रा दो गांव जिका

हाथीराम दबा लिया हा वापस बीकानेरवालां नै दिराया । आ घटना विक्रमी संवत् 1813 रै भादवै महीनै नें घटी । (ख्यात, पानो 94) ।

6. साईदासोत कांधळोतां नै सजा देवण नै महाराजा गजसिंह कूच करने संवत् 1814 री भादवा सुदी 13 नै ददरेवै में मुकाम करचो । उण वखत शेखावत नवलसिंह अर केसरीसिंह चार हजार सैनिकां रै सागै महाराजा रै साथै हुया । भादरा रै लालसिंह साईदासोत सेवा में हाजर हुवणै री अर्ज करायी । लालसिंह नै महाराजा कनै लावण वास्तै केई सरदारां नै भेज्या । लालसिंह दो कोस ताई तो उणां रै सागै आयो । पछै ना मालूम उणनै कांई वहम पड़चो कै वो उठै सूं ही ओ कैयर पाछो चल्यो गयो कै दो दिन बाद आसूं । आ जाननै महाराजा उणरो पीछो करणै वास्तै फौज भेजी जिण रो संचालन नवलसिंह शेखावत कर रैया हा । मारग में साईदासोतां रो ठिकाणो डूंगराणा पड़तो हो । उठै री गढी में सांवतसिंह दौलतरायोत हो । उण मुकाबलो करचो । दो दिन ताई लड़ाई हुवती रैया । दोनूं पखां रा घणा-सा आदमी हताहत हुया । शेखावत महासिंह भगवतसिंहोत काम आयो । शेखावतां गढी नै तोपां सूं तोड़ नाखी । सांवतसिंह लड़ाई में खेत रैया । उण रो सिर लेयनै शेखावत पाछा आयग्या । नवलसिंह महाराजा सूं अरज करी—सांवतसिंह मारचो गयो, आपां री जीत हुयी । अवै उण री जनानां नै रुखवाळां रै सागै वाइज्जत भादरा भेजणी चाहीजै । हूं लूट नै बंद करनै आयो हूं । महाराजा रथ भेजनै सांवतसिंह री जनानां नै भादरा भिजवा दी । अंत में शेखावत नवलसिंह रै प्रयत्न सूं लालसिंह रो वचाव हुयो । गांव रामसलाणा रै तळाव मकसूदाणै रै किनारै महाराजा रा डैरा हा । नवलसिंह री मारफत लालसिंह हाजिर हुयो अर माफी मांगी । उणनै माफी बगसी गयी अर जागीर वहाल हुयी ।

रावतसर माथै भी शेखावतां री फौज गयी । उठै रा स्वामी आनन्दसिंह नवलसिंह सूं मिलनै महाराजा सूं क्षमा याचना करी अर पच्चीस हजार रुपयां री पेशकश देयनै घेरो उठायो । (ख्यात, पानो 94) ।

7. संवत् 1815 में महाराजा रा डेरा रिणी में हा । खबर मिली कै शेखावत केसरी-सिंह अर जोरावरसिंह रै वेटां वणीरोतां सूं छेड़छाड़ करी अर उणां रै गांवां नै लूट लिया । महाराजा रावत लालसिंह, भादरा अर मूंहता बखतावरसिंह नै उणां रै मुकाबलै पर भेज्या । बै चूरू जायनै उतरचा । दोनूं कानी सूं दोनां रै गांवां रो विगाड़ हुवण लाग्यो । वखेड़ै नै वधतो देखनै नवलसिंह रै प्रधान महाराजा सूं अरज करी कै बीकानेर री तरफ सूं किणी जिम्मेवार व्यक्ति नै भेज्यो जावै जिणसूं वखेड़ो मिटायो जावै । इण पर पुरोहित जगरूप नै भेज्यो गयो । दोनूं पखां नै समझायनै शेखावतां नै बीकानेर री सरहद सूं कूच करवाया अर दरबार री सेना रिणी पाछी आयगी । (ख्यात, पानो 98) ।

8. संवत् 1824 री साल में शेखावत नवलसिंह लुहारू माथै चढ़ाई करी । उणरै वेटै कंवर नरसिंहदास महाराजा सूं मदद वास्तै अरज करी । इण पर मूंहताजी (बखतावर-सिंह) नै भेज्या गया । बै बीदावतां री खेड़ लेयनै शेखावतां रै सामल हुया । पनरै हजार

सैनिकां री फौज सागै लुहारू माथै घेरो नाख्यो । अक-दो वार जबर्दस्त लड़ाई हुयी, पण किलैवाळां रो घणो नुकसाण नीं हुयो । लड़ाई लांबी चालती देखनै मूहताजी वीच में पड़नै समझौतो करायो । (ख्यात, पानो 107) ।

9. मिती चैत वदी 4 संवत् 1826 महाराजा गजसिंह री पोती अर महाराज-कुमार राजसिंह री बेटी सरदारकुंवरी रो व्यांव जयपुर रै महाराजा सवाई पृथ्वीसिंह रै सागै हुयो । महाराजा गजसिंह रो सुसराळ अर राजसिंह रो नानाणो महार (जयपुर राज्य) रै कुंभावतां रै अठै हो । महारवाळां च्यार हजार रुपिया मायरै में दिया । नवलसिंह शेखावत भी उण मौकै पर मायरो लेयनै वीकानेर गया । उणां पचास हजार रुपिया नगद अर हाथी, घोड़ा, वेस अर सिरापाव सब मिलायर अक लाख रुपियां रो मायरो भरचो ।

(ख्यात, पानो 111) ।

महाराजा गजसिंह रै पछै वीकानेर रा हुवणवाळा महाराजा सूरतसिंह भी शेखावतां रै साथै मैत्री-संबंध पैली ज्यू वणायो राखण री नीति रो ही पालण करता रैया । ठाकर नवलसिंह, नवलगढ़ री मौत हुयां पछै उणां रै बेटै नरसिंहदास शेखावत नै महाराजा सूरतसिंह द्वारा भेज्योड़ा खास रुक्कां रै अवलोकण सू उक्त तथ्य माथै यथेष्ट प्रकाश पड़ै अर इतिहास सू संबंध कीं नूवी जाणकारी भी मिलै है । इणां मांय सू कतिपय खास रुक्कां रा कीं अंश अठै उद्धृत करचा जावै है—

1. 'ठाकरां नरसंघदासजी सू म्हारो जुंहार वंचै । अप्रंच हकीकत फौजदार सिरदारै सू मालूम कीवी सो ठाकरां को भरोसो छो तीं माफिक चाकरी कीवी । आगै ठाकरां नवलसिंहजी रो सीर संबंध छो जी माफिक जीसोइज ठाकरां जणायो सो सगा छो म्हारै घणी वात छो हमें ओ काम सताव सू पेस पोंहचै । सु वात करसी—इयै रो जस ठाकरां नै छै—ठाकरां रै काम पड़सी तो अठै सू मदत हुसी.....मिती पोस वदी 15, संवत् 1845 का' ।

2. ठाकरां नरसंघदासजी सू म्हारो जुंहार वंचै । अप्रंच चूरू सू राठौड़ सिवसिंह हरीसिंघोत री अरज आई छै, तीमें लिख्यो छै अंबेर री फौज सेखावतां नै मामलत करण सारू आई छै सो पैली तो इण वात रो संको क्यूं न रह्यो । तयार फौज रा डेरा कोस दोय कोस आय हुया म्हां सू कजियै रो विचार छै सु अंबेर रै दरबार ओर म्हारै कदीम सू हेतारथ चल्यो आवै छै ज्यूं ही वधतो रैसी-फेर ठाकर फौज में छो सो सुणण में आवै छै खांच कर फौज लावै छै सो आ वात मानण में तो न आई-म्हे तो ठाकरां थकां सारी वात निश्चित छां सु घणी खायत राखसी—बीजा समाचार सा. संभुराम, गाडण गोरखदान नै फुरमाया छै सो कहसी.....मिती भादवा सुद 12 समत् 1846 का' ।²

महाराजा सूरतसिंह रा बेटा महाराजा रतनसिंह रो व्यांव शेखावाटी रै डूंडलोद संस्थान रै ठाकुर रणजीतसिंह री बेटी राजकुंवरी रै साथै संपन्न हुयो हो, उणी महाराणी शेखावतजी रै गर्भ सू महाराजा सरदारसिंह रो जन्म हुयो । इण दोनू महाराजां शेखावतां रै साथै रै निकटतम संबंध नै प्रेम अर आदर - भाव रै सागै वणायो राख्यो । डूंडलोद रै

शासक ठाकुर शिवसिंह (शिवजीसिंह) ने बीकानेर राज्य में चार गांव जागीर में दिया गया हा, जिका जागीरसमाप्ति ताई उणां रै अधिकार में हा ।

महाराजा रतनसिंह बठोठ रै शेखावत जवाहरसिंह दलेलसिंहोत नै, जिको शक्तिमान ब्रिटिश सरकार री विद्रोही लोगां री आगली पांत में हो, शरण देयनै वडै भारी साहस रो परिचय दियो। सीकर रै पाटोदा गांव रै शेखावत डूंगजी नै आगरै री अंग्रेजी जेठ माथै धावो बोल नै छुड़ावण वाळो अर उण रै पछै डूंगजी रै सागै नसीरावाद री अंग्रेजसैनिक छावणी पर चढाई करणै वाळो जवाहरसिंह आपरै वखत रो वीर तथा साहसी योद्धा हो । जोधपुर अर बीकानेर री राजकीय सेनावां अर ब्रिटिश सरकारी निजु सेनावां रै साथै घड़सीसर रै युद्ध में लड़नै रै पाछै डूंगजी सेना रो घेरो तोड़नै निकल भागण में सफल हुयग्या अर वै जेसलमेर कानी चल्या गया । पण जवाहरसिंह मगरासर रै ठाकर हरनाथसिंह रै समझावण सूं बठै सूं निकलनै बीकानेर महाराजा रतनसिंह री शरण में गया परा । महाराज वाइजजत उणनै आश्रय दियो अर अंग्रेजां नै को सूप्यो नी । इण विवाद रै संदर्भ में महाराजा अर अंग्रेजी सरकार रै सागै लांदो पत्र-व्यवहार हुयो । महाराजा शरण आयोडै जवाहरसिंह नै अंग्रेजां री दया माथै छोडण सूं सफा नटग्या । प्रवाद चालै कै महाराजा अंग्रेजां नै अठै ताई कैय दियो कै जवाहरसिंह यदचपि अंग्रेजां रो वागी है, पण महाराजा अंग्रेजां रा दोस्त है, अर जठै ताई जवाहरसिंह महाराजा री देखरेख में है, उणनै अंग्रेजां रो नजरबंद ही मानणो चाहीजै । फेर भी अगर ब्रिटिश सरकार नै उणरै मैत्रीपूर्ण कथन माथै भरोसो नीं है तो वै आपरै वेटै महाराजकुमार सरदारसिंह नै उणरी (जवाहरसिंह री) अेवज अंग्रेजां नै सूप देवण नै वडी राजी-खुशी सूं तैयार है । पण शरण में आयोडै आदमी नै सूपणै में उण रै कुल री राजमर्यादा भंग हुवै । अंग्रेजां नै आखर महाराजा री दृढ़ता अर स्वाभिमान रै सामनै झुकणो पड़चो अर जवाहरसिंह नै महाराजा रै संरक्षण में ही रैवण दियो गयो ।³

इसा अदम्य वीरां नै आपरी वाणी सूं अमरत्व प्रदान करणवाळा शक्तिपुत्र चारणां डूंगजी जंवारजी रै अत्यंत साहसभरचा कामां नै उजागर करता थकां घणा सारा गीत छंदां री रचना करी । उणी गीतां मांय सूं अेक गीत चारण कवि तेजदान आसिया द्वारा रचित मिल्यो है जिको महाराजा रतनसिंह री अंग्रेजां री इच्छा रै खिलाफ जवाहरसिंह नै शरण देवण री दृढ़ता रो यशोगान करता थकां रच्यो गयो है ।⁴ लेख रै समापन सूं पैली इण गीत नै अठै उद्धृत करणै रो लोभ कोनी संवरण करचो जा सकै ।

गीत

सुपह वाह रतनेस दहुं राह रा सिरामण,

भलम अणथाह रा जग प्रसिद्ध भाखै

खीज सिर प्रवल-वड वडां रा खूनियां,

राज जिम वियो कुण सरण राखै ।

रुंदले छावणी-वळे पाडे रसत,
 त्रिजड वळ लूटिया माल ताजा
 आगरो कोट तोडै, मुरड आविया,
 राखियां तिकां दे ओट राजा 2

जनम सूं जहर रा बीज वाया जवर,
 कहर अंगरेज रा खून कीधा
 पेखतां सीस आकास लागा प्रिथी,
 दोसियां नै नथी काढ दीधा 3

कमधजां तणा आदु-उप्रवट करी,
 वळोवळ क्रीत कवराज वांचो
 राव रा उणरै सरण राजा रतन,
 सरण साधार ब्रद कियो सांचो 4

असपती किता असती पणो आदरै,
 सिटाया जिकण रै जगत साखी
 अभिनमां अनोपम अेक जग ऊपरां,
 राज खत्रवट धरम टेक राखी 5

□

— झाभड (झूझुणू), राजस्थान ।

मरु - भारती

(त्रैमासिक शोधपत्रिका)

संपादक

डा. वसंतलाल शर्मा

श्री मदनलाल शर्मा

वार्षिक मूल्य 20 रु.

संपर्क

विडला एज्युकेशन ट्रस्ट

पिलानी (राजस्थान)

1. गौरीशंकर हीराचन्द ओझा — बीकानेर राज्य का इतिहास, प्रथम भाग, पृष्ठ 336 ।
2. मुरजनसिंह शेखावत — नवलगढ़ का संक्षिप्त इतिहास ।
3. खेमराज श्रीकृष्णदास द्वारा प्रकाशित — बीकानेर का इतिहास ।
4. सोभाग्यसिंह शेखावत द्वारा संपादित — स्वतंत्रता सेनानी डूंगजी जवाहरजी, पृष्ठ 47-48 ।

संपादकीय

राजस्थानी ज्ञानपीठ संस्थान, बीकानेर द्वारा निर्णय लिये गये केंद्र इण संस्था रा पीठाधिपति, 'राजस्थानी गंगा' रा प्रधान संपादक तथा राजस्थानी भाषा रै साहित्यिक स्वरूप रा विद्वान् समर्थक और प्रचारक श्री पुरुषोत्तमदास स्वामी रै संमान-स्वरूप 'श्री पुरुषोत्तमदास स्वामी अभिनंदन विशेषांक' प्रकाशित करचो जावै। इण दिशा में पूरो कार्यक्रम वणायो गयो अर यथोचित तयारी भी सुरू करी पण परमपिता री मरजी कीं दूसरी ई रैयी। श्रद्धेय स्वामीजी इणी अवधि में इहलीला संवृत्त कर लीनी अर फलस्वरूप प्रस्तावित योजना नै दूजो ही रूप देवणो पड़चो। उणी रो परिणाम ओ प्रकाशन 'श्री पुरुषोत्तमदास स्वामी स्मृति-विशेषांक' राजस्थानी गंगा रै सहृदय पाठकां री सेवा में प्रस्तुत है—'ईश्वरेच्छा बलीयसी।'

स्व. श्री पुरुषोत्तमदास स्वामी 'राजस्थानी गंगा' रै माध्यम सून राजस्थानी भाषा-साहित्य री श्रीवृद्धि सारू समर्पित भाव सून सेवा-लीन रैया अर वृद्धावस्था में भी अनथक रूप सून बराबर क्रिया-शील वणर घणोई काम करचो। बै राजस्थानी भाषा री अेकरूपता खातर सतत प्रयत्नशील हा अर प्रकाशनार्थ प्राप्त संपूर्ण सामग्री नै घणै श्रम साथै संपादित कर ही संतोष प्राप्त करता। इसा तपसी संपादक कम ही निजर आवै। उणां रो जीवण अर कार्य सराहना तथा अनुकरण करणजोग है।

खास बात आ भी है कै स्वर्गीय स्वामीजी मूल रूप सून विज्ञान रै क्षेत्र रा विद्वान हा पण उणां रो साहित्य-प्रेम भी असाधारण ही मान्यो जासी।

प्रस्तुत विशेषांक में प्रकाशित करण सारू प्रचुर परिमाण में विविध विषयां री महत्त्वपूर्ण सामग्री प्राप्त हुयी पण स्थानाभाव रै कारण उण समस्त सामग्री नै अेक ही अंक में स्थान देवणो संभव नीं हुय सकयो। उण सामग्री नै इण विशेषांक रै 'परिशिष्टांक' में प्रकाशित करण रो निश्चय करचो गयो है। कृपाळु लेखक महानुभाव परिस्थिति नै देखतां क्षमा प्रदान करसी, इसी प्रार्थना है।

धन्यवाद !

सेठ माधोदासजी मूँधड़ा, बीकानेर तथा सेठ रामप्रसादजी पोद्दार, सेंचुरी मिल, बंबई नै घणा-घणा धन्यवाद, जिणां री कृपा सून 'राजस्थानी गंगा' सारू घणमोलो विज्ञापन-सहयोग प्राप्त हुयो। श्री भंवर्लाल नाहटा, कलकत्ता तथा डा. नागरमल सहल, जोधपुर सून भी क्रमशः रु. 251 तथा रु. 111 सधन्यवाद प्राप्त हुया।

—मंत्री

निवेदन

‘राजस्थानी ज्ञानपीठ संस्थान’ स्वनामधन्य स्वर्गीय विद्यामहोदधि श्री नरोत्तमदासजी स्वामी की मानस सृष्टि है। राजस्थानी भाषा रै समुन्नयन, विकास अर प्रचार-प्रसार की उत्कट अभिलाषा सूं उणां ‘राजस्थानी गंगा’ निकाळण की सोची ही पण पार को पड़ी नी। उणां रै लघुभ्राता श्री पुरुषोत्तमदासजी उणां की इण आकांक्षा नै मूर्तरूप दियो अर आज ‘राजस्थानी गंगा’ आप की भांत की अेक ई पत्रिका है। इणनै नियमित रूप सूं निकाळण में स्वर्गीय श्री पुरुषोत्तमदासजी जिकै जी-जान सूं जुड़या उणरै लारै अेक वडो संवळ हो— वीकानेर-महाराजा स्व. डा. करणीसिंहजी द्वारा प्रदत्त लूंठी आर्थिक सहायता। घणै दुःख की वात है कै आज ‘राजस्थानी गंगा’ आप रा आं दोनूं पुजारियां विना लूखी-विलखी है। पुजारियां की पूजा भी परमेश्वर नै पूगै है। स्व. श्री पुरुषोत्तमदासजी रो स्मृति-विशेषांक आप रै हाथां में है, संस्थान रो पूरो मतो है कै निकट भविष्य में स्व. डा. करणीसिंहजी की पावन नै मधुर स्मृति में भी ‘राजस्थानी गंगा’ रो अेक सांतरो विशेषांक निकाळचो जावै। इण सारू स्वर्गीय महाराजा साहव रै गरिमा-मंडित जीवन सूं संबंधित रचनावां रो सादर स्वागत हुसी। वीकाण-धरा रो राजघराणो जियां सदा सूं राजस्थानी भाषा रो संरक्षक रैयो है, पूरो भरोसो है, वो इण अनुष्ठान (‘राजस्थानी गंगा’ रै प्रकाशन) में भी आप रो पूरो हाथ राखसी।

निवेदन रो दूजो पहलू है संस्थान नै सर्वविध सहयोग रो। आपणी ‘राजस्थानी गंगा’ तो बराबर निकळै ई है, केई दुर्लभ नै महत्त्वपूर्ण राजस्थानी ग्रंथां रै प्रकाशन रा भी सुन्दर सपना संस्था संजो राख्या है। इण सारू संस्थान मातृभाषा रै प्रत्येक सेवक सूं सहयोग की कामना करै है।

संस्थान आप रो है; आप की सद्भावना अर सहयोग रो सदा आदर करसी, आभार मानसी।

— डा. गिरिजा शंकर शर्मा
पीठाध्यक्ष
राजस्थानी ज्ञानपीठ संस्थान
वीकानेर (राजस्थान)

(फार्म सं. 4, नियम सं. 8)

- वीकानेर
दिनांक 15 अगस्त 1988 ई.

CC-O. Nanaji Deshmukh Library, BJP, Jammu. Digitized By Siddhanta eGangotri Gyaan Kosha

With best compliments from :

AMARNATH & SONS

Mine Owners & Manufacturers

Rathkhana, BIKANER-334 001 (Raj.)



Grams : RAWPLAST

Office 3359

Phone : Factory 4407

Resi. 3170

With best compliments from :

TAHLA RAM & SONS

Mine Owners

Rathkhana, BIKANER-334 001



Gram : BALLCLAY

Phone : 3342

3842

With best compliments from :

SIMPLEX CONCRETE PILES (INDIA) PVT. LTD.

Regd Office : 12/1, Nellie Sengupta Sarani
(Lindsay Street)
CALCUTTA-700 087

Telephone : 24-8371 to 74 Tlx. : 21-5436

for

CAST-IN-SITU DRIVEN PILES

or

Civil Construction work in

- ★ Power Stations ★ Fertiliser Plants ★ Cement and Paper Factories
- ★ R. C. and Prestressed Concrete Bridges
- ★ Multi Stories Buildings
- and

Heavy and Complicated industries structures
with maximum speed, economy and quality

BRANCHES

Delhi

VAIKUNTH (2nd Floor)
82-83, Nehru Place,
NEW DELHI-110 019
Ph. : 6436818, 6436892
Tlx. : M. 3212

Bombay

501-D, Poonam Chambers
Shiv Sagar Estate,
Dr. Annie Besant Road,
BOMBAY-400 018
Ph. : 4938412/4924322
Tlx. : 6513 M S C L

Madras

21, Casa Major Road, Egmore
MADRAS-600 008
Ph. : 811865/811866
Tlx. : MS 7182

शुभकामनाओं सहित—

सेन्चुरी के अनुपम वस्त्र

100% सूती कपड़ों के लिए

सेन्चुरी टेक्सटाइल्स
एण्ड इंडस्ट्रीज लिमिटेड
'सेन्चुरी भवन', डॉ. एनी बेजंट रोड, वरली,
बम्बई-400 025

मुद्रक : सांखला प्रिन्टर्स, बीकानेर